

ओं नमः परमात्मने, श्री महागणपतये नमः,
श्री गुरुभ्यो नमः
हरिः ओं

कृष्ण यजुर्वेदीय तैत्तिरीय संहिता पञ्चमं काण्डं

Note: Please refer to the book, TS Kandam 1 for notes and conventions used in this Compilation.

Version Notes:

This is now the current Version 2.0 dated May 31, 2025.

1. This replaces the earlier version 1.0 dated May 31, 2021.
2. This version has been updated with the errors found and reported till May 15, 2025.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st	Version Number	0.0 dated 31st March 2018
2nd	Version Number	0.0 dated 31st January 2019
3rd	Version Number	0.0 dated 30th September 2019
4th	Version Number	0.1 dated 30th April 2020
5th	Version Number	1.0 dated 31st May 2021

Table of Contents

5 कृष्ण यजुर्वेदीय तैत्तिरीय संहितायां पञ्चमं काण्डं	4
5.1 पञ्चमकाण्डे प्रथमः प्रश्नः – उख्याग्निकथनं.....	4
5.2 पञ्चमकाण्डे द्वितीयः प्रश्नः – चित्युपक्रमाभिधानं.....	29
5.3 पञ्चमकाण्डे तृतीयः प्रश्नः – चितीनां निरूपणं.....	57
5.4 पञ्चमकाण्डे चतुर्थः प्रश्नः – इष्टकात्रयाभिधानं.....	79
5.5 पञ्चमकाण्डे पञ्चमः प्रश्नः – वायव्यपश्चाद्यानं निरूपणं.....	104
5.6 पञ्चमकाण्डे षष्ठः प्रश्नः – उपानुवाक्याभिधानं.....	128
5.7 पञ्चमकाण्डे सप्तमः प्रश्नः–उपानुवाक्यावशिष्टकर्मनिरूपणं...	152

=====

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पञ्चमं काण्डं

5.1 पञ्चमकाण्डे प्रथमः प्रश्नः – उख्याग्निकथनं

TS 5.1.1.1

सा॒वि॒त्राणि॑ जु॒होति॑ प्र॒सू॒त्यै च॑तुर्गृ॒हीतेन॑ जु॒होति॑ चतु॒ष्पादः॑ प॒शवः॑
प॒शूने॒वा ऽव॑ रु॒न्धे च॑त॒स्रो दि॒शो दि॒क्ष्वेव॑ प्र॒ति तिष्ठ॑ति छ॒न्दा॒ऽसि
दे॒वेभ्यो॑ ऽपा॒ऽक्रामन्॑ न वो ऽभा॒गानि॑ ह॒व्यं व॑क्ष्याम॒ इति॑ तेभ्य
ए॒तच्च॑तुर्गृ॒हीतम॑-धा॒रयन्॑ पु॒रोनु॒वाक्या॑यै या॒ज्यायै॑ दे॒वता॑यै
व॒षट्का॒राय॑ यच्चतुर्गृ॒हीतं जु॒होति॑ छ॒न्दा॒ऽस्येव॑ तत् प्री॒णाति॑
ता॒न्यस्य॑ प्री॒तानि॑ दे॒वेभ्यो॑ ह॒व्यं व॑हन्ति॒ यं का॒मये॑त - [] 1

TS 5.1.1.2

पा॒पीया॑न्थ् स्या॒दित्ये॒कैकं॑ तस्य जुहु॒या-दा॑हु॒तीभिरे॒वैनम॑प गृ॒ह्णाति॑
पा॒पीया॑न् भवति॒ यं का॒मये॑त वसी॒यान्थ् स्या॑दिति॒ सर्वा॑णि
तस्या॑ऽनु॒द्रुत्य॑ जुहु॒यादा॑हु॒त्यैवैनम॑भि क्र॒मय॑ति वसी॒यान् भव॑त्यथो
य॒ज्ञस्यै॒वैषा-॑ऽभि॒क्रान्ति॑रेति॒ वा ए॒ष य॒ज्ञमु॒खा-दृ॑द्ध्य॒या योऽग्ने॑र्दे॒वता॑या
ए॒त्यष्टा॑वे॒तानि॑ सा॒वि॒त्राणि॑ भवन्त्यष्टाक्ष॒रा गा॒यत्री॑ गा॒यत्रो॑ - [] 2

TS 5.1.1.3

ॐग्निस्तेनैव यज्ञमुखादृद्ध्या अग्नेर्देवतायै नैत्यष्टौ सावित्राणि
 भवन्त्याहुतिर्नवमी त्रिवृतमेव यज्ञमुखे वि यातयति यदि कामयेत
 छन्दाँसि यज्ञयशसेना ऽर्पयेयमित्यृचमन्तमां कुर्याच्छन्दाँस्येव
 यज्ञयशसेनाऽर्पयति यदि कामयेत यजमानं यज्ञयशसेना-ऽर्पयेयमिति
 यजुरन्तमं कुर्याद्-यजमानमेव यज्ञयशसेना-ऽर्पयत्यृचा स्तोमं
 समर्द्धयेत्या - [] 3

TS 5.1.1.4

-ह समृद्ध्यै चतुर्भिरभिमा दत्ते चत्वारि छन्दाँसि छन्दोभिरेव
 देवस्य त्वा सवितुः प्रसव इत्याह प्रसूत्या अग्निर्देवेभ्यो निलायत
 स वेणुं प्राऽविशथ् स एतामूतिमनु समचरद्-यद्-वेणोः सुषिरं
 सुषिरा-ऽभिर्भवति सयोनित्वाय स यत्रयत्राऽवसत् तत् कृष्णमभवत्
 कल्माषी भवति रूपसमृद्ध्यै उभयतः क्षणूर्भवतीतश्चाऽ-()
 -मुतश्चाऽर्कस्या-वरुद्ध्यै व्याममात्री भवत्येतावद्वै पुरुषे वीर्यं
 वीर्यसम्मिता ऽपरिमिता भवत्य-परिमितस्याऽवरुद्ध्यै यो वनस्पतीनां
 फलग्रहिः स एषां वीर्यावान् फलग्रहिर्वेणु-र्वेणवी भवति
 वीर्यस्यावरुद्ध्यै ॥ 4

(कामर्येत – गायत्रौ – ऽर्द्धयेति – च – सप्तविंशतिश्च) (A1)

TS 5.1.2.1

व्यृद्धं वा एतद्-यज्ञस्य यदयजुष्केण क्रियत इमामगृभ्णन्
रशना-मृतस्येत्यश्वाभिधानीमा दत्ते यजुष्कृत्यै यज्ञस्य समृद्ध्यै प्रतूर्तं
वाजिन्ना द्रवेत्यश्मभि दधाति रूपमेवास्यैतन् महिमानं व्याचष्टे
युञ्जाथा रसभं युवमिति गर्दभमसत्येव गर्दभं प्रति ष्ठापयति
तस्मादश्वाद्-गर्दभोऽसत्तरो योगेयोगे तवस्तरमित्याह – [] 5

TS 5.1.2.2

योगेयोग एवैनं युङ्क्ते वाजेवाजे हवामह इत्याहान्नं वै वाजो-
ऽन्नमेवाव रुन्धे सखाय इन्द्रमूतय इत्याहेन्द्रियमेवाव रुन्धे
ऽग्निर्देवेभ्यो निलायत तं प्रजापतिरन्वविन्दत् प्राजापत्यो ऽश्वो
ऽश्वेन सं भरत्यनुवित्यै पापवस्यसं वा एतत् क्रियते यच्छेयसा
च पापीयसा च समानं कर्म कुर्वन्ति पापीयान् – [] 6

TS 5.1.2.3

ह्यश्वाद्-गर्दभोऽश्वं पूर्वं नयन्ति पापवस्यसस्य व्यावृत्त्यै
तस्माच्छेयासं पापीयान् पश्चादन्वेति बहुर्वै भवतो भ्रातृव्यो
भवतीव खलु वा एष योऽग्निं चिनुते वज्र्यश्चः प्रतूर्वन्नेह्य-

वक्रामन्न-शस्तीरित्याह वज्रेणैव पाप्मानं भ्रातृव्यमव क्रामति
रुद्रस्य गाणपत्यादित्याह रौद्रा वै पशवो रुद्रादेव - [] 7

TS 5.1.2.4

पशून् निर्याच्याऽऽत्मने कर्म कुरुते पूष्णा सयुजा सहेत्याह पूषा
वा अद्ध्वनाऽ सन्नेता समष्ट्यै पुरीषायतनो वा एष यदग्निरङ्गिरसो
वा एतमग्रे देवतानाऽ समभरन् पृथिव्याः सधस्थादग्निं पुरीष्य-
मङ्गिरस्व-दच्छेहीत्याह सायतनमेवैनं देवताभिः सं भरत्यग्निं
पुरीष्य-मङ्गिरस्व-दच्छेम इत्याह येन - [] 8

TS 5.1.2.5

सङ्गच्छते वाजमेवास्य वृद्धे प्रजापतये प्रतिप्रोच्याग्निः सम्भृत्य
इत्याहुरियं वै प्रजापतिस्तस्या एतच्छ्रोत्रं यद्वल्मीको ऽग्निं पुरीष्य-
मङ्गिरस्वद्-भरिष्याम इति वल्मीकवपामुप तिष्ठते साक्षादेव
प्रजापतये प्रतिप्रोच्या ऽग्निं सं भरत्यग्निं पुरीष्य-मङ्गिरस्वद्-भराम
इत्याह येन संगच्छते वाजमेवास्य वृद्धे ऽन्वग्निरुषसामग्र - [] 9

TS 5.1.2.6

मख्यदित्याहानुख्यात्या आगत्य वाज्यद्ध्वन आक्रम्य वाजिन्
पृथिवीमित्याहेच्छत्येवैनं पूर्वया विन्दत्युत्तरया द्वाभ्यामा क्रमयति

प्रतिष्ठित्या॑ अनु॒रूपा॑भ्यां तस्मा॑दनु॒रूपाः प॒शवः॑ प्र जा॒यन्ते॑ द्यौस्ते॑ पृ॒ष्ठं
पृ॒थि॒वी स॒धस्थ॑मित्या॒हैभ्यो॑ वा ए॒तं लो॒केभ्यः॑ प्रजा॑पतिः समै॑रयद्
रूप॑मेवा॒स्यैत॑न्महि॒मानं॑ व्याच॑ष्टे वज्री॑ वा () एष॑ यदश्चो
दद्-भिर॑न्यतो॒दद्भ्यो॑ भू॒यान् लो॒मभि॑रु॒भया॑दद्भ्यो॒ यं द्वि॑ष्यात्
तम॑धस्पदं॒ ध्याये॑द्-वज्रे॑णै॒वैनं॑ स्तृणु॑ते ॥ 10

(आह - पापीयान् - रुद्रादेव - येना - ग्रं - वज्री वै -
सप्तदश च) (A2)

TS 5.1.3.1

उत्क्रा॑मोद॒क्रमी॑दिति॒ द्वाभ्या॑मुत्क्र॒मय॑ति प्रतिष्ठित्या॑ अनु॒रूपा॑भ्यां
तस्मा॑दनु॒रूपाः प॒शवः॑ प्र जा॒यन्ते॑ ऽप॒ उप॑ सृजति॒ यत्र॑ वा आप॑
उप॑गच्छन्ति॒ तदो॑षधयः॒ प्रति॑ तिष्ठन्त्योष॒धीः प्रति॑तिष्ठन्तीः प॒शवो॑ ऽनु
प्रति॑ तिष्ठन्ति प॒शून् यज्ञो॑ यज्ञं॒ यज॑मानो॒ यज॑मानं॒ प्रजा॑स्तस्मा॒दप॑
उप॑ सृजति॒ प्रतिष्ठित्यै॑ यद॒ध्वर्यु॑-र॒नग्ना॑वाहुतिं जुहु॒याद॒न्धो॑

ऽध्वर्युः - [] 11

TS 5.1.3.2

स्याद्-रक्षा॑ ऽसि॒ यज्ञं॑ ह॒न्युर् हिर॑ण्यमु॒पास्य॑ जुहोत्य॒ग्नित्ये॑व
जुहो॑ति॒ नान्धो॑-ऽध्वर्यु॑र्भवति॒ न यज्ञं॑ रक्षा॑ ऽसि॒ घ्नन्ति॑ जिघ॒र्म्यग्निं॑

मन॑सा घृ॒तेनेत्या॑ह मन॑सा हि पु॒रुषो॑ य॒ज्ञम॑भिगच्छति प्रतिक्ष्यन्तं
 भुव॑नानि वि॒श्वेत्या॑ह सर्व॑ ऽ ह्येष प्र॒त्यङ् क्षेति॑ पृथुं ति॒रश्चा वय॑सा
 बृ॒हन्त॑मित्याहाऽल्पो ह्येष जा॒तो म॒हान् - [] 12

TS 5.1.3.3

भव॑ति व्यचि॒ष्ठम॒न्नं र॒भसं॑ वि॒दान॑मित्याहा ऽन्नमे॒वाऽस्मै॑ स्वदयति
 सर्व॑मस्मै स्वदते य एवं॑ वै॒दाऽऽ त्वा जिघ॑र्मि वच॒सा घृ॒तेनेत्या॑ह
 तस्मा॑द्-यत् पु॒रुषो॑ मन॑सा-ऽभिगच्छति तद्-वा॒चा वद॑त्यरक्ष॒सेत्या॑ह
 रक्ष॑सामप॒हत्यै मर्य॑श्रीः स्पृ॒हय॑द्वर्णो अ॒ग्निरि॒त्याहा-प॑चितिमे॒वा-
 ऽस्मिन्॑ दधा॒त्य-प॑चितिमान् भव॑ति य एवं - [] 13

TS 5.1.3.4

वै॒द मन॑सा त्वै ता॒माप्नु॑मर्हति या॒मद॑ध्वर्यु-र॒न॒ग्नावा॑हुतिं जु॒होति॑
 मन॑स्वतीभ्यां जु॒होत्या॑हु॒त्योरा॑प्त्यै द्वाभ्यां प्रतिष्ठित्यै य॒ज्ञमु॒खेय॑ज्ञमु॒खे वै
 क्रि॒यमा॑णे य॒ज्ञं र॒क्षां॑सि जिघा॑न्सन्त्ये॒तर्हि॑ खलु॒ वा ए॒तद्-
 य॒ज्ञमु॒खं य॑र्ह्ये॒नदा॑हुतिर॒जुते॑ परि लिखति रक्ष॒साम॑प॒हत्यै तिसृ॑भिः
 परि लिखति त्रि॒वृद्वा अ॒ग्निर्या॑वा॒नेवा-ऽग्नि॑स्तस्मा॑द्-रक्षा॒स्यप॑
 हन्ति- [] 14

TS 5.1.3.5

गाय॑त्रिया॒ परि॑ लिख॑ति तेजो॑ वै गा॒यत्री॑ तेज॑सै॒वैनं॑ परि॑ गृह्णा॑ति त्रि॒ष्टुभा॑
 परि॑ लिख॑तीन्द्रि॒यं वै त्रि॒ष्टुगिन्द्रि॒येणै॒वैनं॑ परि॑ गृह्णा॑त्यनु॒ष्टुभा॑ परि॑
 लिख॑त्यनु॒ष्टुप् सर्वा॑णि छन्दा॑सि परि॑भूः पर्या॑प्त्यै मद्ध्य॑तो ऽनु॒ष्टुभा॑
 वाग्वा॑ अनु॒ष्टुप् तस्मा॑न् मद्ध्य॑तो वा॒चा व॑दामो गाय॑त्रिया॒ प्रथ॑मया॒ परि॑
 लिख॑त्यथा-ऽनु॒ष्टुभा॑ ऽथ त्रि॒ष्टुभा॑ तेजो॑ वै गा॒यत्री॑ () यज्ञो॑
 ऽनु॒ष्टुगिन्द्रि॒यं त्रि॒ष्टुप् तेज॑सा चै॒वेन्द्रि॒येण॑ चोभ॑यतो॒ यज्ञं॑ परि॑
 गृह्णा॑ति ॥ 15

(अ॒न्धो॑ऽद॒ध्वर्यु॑ - म॒हान् - भ॑वति य ए॒व - ह॑न्ति -
 त्रि॒ष्टुभा॑ तेजो॑ वै गा॒यत्री॑ - त्रयो॑दश च) (A3)

TS 5.1.4.1

दे॒वस्य॑ त्वा स॒वितुः॑ प्र॒सव॑ इति॒ खन॑ति प्र॒सूत्या॑ अथो॒ धूम॑मे॒वैतेन॑
 जन॑यति ज्योति॑ष्मन्तं त्वा ऽग्ने॒ सुप्र॑तीक॒मित्या॑ह ज्योति॑रे॒वैतेन॑ जन॑यति
 सौ॒ऽग्निर्जा॑तः प्र॒जाः शु॒चा ऽऽर्प॑यत् तं दे॒वा अर्द्ध॑र्चे॒ना-श॑मय॒ज्छिवं॑
 प्र॒जाभ्यो॑ ऽहि॒सन्त॑मित्या॒ह प्र॒जाभ्य॑ ए॒वैनं॑ श॑मयति॒ द्वाभ्यां॑ खन॑ति
 प्रति॑ष्ठित्या॒ अ॒पां पृ॒ष्ठम॑सीति॒ पुष्कर॑पर्णमा - [] 16

TS 5.1.4.2

हर॒त्यपां॑ वा॒ एत॑त् पृ॒ष्ठं य॑त् पु॒ष्कर॑पर्णं॒ रूपे॑णै॒वैन॑दा हरति
 पु॒ष्कर॑पर्णेन॒ सं भर॑ति योनि॒र्वा अ॒ग्नेः पु॒ष्कर॑पर्णं॒ सयो॑निमे॒वाग्नि॑
 सं॒भर॑ति कृ॒ष्णाजि॑नेन॒ सं भर॑ति यज्ञो॒ वै कृ॒ष्णाजि॑नं॒ यज्ञे॑नै॒व यज्ञ॑
 सं॒ भर॑ति यद् ग्राम्या॑णां प॒शूनां॑ च॒र्मणा॑ सं॒भरे॑द् ग्राम्यान्
 प॒शूञ्छु॑चा ऽर्प॑येत् कृ॒ष्णाजि॑नेन॒ सं भर॑त्यार॒ण्याने॒व प॒शू - [] 17

TS 5.1.4.3

ञ्छु॑चा ऽर्प॑यति॒ तस्मा॑त् स॒माव॑त् प॒शूनां॑ प्र॒जाय॑मानाना-मार॒ण्याः
 प॒शवः॑ कनी॒याऽसः॑ शु॒चा ह्य॑ता लो॒मतः॑ सं॒ भर॑त्यतो॒ ह्यस्य॑ मे॒द्ध्यं
 कृ॒ष्णाजि॑नं च पु॒ष्कर॑पर्णं च स॒ स्तृ॑णाती॒यं वै कृ॒ष्णाजि॑नम॒सौ
 पु॒ष्कर॑पर्ण-मा॒भ्या-मे॒वैन॑-मु॒भय॑तः परि॒ गृ॒ह्णात्य॑ग्नि॒र्देवे॑भ्यो नि॒लाय॑त
 तम॑थ॒र्वा ऽन्व॑प॒श्यद॑थ॒र्वा त्वा प्र॑थ॒मो नि॑रमन्थद॒ग्न इ॒त्या - [] 18

TS 5.1.4.4

-ह॒ य ए॒वैन॑मन्वप॒श्यत् ते॒नैवैन॑ सं॒ भर॑ति त्वा॒मग्ने॑ पु॒ष्करा॑दधीत्याह
 पु॒ष्कर॑पर्णे॒ ह्येन॑मुप॒श्रित॑-मवि॒न्दत् तमु॑ त्वा द॒द्ध्यङ्घ्रि॑रित्याह
 द॒द्ध्यङ्घ्रि॑ वा आ॒थर्व॑ण-स्ते॒जस्व्या॑सीत् तेज॒ एवा॑स्मिन् दधाति॒ तमु॑
 त्वा पा॒थ्यो वृ॑षेत्याह॒ पूर्व॑मे॒वोदि॑त-मु॒त्तरे॑णा॒भि गृ॑णाति - [] 19

TS 5.1.4.5

च॒त॒सृ॒भिः॑ सं॒ भ॒रति॑ च॒त्वारि॑ छ॒न्दा॒ँसि॑ छ॒न्दो॑भिरेव गा॒यत्री॑भिर्ब्रा॒ह्म॒णस्य॑
गा॒य॒त्रो हि॑ ब्रा॒ह्म॒ण-स्त्रि॒ष्टु॒ग्भी॑ रा॒ज॒न्य॑स्य त्रै॒ष्टु॒भो हि॑ रा॒ज॒न्यो॑ यं
का॒मये॑त वसी॒यान्त्-स्या॑दि॒त्यु॒भयी॑भिस्तस्य सं॒ भ॒रेत् तेज॑श्चै॒वाऽस्मा॑
इ॒न्द्रि॒यं च॑ स॒मीची॑ दधात्य॒ष्टाभिः॑ सं॒ भ॒रत्य॑ष्टाक्षरा गा॒यत्री॑ गा॒य॒त्रो
ऽग्नि॑र्या॒वाने॒वाऽग्नि॑स्त॒ँ सं॒ भ॒रति॑ सी॒द हो॒तरि॑त्या-()-ह दे॒वता॑
ए॒वास्मै॑ स॒ँ सा॑दयति नि हो॒तेति॑ म॒नु॒ष्यान्त् स॒ँ सी॒दस्वेति॑
वया॑ँसि **ज॒नि॒ष्वा** हि जे॒न्यो अ॒ग्रे अ॒ह्ना॒मित्या॑ह दे॒वम॒नु॒ष्याने॒वास्मै॑
स॒ँस॒न्नान् प्र॑ ज॒नयति॑ ॥ 20

(ऐ - व पशू - नि॒ति - गृ॒णाति॑ - हो॒तरि॑ति - स॒प्तवि॑ँशतिश्च)

(A4)

TS 5.1.5.1

क्रू॒रमि॒व वा॑ अ॒स्या ए॒तत् क॑रोति यत् ख॒नत्य॑प उ॒प सृ॑ज॒त्यापो॑ वै
शा॒न्ताः शा॒न्ताभि॑रे॒वाऽस्यै॑ शु॒चँ श॑मयति सं॒ ते वा॒युर्मा॑तरिश्वा
दधा॒त्वित्या॑ह प्रा॒णो वै वा॒युः प्रा॒णेनै॒वास्यै॑ प्रा॒णँ सं॑ दधाति सं॒ ते
वा॒युरि॒त्याह॑ तस्मा॒द्-वा॒युप्र॑च्युता दि॒वो वृ॑ष्टिरी॒र्ते तस्मै॑ च दे॒वि
व॒षड॑स्तु - [] 21

TS 5.1.5.2

तु॒भ्यमि॒त्याह॑ ष॒ड्वा ऋ॒तव॑ ऋ॒तुष्वे॒व वृ॑ष्टिं दधाति तस्मा॒त् सर्वा॑नृ॒तून्.
व॒र्षति॑ यद्-व॒षट्कु॒र्याद्-या॒तया॑माऽस्य वषट्कारः स्याद्यन्न
व॒षट्कु॒र्याद् रक्षा॑ँसि य॒ज्ञँ ह॒न्युर्व॑डित्याह परोक्षमेव वषट् करोति
नास्य॑ या॒तया॑मा वषट्कारो भवति न य॒ज्ञँ रक्षा॑ँसि घ्नन्ति सुजा॑तो
ज्योति॑षा स॒हेत्य॑नुष्टु॒भोप॑ नह्यत्यनुष्टु॒प् - [] 22

TS 5.1.5.3

सर्वा॑णि छन्दाँसि छन्दाँसि खलु॒ वा अ॒ग्नेः प्रि॒या त॒नूः
प्रि॒ययै॒वैनं॑ तनुवा परि दधाति वेदु॒को वा॒सो भ॒वति॑ य ए॒वं वै॒द वा॒रु॒णो
वा अ॒ग्निरु॑पनद्ध उदु तिष्ठ स्व॒र्ध्वरो॒र्ध्व ऊ॒ षु॒ण ऊ॒तय॑ इति
सा॒वि॒त्रीभ्या॑मुत् तिष्ठति स॒वितृ॑प्रसूत ए॒वास्यो॒र्ध्वां वै॒रु॒णमे॒निमु॑त्
सृ॒जति॑ द्वाभ्यां प्रतिष्ठित्यै स जा॒तो गर्भो॑ असि - [] 23

TS 5.1.5.4

रो॒दस्यो॑रित्याहेमे वै रो॒दसी॑ तयो॒रेष गर्भो॑ यद॒ग्नि-स्तस्मा॑-दे॒वमा॒हाग्ने॑
चा॒रुर्वि॑भृत ओषधीष्वित्याह यदा ह्येतं वि॒भर॑न्त्यथ चा॒रुत॑रो भवति
प्र मा॒तृभ्यो॑ अधि क॒निक्र॑दद्-गा इत्याहौष॒धयो॑ वा अ॒स्य मा॒तर॑स्ताभ्य
ए॒वैनं॑ प्र च्यावयति स्थि॒रो भ॒व वी॒ड्वङ्ग॑ इति गर्द॒भ आ सा॑दयति-[]

TS 5.1.5.5

सं न॒ह्यत्ये॒वैनमे॒तया॑ स्थे॒म्ने गर्द॑भेन सं भ॒रति॑ तस्मा॒द् गर्द॑भः प॒शूनां॑
 भार॑भारितमो गर्द॑भेन सं भ॒रति॑ तस्मा॒द् गर्द॑भो-ऽप्यना॒लेशे-ऽत्यन्यान्
 प॒शून् मे॒घत्य॒न्न॒ ह्ये॒नेना॒र्कः सं भ॒रन्ति॑ गर्द॑भेन संभ॒रति॑ तस्मा॒द्
 गर्द॑भो द्विरे॒ताः सन् क॑निष्ठं प॒शूनां॑ प्र जा॒यते॒ऽग्निर् ह्यस्य॑ योनिं
 निर्द॑हति प्रजासु वा ए॒ष ए॒तर्ह्यारूढः॑ - [] 25

TS 5.1.5.6

स ई॒श्वरः॑ प्र॒जाः शु॒चा प्र॒दहः॑ शि॒वो भ॒व प्र॒जाभ्य॑ इत्या॒ह प्र॒जाभ्य॑
 ए॒वैनं॑ श॒मय॑ति मा॒नुषी॑भ्यस्त्वम॒ङ्गिर॑ इत्या॒ह मा॒नव्यो॑ हि प्र॒जा मा
 द्या॒वापृ॑थि॒वी अ॒भि शू॒शुचो॑ मा ऽन्त॑रि॒क्षं मा व॒नस्प॑ती॒नित्या॑है॒भ्य ए॒वैनं॑
 लो॒केभ्यः॑ श॒मय॑ति प्रै॒तु वा॒जी क॑नि॒क्रद॑दित्या॒ह वा॒जी ह्येष॑
 ना॒नद॑द्-रा॒सभः॑ प॒त्वेत्या॑ - [] 26

TS 5.1.5.7

-ह रा॒सभ॑ इति ह्ये॒तमृ॑षयो ऽव॒दन् भ॑रन्ना॒ग्निं पु॑री॒ष्यमि॑त्या॒हाऽग्निं॑
 ह्येष॑ भ॒रति॑ मा पा॒द्यायु॑षः पु॒रेत्या॑हाऽऽयु॒रेवाऽस्मिन्॑ दधा॒ति तस्मा॑द्
 गर्द॑भः सर्व॒मायु॑रेति तस्मा॒द् गर्द॑भे पु॒रा ऽऽयु॑षः प्र॒मीते॑ बिभ्यति
 वृषा॑ऽग्निं वृ॒षणं॑ भ॒रन्ति॑त्या॒ह वृषा॑ ह्येष वृषा॑ऽग्नि॒रपां॑ गर्भं॑ - [] 27

TS 5.1.5.8

समु॒द्रि॒य-मि॒त्याहा॒ऽपा॒ꣳ ह्येष॑ गर्भो॑ यद॒ग्निर॒ग्न आ॑ या॒हि वी॒तय॑ इति॒
वा इ॒मौ लो॒कौ व्यै॒ताम॒ग्न आ॑ या॒हि वी॒तय॑ इति॒ यदा॒हाऽन॒योर्लो॒कयो-
र्वी॒त्यै प्र॒च्युतो॒ वा ए॒ष आ॒यत॑नाद॒गतः॑ प्र॒तिष्ठा॑ꣳ स ए॒तर्ह्य॑द॒ध्वर्युं॑ च॒
यज॑मानं च द॒ध्याय॑त्यृ॒तꣳ स॒त्यमि॒त्याहे॒यं वा ऋ॒तम॒सौ - [] 28

TS 5.1.5.9

स॒त्यम॒नयो॒रेवैनं॑ प्र॒ति ष्ठा॑पयति॒ नाऽऽ*ति॒माच्छ॑त्यद॒ध्वर्युर्न॑ यज॑मानो॒
वरु॑णो वा ए॒ष यज॑मानम॒भ्यैति॑ यद॒ग्निरु॒पन॑द्ध ओष॒धयः॑ प्र॒ति
गृ॒ह्णीता॒ग्निमे॒त-मि॒त्याह॑ शान्त्यै॒ व्यस्य॑न् वि॒श्वा अ॒मती॒ररा॑ती-रि॒त्याह॑
रक्ष॑साम॒पहत्यै॑ नि॒षीद॑न् नो॒ अप॑ दु॒र्मति॑ꣳ ह॒नदि॒त्याह॑ प्र॒तिष्ठि॒त्या
ओष॑धयः प्र॒ति मो॒दद॑ध्व - [] 29

TS 5.1.5.10

मे॒नमि॒त्याहौष॑धयो वा अ॒ग्नेर्भा॒गधे॒यं ता॒भिरे॒वैनꣳ स॒मर्द॑धयति॒
पु॒ष्पाव॑तीः सु॒पिप्प॒ला इ॒त्याह॑ तस्मा॒दोष॑धयः फ॒लं गृ॒ह्णन्त्य॑यं वा॒ गो गर्भ॑
ऋ॒त्वियः॑ प्र॒त्नꣳ स॒धस्थ॑मा-ऽस॒ददि॒त्याह॑ या॒भ्य ए॒वैनं॑ प्र॒च्याव॑यति॒
तास्वे॒वैनं॑ प्र॒ति ष्ठा॑पयति॒ द्वाभ्या॑मु॒पाव॑हरति॒ प्र॒तिष्ठि॒त्यै ॥ 30

(अ॒स्त्व - नु॒ष्टु - ब॑सि - सा॒दय॒त्या - रु॒ढः-प॒त्वेति॑-ग॒र्भ-म॒सौ
- मो॒द॒ध्वं - द्वि॑च॒त्वारि॒श॒च्च) (A5)

TS 5.1.6.1

वा॒रु॒णो वा अ॒ग्निरु॒प॒न॒द्धो वि पा॒ज॒सेति॑ वि स्र॒स॒यति॑ स॒वितृ॑प्र॒सूत
ए॒वा॒स्य वि॒षू॒चीं व॑रु॒णमे॒निं वि सृ॒ज॒त्यप॑ उप॒ सृ॒ज॒त्यापो॑ वै शा॒न्ताः
शा॒न्ताभि॑रे॒वा॒स्य शु॒च॒ श॒म॒यति॑ ति॒सृ॒भि॒रु॒प सृ॒जति॑ त्रि॒वृ॒द्धा
अ॒ग्निर्या॒वाने॒वा॒ग्नि॒स्तस्य॑ शु॒च॒ श॒म॒यति॑ मि॒त्रः स॒सृ॒ज्य
पृ॒थि॒वीमि॒त्याह॑ मि॒त्रो वै शि॒वो दे॒वानां॑ ते॒नैवै - [] 31

TS 5.1.6.2

-न॒सृ॒ स॒सृ॒जति॑ शा॒न्त्यै॑ यद् ग्रा॒म्याणां॑ पा॒त्राणां॑ क॒पालैः॑
स॒सृ॒जेद्-ग्रा॒म्याणि॑ पा॒त्राणि॑ शु॒चा ऽर्प॑ये॒दर्म॑क॒पालैः॑ स॒सृ॒जत्ये॒तानि॑
वा अ॒नु॒प॒जी॒वनी॑यानि॒ तान्ये॒व शु॒चा ऽर्प॑यति॒ शर्क॑रा॒भिः स॒सृ॒जति॑
धृ॒त्या अथो॑ श॒न्त्वाया॑ज॒लोमैः॑ स॒सृ॒जत्ये॒षा वा अ॒ग्नेः प्रि॒या
त॒नूर्य॑द॒जा प्रि॒ययै॑वैनं॒ तनु॒वा स॒सृ॒जत्यथो॑ ते॒जसा॑ कृ॒ष्णाजि॒नस्य॑
लो॒मभिः॑ स॒सृ॒ - [] 32

TS 5.1.6.3

सृजति यज्ञो वै कृष्णाजिनं यज्ञेनैव यज्ञं सृजति रुद्राः
 संभृत्य पृथिवीमित्याहैता वा एतं देवता अग्रे समभरन् ताभिरेवैनं
 सं भरति मखस्य शिरोऽसीत्याह यज्ञो वै मखस्तस्यैतच्छिरो यदुखा
 तस्मादेवमाह यज्ञस्य पदे स्थ इत्याह यज्ञस्य ह्येते - [] 33

TS 5.1.6.4

पदे अथो प्रतिष्ठित्यै प्रान्याभि-र्यच्छत्यन्वन्यै-र्मन्त्रयते मिथुनत्वाय
 न्युद्धिं करोति त्रय इमे लोका एषां लोकानामाप्यै छन्दोभिः करोति
 वीर्यं वै छन्दांसि वीर्येणैवैनानां करोति यजुषा बिलं करोति व्यावृत्त्या
 इयतीं करोति प्रजापतिना यज्ञमुखेन संमितां द्विस्तनां करोति
 द्यावापृथिव्योर्दोहाय चतुःस्तनां करोति पशूनां दोहायाष्टास्तनां
 करोति छन्दसां दोहाय नवाश्रि-मभिचरतः () कुर्यात् त्रिवृतमेव
 वज्रं संभृत्य भ्रातृव्याय प्र हरति स्तृत्यै कृत्वाय सा महीमुखामिति
 नि दधाति देवतास्वेवैनानां प्रति ष्ठापयति ॥ 34

(तेनैव - लोमभिः स - मेते - अभिचरत - एकविंशतिश्च) (A6)

TS 5.1.7.1

स॒प्तभि॒र्धूप॑यति स॒प्त वै शी॒र्ष॒ण्याः॑ प्रा॒णाः शि॒र ए॒तद्-य॒ज्ञस्य॑
यदु॒खा शी॒र्ष॒न्ने॒व य॒ज्ञस्य॑ प्रा॒णान् द॑धाति तस्मा॒त् स॒प्त शी॒र्ष॒न्
प्रा॒णा अ॒श्वश॑केन धू॒पय॑ति प्रा॒जाप॑त्यो वा अ॒श्वः स॒योनि॑त्वाया-
दि॒तिस्त्वे॒त्याहे॒यं वा॑ अ॒दि॒तिर॑दि॒त्यैवा॑दि॒त्यां ख॒नत्य॑स्या अ॒क्रूरं॑का॒राय॑
न हि स्वः स्व॑ हि॒नस्ति॑ दे॒वानां॑ त्वा प॒त्नीरि॑त्याह दे॒वानां॑ - [] 35

TS 5.1.7.2

वा॑ ए॒तां प॒त्नयो॑ ऽग्ने ऽकु॒र्वन् ता॑भि॒रेवै॑नां द॑धाति धि॒षणा॑स्त्वे॒त्याह॑ वि॒द्या
वै धि॒षणा॑ वि॒द्याभि॒रेवै॑नाम॒भीन्धे॑ ग॒ना स्त्वे॒त्याह॑ छ॒न्दा॑सि वै ग॒ना
इ॒च्छन्दा॑भि॒रेवै॑ना॑ श्र॒पय॑ति वरू॒त्रय॑स्त्वे॒त्याह॑ हो॒त्रा वै वरू॒त्रयो
हो॒त्राभि॒रेवै॑नां प॒चति॑ ज॒नय॑स्त्वे॒त्याह॑ दे॒वानां॑ वा॑ प॒त्नीर् - [] 36

TS 5.1.7.3

ज॒नय॑स्ताभि॒रेवै॑नां प॒चति॑ षड्भिः प॒चति॑ षड्वा ऋ॒तव॑ ऋ॒तुभि॒रेवै॑नां
प॒चति॑ द्विः प॒चन्त्वि॒त्याह॑ तस्मा॒द् द्विः स॑व॒त्स॒रस्य॑ स॒स्यं प॑च्यते
वा॒रु॒ण्यु॒खाऽभी॑द्धा मै॒त्रियो॑पैति शान्त्यै दे॒वस्त्वा॑ स॒वितो॑द्-व॒प॒त्वि॒त्याह॑
स॒वि॒तृप्र॑सूत ए॒वैनां॑ ब्र॒ह्म॒णा दे॒वता॑भि॒रुद्-व॑प॒त्य॒प॒द्य॒माना॑ पृ॒थिव्या॑शा
दि॒श आ॑ पृ॒णे - [] 37

TS 5.1.7.4

–त्याह तस्मादग्निः सर्वा दिशोऽनु वि भात्युत्तिष्ठ बृहती भवोर्द्ध्वा
तिष्ठ ध्रुवा त्वमित्याह प्रतिष्ठित्या असुर्यं पात्रमनाच्छृण्णमा–च्छृणत्ति
देवत्रा–ऽकरजक्षीरेणा ऽऽ च्छृणत्ति परमं वा एतत् पयो यदजक्षीरं
परमेणैवैनां पयसाऽऽच्छृणत्ति यजुषा व्यावृत्त्यै छन्दोभिरा च्छृणत्ति
छन्दोभिर्वा एषा () क्रियते छन्दोभिरेव छन्दाऽस्या च्छृणत्ति ॥ 38

(आह देवानां – वै पत्नीः – पृणै – षा – षट् च) (A7)

TS 5.1.8.1

एकविंशत्या माषैः पुरुषशीर्ष–मच्छैत्यमेद्ध्यै वै माषा अमेद्ध्यं
पुरुषशीर्ष–ममेद्ध्यैरेवा–स्या–मेद्ध्यं निरवदाय मेद्ध्यं कृत्वा
ऽऽ हरत्येकविंशति–र्भवन्त्येकविंशो वै पुरुषः पुरुषस्याऽऽप्त्यै
व्यृद्धं वा एतत् प्राणैरमेद्ध्यं यत् पुरुषशीर्षं सप्तधा वितृण्णां
वल्मीकवपां प्रति नि दधाति सप्त वै शीर्षण्याः प्राणाः
प्राणैरेवैनथ्–समर्द्धयति मेद्ध्यत्वाय यावन्तो – [] 39

TS 5.1.8.2

वै मृत्युबन्धवस्तेषां यम आधिपत्यं परीयाय यमगाथाभिः परि गायति
यमादेवैनद्–वृद्धे तिसृभिः परि गायति त्रय इमे लोका एभ्य

ए॒वैन॑ल्लो॒केभ्यो॑ वृ॒द्धे तस्मा॑द्-गा॒यते॒ न दे॒यं गा॒था हि तद्-वृ॒द्धे॑
 ऽग्नि॑भ्यः प॒शूना ल॑भते का॒मा वा अ॒ग्नयः॑ का॒माने॒वाव रु॑न्धे यत्
 प॒शून् नाऽऽ*ल॑भेताऽन॒वरु॑द्धा अस्य - [] 40

TS 5.1.8.3

प॒शवः॑ स्यु॒र्यत् पर्य॑ग्नि॒कृता॒नुत्सृ॑जेद्-य॒ज्ञवे॑श॒सं कु॑र्याद्-यथ्
 स॒७स्था॑पयेद्-या॒तया॑मानि शी॒र्षाणि॑ स्यु॒र्यत् प॒शूना॒लभ॑ते तेनै॒व
 प॒शून्व रु॑न्धे यत् पर्य॑ग्नि॒कृता॒नुत्सृ॑जति शी॒र्षा-म॑या॒तया॑मत्वा॒य
 प्रा॒जाप॑त्येन स॒७ स्था॑पयति य॒ज्ञो वै प्र॒जाप॑तिर्य॒ज्ञ ए॒व य॒ज्ञं
 प्र॒ति ष्ठा॑पयति प्र॒जाप॑तिः प्र॒जा अ॒सृज॑त स रि॒रिचा॑नोऽम॒न्यत॒ स ए॒ता
 आ॒प्रीर॑पश्यत् ताभि॒र्वै स मु॑खत - [] 41

TS 5.1.8.4

आ॒त्मा॒नमा॑ ऽप्री॒णीत॒ यदे॑ता आ॒प्रियो॑ भव॒न्ति य॒ज्ञो वै प्र॒जाप॑ति-
 र्य॒ज्ञमे॒वैता॑भिर्मु॒खत॒ आ प्री॑णा॒त्यप॑रि॒मित॒छन्द॑सो भव॒न्त्यप॑रि॒मितः
 प्र॒जाप॑तिः प्र॒जाप॑तेरा॒प्त्या ऊ॒नाति॑रि॒क्ता मि॒थुनाः॑ प्र॒जात्यै॑ लो॒मशं॑ वै
 ना॒मैत॑च्छन्दः प्र॒जाप॑तेः प॒शवो॑ लो॒मशाः॑ प॒शूने॒वाऽव रु॑न्धे सर्वा॑णि
 वा ए॒ता रू॒पाणि॑ सर्वा॑णि रू॒पाण्य॒ग्नौ चि॒त्यै क्रि॑यन्ते तस्मा॑दे॒ता
 अ॒ग्नेश्चि॑त्यस्य - [] 42

TS 5.1.8.5

भवन्त्येकविंशतिं सामिधेनीरन्वाह रुग्वा एकविंशो रुचमेव
गच्छत्यथो प्रतिष्ठामेव प्रतिष्ठा ह्येकविंश-श्चतुर्विंशतिमन्वाह
चतुर्विंशतिरर्द्धमासाः सँवथ्सरः सँवथ्सरोऽग्निर्वैश्वानरः साक्षादेव
वैश्वानरमव रुन्धे पराचीरन्वाह पराडिव हि सुवर्गो लोकः
समास्त्वाऽग्न ऋतवो वर्द्धयन्त्वित्याह समाभिरेवाऽग्निं

वर्द्धय - [] 43

TS 5.1.8.6

त्यूतुभिः सँवथ्सरं विश्वा आ भाहि प्रदिशः पृथिव्या इत्याह
तस्मादग्निः सर्वा दिशोऽनु वि भाति प्रत्यौहतामश्विना
मृत्युमस्मादित्याह मृत्युमेवाऽस्मादप नुदत्युद्वयं तमसस्पर्शित्याह पाप्मा
वै तमः पाप्मानमेवास्मादप हन्त्यगन्म ज्योतिरुत्तम-मित्याहाऽसौ वा
आदित्यो () ज्योतिरुत्तम-मादित्यस्यैव सायुज्यं गच्छति न
सँवथ्सरस्तिष्ठति नास्य श्रीस्तिष्ठति यस्यैताः क्रियन्ते ज्योतिष्मती-
मुत्तमामन्वाह ज्योतिरेवास्मा उपरिष्ठाद् दधाति सुवर्गस्य
लोकस्यानुख्यात्यै ॥ 44 (यावन्तो - ऽस्य - मुखत - श्रित्यस्य -
वर्द्धय - त्यादित्यो - ऽष्टाविंशतिश्च) (A8)

TS 5.1.9.1

षड्भिर्दीक्षयति षड् वा ऋतव ऋतुभिरेवैनं दीक्षयति सप्तभिर्दीक्षयति
 सप्त छन्दाँसि छन्दोभिरेवैनं दीक्षयति विश्वे देवस्य नेतुरित्य-
 नुष्टुभोत्तमया जुहोति वाग्वा अनुष्टुप् तस्मात् प्राणानां वागुत्तमै-
 कस्मादक्षरादनाप्तं प्रथमं पदं तस्माद्-यद्-वाचोऽनाप्तं तन्मनुष्या
 उप जीवन्ति पूर्णया जुहोति पूर्ण इव हि प्रजापतिः - [] 45

TS 5.1.9.2

प्रजापतेराप्त्यै न्यूनया जुहोति न्यूनाद्धि प्रजापतिः प्रजा असृजत
 प्रजानाँ सृष्ट्यै यदर्चिषि प्रवृञ्ज्याद्-भूतमव रुन्धीत यदङ्गारेषु
 भविष्यदङ्गारेषु प्र वृणक्ति भविष्यदेवाव रुन्धे भविष्यद्धि भूयो
 भूताद्-द्वाभ्यां प्र वृणक्ति द्विपाद्-यजमानः प्रतिष्ठित्यै ब्रह्मणा वा
 एषा यजुषा संभृता यदुखा सा यद्धिद्येताऽऽर्तिमाच्छेद् - [] 46

TS 5.1.9.3

यजमानो हन्येताऽस्य यज्ञो मित्रैतामुखां तपेत्याह ब्रह्म वै मित्रो
 ब्रह्मन्नेवैनां प्रति ष्ठापयति नाऽऽर्तिमाच्छति यजमानो नास्य यज्ञो
 हन्यते यदि भिद्येत तैरेव कपालैः सँ सृजेथ् सैव ततः

प्रायश्चित्तिर्यो गतश्रीः स्यान्मथित्वा तस्याव दद्ध्याद्-भूतो

वा एष स स्वां - [] 47

TS 5.1.9.4

देवतामुपैति यो भूतिकामः स्याद्य उखायै संभवेथ् स एव तस्य
स्यादतो ह्येष संभवत्येष वै स्वयंभूर्नाम भवत्येव यं कामयेत
भ्रातृव्यमस्मै जनयेय-मित्यन्यतस्तस्या-ऽऽहत्याव दद्ध्याथ्
साक्षादेवास्मै भ्रातृव्यं जनयत्यम्बरीषा-दन्नकामस्याव दद्ध्यादम्बरीषे
वा अन्नं भ्रियते सयोन्येवान्न - [] 48

TS 5.1.9.5

-मव रुन्धे मुञ्जानव दधात्यूर्ग्वै मुञ्जा ऊर्जमेवास्मा अपि
दधात्यग्निर्देवेभ्यो निलायत स क्रुमुकं प्राऽ*विशत् क्रुमुकमव दधाति
यदेवास्य तन्न न्यक्तं तदेवाव रुन्ध आज्येन सं यौत्येतद्वा अग्नेः प्रियं
धाम यदाज्यं प्रियेणैवैनं धाम्ना समर्द्धयत्यथो तेजसा - [] 49

TS 5.1.9.6

वैकंकतीमा दधाति भा एवाव रुन्धे शमीमयीमा दधाति शान्त्यै
सीद त्वं मातुरस्या उपस्थ इति तिसृभिर्जातमुप तिष्ठते त्रय इमे
लोका एष्वेव लोकेष्वाविदं गच्छत्यथो प्राणानेवाऽऽत्मन् धत्ते ॥ 50

(प्रजापति॑र - ऋच्छे॒त् - स्वा - मे॒वान्नं॑ - तेज॑सा -
चतु॑स्त्रिंशच्च) (A9)

TS 5.1.10.1

न ह॑ स्म॒ वै पु॒राऽग्नि॑रप॒रशु॑वृ॒क्णं॑ द॒हति॑ तद॒स्मै प्र॑यो॒ग
एव॑र्षि॒रस्व॑द॒यद्-यद॑ग्ने॒ यानि॑ का॒नि चे॑ति॒ समि॑ध॒मा
द॒धात्य॑प॒रशु॑वृ॒क्ण-मे॒वास्मै॑ स्व॒दय॑ति॒ सर्व॑म॒स्मै स्व॑द॒ते य ए॒वं
वे॒दौदु॑म्बरी॒मा द॒धात्यू॑र्वा उ॒दुम्ब॑र ऊ॒र्जमे॒वास्मा॑ अपि॒ दधा॑ति
प्रजा॑पति॒रग्नि॑-म॒सृज॑त तं सृष्टं॑ र॒क्षास्य॑ - [] 51

TS 5.1.10.2

-जिघा॑स॒न्त्स ए॒तद्-रा॒क्षोघ्न॑मप॒श्यत् ते॒न वै स॒ रक्षा॑स्यपा॒हत
यद्-रा॒क्षोघ्नं॑ भव॒त्यग्ने॑रेव ते॒न जा॒ताद्-रक्षा॑स्यप॒ हन्त्या॑श्च॒त्थीमा॑
द॒धात्य॑श्च॒त्थो वै व॒नस्प॑तीनां स॒पत्न॑सा॒हो विजि॑त्यै वैक॒ङ्कती॑मा
द॒धाति॑ भा ए॒वाव रु॑न्धे श॒मीम॑यी॒मा द॒धाति॑ शान्त्यै स॒ंशितं॑ मे
ब्र॒ह्मोदे॑षां बा॒हू अति॑र॒मित्यु॑त्तमे औ॒दुम्ब॑री - [] 52

TS 5.1.10.3

वाच॑यति ब्र॒ह्मणै॑व क्ष॒त्रं स॒ इति॑ क्ष॒त्रेण॑ ब्र॒ह्म तस्मा॑द् ब्रा॒ह्मणो
राज॑न्यवा॒नत्य॑न्यं ब्रा॒ह्मणं॑ तस्मा॑द्-राज॑न्यो ब्रा॒ह्मणवा॒नत्य॑न्यं

रा॒ज॒न्यं॑ मृ॒त्यु॒र्वा ए॒ष यद॒ग्नि॒रमृ॒तं॑ हिर॒ण्यं॑ रु॒क्म॒मन्त॑रं
प्रति॑ मुञ्च॒ते ऽमृ॒तमे॒व मृ॒त्यो॒रन्त॑र् ध॒त्त एक॑वि॒ंश॒तिनि॑र्बा॒धो
भ॒वत्ये॑क॒वि॒ंश॒तिर्वै॑ दे॒वलो॒का द्वा॒दश॑ मा॒साः पञ्च॑र्त॒वस्त्र॑य इ॒मे
लो॒का अ॒सावा॑दि॒त्य - [] 53

TS 5.1.10.4

एक॑वि॒ंश ए॒ताव॑न्तो वै दे॒वलो॒कास्ते॑भ्य ए॒व भ्रा॑तृ॒व्यम॑न्त॒रेति॑
नि॒र्बा॒धैर्वै॑ दे॒वा अ॒सुरा॑न् नि॒र्बा॒धे ऽकु॑र्व॒त तन्नि॑र्बा॒धानां॑ नि॒र्बा॒धत्वं
नि॒र्बा॒धी भ॑व॒ति भ्रा॑तृ॒व्याने॒व नि॒र्बा॒धे कु॑रु॒ते सा॒वि॒त्रिया॑ प्रति॑ मुञ्च॒ते
प्र॒सू॒त्यै न॒क्तोषा॑सेत्यु॒त्तर॑या ऽहो॒रात्रा॑भ्या॒मेवै॒न-मु॑द्यच्छ॒ते दे॒वा
अ॒ग्निं धा॑रयन् द्र॒वि॒णोदा॑ इत्या॒ह प्रा॒णा वै दे॒वा द्र॒वि॒णोदा॑
अ॒हो॒रात्रा॑भ्या॒मेवै॒नमु॑द्य॒त्य - [] 54

TS 5.1.10.5

प्रा॒णैर्दा॑धा॒रा ऽऽसी॑नः प्रति॑ मुञ्च॒ते तस्मा॑दासी॒नाः प्र॒जाः प्र जा॑यन्ते
कृ॒ष्णाजि॑नमु॒त्तरं॑ ते॒जो वै हिर॑ण्यं ब्र॒ह्म कृ॒ष्णाजि॑नं ते॒जसा॑ चै॒वैनं॑
ब्र॒ह्मणा॑ चो॒भय॑तः परि॑ गृ॒ह्णाति॑ षडु॒द्याम॑ शि॒क्यं भ॑व॒ति षड्वा॑ ऋ॒तव॑
ऋ॒तुभि॑रे॒वैन-मु॑द्यच्छ॒ते यद् द्वा॒दशो॑द्याम॑ सँव॒त्सरे॑णै॒व मौञ्जं॑
भ॒वत्यू॑र्वै॒ मुञ्जा॑ ऊ॒र्जैर्वै॒नं स () म॑र्द॒धय॑ति सु॒पर्णो॑ऽसि

गरु॒त्मानि॒त्य॒वे॒क्षते॑ रूप॒मे॒वा॒स्यै॒तन्म॑हि॒मानं॑ व्या॒च॒ष्टे दि॒वं ग॒च्छ सु॒वः
प॒ते॒त्या॒ह सु॒वर्ग॑मे॒वैनं॑ लो॒कं ग॑मयति ॥ 55

(रक्षा॒स्यौ - दु॒र्बरी॑ - आ॒दित्य॑ - उ॒द्यत्य॑ - सं -
चतु॒र्विं॒शति॑श्च) (A10)

TS 5.1.11.1

समि॒द्धो अ॒ज्जन् कृ॒दरं॑ म॒तीनां॑ घृ॒तम॑ग्ने म॒धुम॑त् पि॒न्व॒मानः॑ ।
वा॒जी वह॑न् वा॒जिनं॑ जा॒तवे॑दो दे॒वानां॑ व॒क्षि प्रि॒यमा॑ स॒धस्थं॑ ॥
घृ॒तेना॑ज्जन्थ्सं प॒थो दे॒वयाना॑न् प्र॒जान॑न् वा॒ज्यप्ये॑तु दे॒वान् ।
अनु॑ त्वा स॒प्ते प्र॑दि॒शः स॒चन्ता॑ स्व॒धाम॑स्मै यज॒मानाय॑ धेहि ॥
ई॒ड्यश्चा॑सि व॒न्द्यश्च॑ वा॒जिन्ना॑शुश्चा॒सि मे॒द्ध्यश्च॑ स॒प्ते ।

अ॒ग्निष्ट्वा - [] 56

TS 5.1.11.2

दे॒वैर्व॑सु॒भिः स॒जोषाः॑ प्री॒तं व॑हिं व॒हतु॑ जा॒तवे॑दाः ॥
स्ती॒र्णम् ब॒र्हिः सु॒ष्ट्री॑मा जुषा॒णोरु॑ पृथु प्रथ॒मानं॑ पृथि॒व्यां ।
दे॒वेभि॑र्यु॒क्तम॑दि॒तिः स॒जोषाः॑ स्यो॒नं कृ॑ण्वाना सु॒विते॑ द॒धातु॑ ॥
ए॒ता उ॒ वः सु॒भगा॑ वि॒श्वरू॑पा वि पक्षो॒भिः श्रय॑माणा उ॒दातैः॑ ।
ऋ॒ष्वाः स॒तीः क॒वषः॑ शु॒म्भमा॑ना द्वा॒रो दे॒वीः सु॒प्राय॑णा भवन्तु ॥

अ॒न्तरा॑ मि॒त्रावरु॑णा च॒रन्ती॑ मु॒खं य॑ज्ञाना॒मभि॑ सँ॒विदाने॑ ।

उषा॑सा वा॒ - [] 57

TS 5.1.11.3

सु॒हिर॑ण्ये सु॒शिल्पे॑ ऋ॒तस्य॑ यो॒नावि॑ह सा॒दयामि॑ ॥

प्र॒थमा॑ वा॒ सर॑थिना सु॒वर्णा॑ दे॒वौ प॑श्यन्तौ भुव॒नानि॑ वि॒श्वा ॥

अ॒पिप्र॑यं चो॒दना॑ वां मि॒माना॑ हो॒तारा॑ ज्योतिः प्र॒दिशा॑ दि॒शन्ता॑ ॥

आ॒दि॒त्यैर्नो॑ भा॒रती॑ व॒ष्टु य॑ज्ञं सर॒स्वती॑ सह रु॒द्रैर्न॑ आ॒वीत् ।

इ॒डोप॑हू॒ता व॑सुभिः स॒जोषा॑ य॒ज्ञं नो॑ दे॒वीर॑मृतेषु ध॒त्त ॥

त्व॒ष्टा वी॑रं दे॒वका॑मं ज॒जान॑ त्व॒ष्टुर्वा॑ जा॒यत॑ आ॒शुर॑श्चः () । 58

TS 5.1.11.4

त्व॒ष्टेदं॑ वि॒श्वं भु॑वनं ज॒जान॑ ब॒होः क॑र्तारमि॒ह य॑क्षि हो॒तः ॥

अ॒श्वो घृ॑तेन त्म॒न्या स॑म॒क्त उप॑ दे॒वा ऋ॑तुशः पाथ ए॒तु ।

व॒नस्प॑ति-दे॒वलोकं॑ प्र॒जान॑न्नग्निना ह॒व्या स्व॑दि॒तानि॑ व॒क्षत् ॥

प्र॒जाप॑तेस्तपसा वावृ॒धानः॑ स॒द्यो जा॑तो दधिषे य॒ज्ञम॑ग्ने ।

स्वा॒हाकृ॑तेन ह॒विषा॑ पु॒रोगा॑ या॒हि सा॒द्ध्य॑ा ह॒विर॑दन्तु दे॒वाः ॥ 59

(अ॒ग्नि॑ष्ट्वा - वा - म॒श्वो - द्वि॑चत्वा॒रि॒श॒च्य) (A11)

Prasna Korvai with starting Padams of 1 to 11 Anuvaakams :-

(सा॒वि॒त्रा॒णि - व्यृ॒द्ध - मु॒त्क्रा॒म - दे॒वस्य॑ ख॒नति॑ - क्रू॒रं - वा॒रु॒णः
- स॒प्त॒भि - रे॒क॒वि॒श॒त्या - षड्भि॑ - न ह॑ स्म - स॒मि॒द्धो
अ॒ञ्ज - त्रे॒का॒द॒श)

Korvai with starting Padams of 1, 11, 21 Series of Panchaatis :-

(सा॒वि॒त्रा - ण्यु॒त्क्रा॒म - क्रू॒रं - वा॒रु॒णः - प॒श॒वः स्यु॒ -
न ह॑ स्म - न॒व॒पञ्चा॒शत्)

First and Last Padam of First Prasnam of 5th Kandam

(सा॒वि॒त्रा॒णि - ह॒वि॒रद॑न्तु दे॒वाः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे

प्रथमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.2 पञ्चमकाण्डे द्वितीयः प्रश्नः – चित्युपक्रमाभिधानं

TS 5.2.1.1

विष्णु॑मुखा॒ वै दे॒वा इ॒च्छन्द्वा॑भिरि॒मान् लो॒कान॑न॒पज॑य्य म॒भ्यज॑यन् ।
यद्-वि॒ष्णुक्र॑मान् क्र॒मते॑ वि॒ष्णुरे॒व भू॒त्वा यज॑मान॒ इच्छन्द्वा॑भिरि॒मान्
लो॒कान॑न॒पज॑य्यम॒भि ज॑यति वि॒ष्णोः क्र॒मो॒स्य॑भि॒माति॑हेत्याह॒ गाय॑त्री
वै पृ॒थि॒वी त्रै॒ष्टुभ॑मन्तरि॒क्षं जा॑गती द्यौ॒रानु॑ष्टुभीर्दि॒श इ॒च्छन्द्वा॑भिरेवे॒मान्
लो॒कान् य॑थापूर्वम॒भि ज॑यति प्र॒जाप॑तिर॒ग्निम॑सृजत
सोऽ॒स्मात् सृ॒ष्टः - [] 1

TS 5.2.1.2

परा॒डै॒त् तमे॒तया॑ ऽन्वैदक्र॒न्दद॑ति॒ तया॑ वै सोऽ॒ग्नेः प्रि॒यं धा॒माऽवा॑रुन्ध
यदे॒ताम॑न्वाहा-ग्नेरे॒वैत॑या प्रि॒यं धा॒माव रु॑न्ध ई॒श्वरो॑ वा ए॒ष परा॑ङ्
प्र॒दघो॑ यो वि॒ष्णुक्र॑मान् क्र॒मते॑ चत॒सृभि॑रा वर्तते च॒त्वारि॑ छन्दा॒ऽसि
छन्दा॒ऽसि॑ खलु॒ वा अ॒ग्नेः प्रि॒या त॒नूः प्रि॒यामे॒वास्य॑ त॒नुव॑म॒भि - [] 2

TS 5.2.1.3

पर्या॑वर्त॑ते दक्षि॑णा पर्या॑वर्त॑ते स्वमे॒व वीर्य॑मनु पर्या॑वर्त॑ते तस्माद्-
दक्षि॑णो ऽर्द्ध आ॒त्मनो॑ वीर्या॑वत्तरोऽथो॑ आ॒दित्यस्यै॒वाऽऽ*वृ॒तमनु॑
पर्या॑वर्त॑ते शुन॑श्शेप॒माजी॑गतिं॒ वरु॑णोऽगृ॒ह्णाथ् स ए॒तां वा॑रुणीमपश्यत्
तया॒ वै स आ॒त्मानं॑ वरु॑णपाशादमुञ्चद्-वरु॑णो वा ए॒तं गृ॒ह्णाति
य उ॒खां प्र॑तिमुञ्च॒त उदु॑त्तमं॒ वरु॑ण पाशमस्मदित्याहा-
ऽऽत्मानमेवैतया - [] 3

TS 5.2.1.4

वरु॑णपाशान् मुञ्च॒त्या त्वा॑ ऽहार्ष॒मित्याहाऽऽ ह्ये॒न॒ऽ हर॑ति
ध्रु॒वस्ति॒ष्ठा ऽवि॑चाचलिरित्याह॒ प्रति॑ष्ठित्यै॒ विश॑ स्त्वा सर्वा
वाञ्छ॒न्त्वित्याह॑ वि॒शैवैन॑ऽ सम॑र्द्धयत्यस्मिन् राष्ट्रमधि श्रयेत्याह
राष्ट्रमे॒वास्मिन्॑ ध्रु॒वम॑कर्यं का॒मये॑त राष्ट्र॑ स्यादिति॒ तं मन॑सा
ध्यायेद्-राष्ट्रमे॒व भव॑त्य - [] 4

TS 5.2.1.5

-ग्रे बृ॒हन्नु॒षसामूर्द्ध्वो॑ अ॒स्थादि॒त्याहाऽग्र॑मेवैन॑ऽ समा॒नानां॑ करोति
निर्ज॑ग्मिवान् तमस इत्याह॒ तम ए॒वास्मा॑दप॒ हन्ति॑ ज्योतिषा-
ऽऽ *गा॒दि॒त्याह॑ ज्योति॒रेवा-स्मिन्॑ दधाति चत॒सृभिः॑ सादयति च॒त्वारि॑

छन्दा॑ऽसि॒ छन्दो॑भिरेवाऽ-ति॒च्छन्द॑सोत्तमया॒ वर्ष्म॑ वा ए॒षा छन्द॑सां
 य॑दति॒च्छन्दा॑ वर्ष्मै॒वैन॑ऽ समा॒नानां॑ करोति॒ स॒द्वती॑ - [] 5

TS 5.2.1.6

भवति॑ सत्त्वमे॒वैनं॑ गमयति॒ वाथ्स॑प्रेणोप॒ तिष्ठ॑त ए॒तेन॑ वै
 व॒थ्सप्री॑र्भा॒लन्दनो॑ऽग्नेः॒ प्रियं॑ धामा॒वारुन्धा॑ग्नेरे॒वैतेन॑ प्रियं॑ धामा॒व रुन्ध॑
 एका॒दशं॑ भवत्येक॒धैव॑ यज॒माने॑ वीर्यं॑ दधाति॒ स्तोमे॑न वै दे॒वा
 अ॒स्मिन् लो॒क आ॒र्द्धनु॑वन् छन्दो॑भिरमुष्मिन्थ् स्तोम॑स्येव॒ खलु॑ वा
 ए॒तद्-रूपं॑ य॒द्-वाथ्स॑प्रं य॒द्-वाथ्स॑प्रेणोप॒तिष्ठ॑त - [] 6

TS 5.2.1.7

इ॒ममे॒व तेन॑ लो॒कम॒भि ज॑यति॒ यद्-वि॑ष्णुक्र॒मान् क्र॑मते॒ ऽमुमे॒व
 तैर्लो॒कम॒भि ज॑यति॒ पूर्वे॒द्युः प्र॑ क्रा॒मत्यु॑त्तरे॒द्यु-रुप॑ तिष्ठते॒ तस्मा॑द्-
 यो॒गेऽन्या॑सां प्र॒जानां॑ मनः॒ क्षेमे॑ऽन्यासां॒ तस्मा॑द्-या॒यावरः॑ क्षे॒म्यस्ये॑शे
 तस्मा॑द्-या॒यावरः॑ क्षे॒म्यम॑द्ध्यवस्यति॒ मुष्टी॑ करोति॒ वाचं॑ य॒च्छति॑
 य॒ज्ञस्य॑ धृ॒त्यै ॥ 7 (सृ॒ष्टौ - (1) भ्ये॑ - तया॑ - भवति॑ - स॒द्वत्यु॑ -
 प॒तिष्ठ॑ते - द्वि॒चत्वारि॑ऽश॒च्च) (A1)

TS 5.2.2.1

अ॒न्नप॒तेऽन्न॒स्य॒ नो॒ दे॒ही॒त्या॒हा-॒ग्नि॒र्वा अ॒न्नप॒तिः॒ स ए॒वास्मा॒ अन्नं॑ प्र
य॒च्छ॒त्यन॒मीव॒स्य शु॒ष्मिण॑ इ॒त्याहा॒यक्ष्म॒स्येति॑ वा॒वैत॑दाह प्र प्र॒दा॒तारं॑
ता॒रिष॑ ऊ॒र्जं नो॒ धेहि॑ द्वि॒पदे॑ चतु॒ष्पद॑ इ॒त्याहाऽऽशि॒षमे॒वैता॒मा शा॒स्त
उ॒दु त्वा वि॒श्वे दे॒वा इ॒त्याह॑ प्रा॒णा वै वि॒श्वे दे॒वाः - [] 8

TS 5.2.2.2

प्रा॒णैरे॒वैन॒मुद् य॒च्छते॑ ऽग्ने॒ भर॑न्तु चि॒त्तिभि॒रित्या॑ह यस्मा॒ ए॒वैनं॑
चि॒त्तायो॒द्यच्छ॑ते तेनै॒वैनं॑ सम॒र्द्धय॑ति चत॒सृभि॒रा सा॒दय॑ति च॒त्वारि॑
छ॒न्दाँ॒सि छ॒न्दो॒भिरे॒वा-ति॑च्छ॒न्दसो॒त्तम॑या वर्ष्म॒ वा ए॒षा छ॒न्दसां॑
य॒दति॑च्छ॒न्दा वर्ष्मे॑वैनं॑ स॒माना॑नां करोति स॒द्वती॑ भवति
स॒त्त्वमे॒वैनं॑ ग॒मय॑ति प्रे॒दग्ने॒ ज्योति॑ष्मान्. - [] 9

TS 5.2.2.3

या॒ही॒त्याह॑ ज्योति॒रेवा॒स्मिन् द॑धाति त॒नुवा॒ वा ए॒ष हि॒नस्ति॑ यं
हि॒नस्ति॑ मा हिँ॒सीस्त॒नुवा प्र॑जा इ॒त्याह॑ प्र॒जाभ्य॑ ए॒वैनं॑ श॒मय॑ति
र॒क्षाँ॒सि वा ए॒तद्-य॒ज्ञं स॑च॒न्ते य॒दन॑ उ॒त्स॒र्जत्य॑क्र॒न्ददि॒त्यन्वा॑ह
र॒क्षसा॑मप॒हत्या॑ अ॒नसा॑ वह॒न्त्यप॑चिति-मे॒वास्मिन् द॑धाति
तस्मा॑दन॒स्वी च॒ रथी॑ चा॒तिथी॑ना-म॒पचि॑त॒तमा - [] 10

TS 5.2.2.4

वप॑चि॒ति॒मा॒न् भ॒वति॑ य ए॒वं वे॒द॑ स॒मि॒धा ऽग्निं॑ दु॒व॒स्य॑ते॒ति॑
 घृ॒ता॒नु॒षि॒क्ता-म॒व॒सि॒ते स॒मि॒ध॒मा द॑धाति॒ यथा॑ ऽति॒थय॑ आ॒ग॒ताय॑
 सर्पि॑ष्व॒दा॒ति॒थ्यं क्रि॑यते॒ तादृ॑गे॒व तद्-गा॒य॒त्रि॒या ब्रा॑ह्म॒णस्य॑ गा॒य॒त्रो
 हि ब्रा॑ह्म॒णस्त्रि॒ष्टु॒भा रा॒ज॒न्य॒स्य त्रै॒ष्टु॒भो हि रा॒ज॒न्यो ऽप्सु॑ भ॒स्म
 प्र वे॑श॒यत्य॒प्सु॒यो॒नि॒र्वा अ॒ग्निः स्वामे॒वैनं॑ यो॒निं ग॑म॒यति॑ ति॒सृ॒भिः
 प्र वे॑श॒यति॑ त्रि॒वृद्-वा - [] 11

TS 5.2.2.5

अ॒ग्नि-र्या॒वाने॒वाग्नि॑स्तं॒ प्रति॑ष्ठां॒ ग॑म॒यति॑ प॒रा वा ए॒षो॑ ऽग्निं॑
 व॒पति॑ यो॒ऽप्सु॑ भ॒स्म प्र॒वे॒श॒यति॑ ज्यो॒ति॒ष्म॒ती॒भ्या-म॒व द॑धाति॒
 ज्यो॒ति॒रे॒वा॒स्मिन् द॑धाति॒ द्वा॒भ्यां॑ प्र॒ति॒ष्ठि॒त्यै प॒रा वा ए॒ष प्र॒जां प॑शून्.
 व॒पति॑ यो॒ऽप्सु॑ भ॒स्म प्र॒वे॒श॒यति॑ पु॒नरू॒र्जा स॒ह र॒य्येति॑ पु॒नरू॒दैति॑
 प्र॒जामे॒व प॑शू॒ना॒त्मन् ध॑त्ते पु॒नस्त्वा॑ ऽऽदि॒त्या - [] 12

TS 5.2.2.6

रु॒द्रा व॑स॒वः स॒मि॒न्ध॒ता-मि॒त्या॒है॒ता वा ए॒तं दे॒वता॑ अ॒ग्रे स॒मै॒न्ध॒त
 ता॒भिरे॒वैनं॑ स॒मि॒न्धे बो॒धा स॒ बो॒धी॒त्युप॑ तिष्ठते॒ बो॒ध॒य॒त्ये॒वैनं॑

तस्मात् सुप्त्वा प्रजाः प्र बुद्ध्यन्ते यथास्थानमुप तिष्ठते तस्माद्-
यथास्थानं पशवः पुनरेत्योप तिष्ठन्ते ॥ 13

(वै विश्वे देवा - ज्योतिष्मा - नपचिततमौ - त्रिवृद्धा - आदित्या
- द्विचत्वारिंशच्च) (A2)

TS 5.2.3.1

यावती वै पृथिवी तस्यै यम आधिपत्यं परीयाय यो वै यमं
देवयजनमस्या अनिर्याच्याग्निं चिनुते यमायै न
स चिनुते ऽपेतेत्यद्ध्यवसाययति यममेव देवयजनमस्यै निर्याच्या-
ऽऽत्मने ऽग्निं चिनुत इष्वग्रेण वा अस्या अनामृत-मिच्छन्तो नाविन्दन्
ते देवा एतद्-यजुरपश्यन्नपेतेति यदेतेनाद्ध्यवसाययत्य - [] 14

TS 5.2.3.2

-नामृत एवाग्निं चिनुत उद्धन्ति यदेवास्या अमेद्ध्यं तदप
हन्त्यपो ऽवोक्षति शान्त्यै सिकता नि वपत्येतद् वा अग्नेर्वैश्चानरस्य
रूपं रूपेणैव वैश्चानरमव रुन्ध ऊषान् नि वपति पुष्टिर्वा एषा
प्रजननं यदूषाः पुष्ट्यामेव प्रजनने ऽग्निं चिनुते ऽथो संज्ञान एव
संज्ञानं ह्येतत् - [] 15

TS 5.2.3.3

प॒शूनां॑ य॒दूषा॑ द्या॒वापृ॑थि॒वी स॒हाऽऽस्तां॑ ते वि॒यती॑ अ॒ब्रूता॑मस्त्वे॒व नौ॑
स॒ह य॒ज्ञिय॑मि॒ति य॒दमु॑ष्या य॒ज्ञिय॑मासीत् तद॒स्याम॑दधात् त ऊ॒षा
अ॒भवन्॑॥ यद॒स्या य॒ज्ञिय॑मासीत् तदमु॑ष्यामदधात् तदद॒ श्र॒न्द्रम॑सि
कृ॒ष्णमू॑षान् नि॒वप॑न्नदो ध्या॒येद् द्या॒वापृ॑थि॒व्योरे॒व य॒ज्ञिये॑ऽग्निं चि॒नुते॑
ऽय॑ सो अ॒ग्निरि॑ति वि॒श्वामि॑त्रस्य - [] 16

TS 5.2.3.4

सू॒क्तं भ॑वत्ये॒तेन॒ वै वि॒श्वामि॑त्रोऽग्नेः प्रि॒यं धा॑मावा॒रुन्धा॑ग्नेरे॒वैतेन॑ प्रि॒यं
धा॑माव॒ रुन्धे॑ छ॒न्दोभि॑र्वै दे॒वाः सु॒वर्गं॑ लो॒कमा॑यन् चत॒स्रः प्रा॑चीरु॒प
द॑धाति च॒त्वारि॑ छ॒न्दा॑सि छ॒न्दोभि॑रे॒व तद्-य॑ज॒मानः॑ सु॒वर्गं॑
लो॒कमे॑ति तेषां सु॒वर्गं॑ लो॒कं य॒तां दि॒शः स॑म॒व्ली॑यन्त ते द्वे
॥ पु॒रस्ता॑थ् स॒मीची॑ उपा॒दध॑त द्वे - [] 17

TS 5.2.3.5

प॒श्चाथ् स॒मीची॑ ताभि॒र्वै ते दि॒शोऽदृ॑हन् यद् द्वे पु॒रस्ता॑थ् स॒मीची॑
उ॒पद॑धाति द्वे प॒श्चाथ् स॒मीची॑ दि॒शां वि॑धृत्या अथो प॒शवो॑ वै
छ॒न्दा॑सि प॒शूने॒वास्मै॑ स॒मीचो॑ दधात्य॒ष्टावु॑प दधात्य॒ष्टाक्ष॑रा गा॒यत्री॑

गाय॒त्रो ऽग्नि॒र्यावा॒नेवा॒ग्निस्तं॑ चि॒नुते॒ ऽष्टा॒वुप॑ दधा॒त्यष्टा॒क्षरा॑ गाय॒त्री
गाय॒त्री सु॒वर्गं॑ लो॒कम॒ञ्जसा॑ वेद सु॒वर्गस्य॑ लो॒कस्य॑ - [] 18

TS 5.2.3.6

प्र॒जात्यै॑ त्रयो॒दश॑ लो॒कंपृ॒णा उप॑ दधा॒त्येक॑वि॒ंशतिः॑ सं प॒द्यन्ते॑
प्रति॒ष्ठा वा॑ एक॒विंशः॑ प्रति॒ष्ठा गा॒र्हप॑त्य एक॒विंश॑स्यैव
प्रति॒ष्ठां गा॒र्हप॑त्यम॒नु प्रति॑ तिष्ठति प्रत्य॒ग्निं चि॒क्यान् स्तिष्ठ॑ति य
एवं वे॒द पञ्च॑चि॒तीकं॑ चिन्वीत प्रथ॒मं चिन्वा॑नः पा॒ङ्क्तो य॒ज्ञः पा॒ङ्क्ताः
प॒शवो॑ य॒ज्ञमे॒व प॒शून्व रु॒न्धे त्रि॑चि॒तीकं॑ चिन्वीत द्वितीयं
चिन्वा॑न स्त्रय॒ इमे॒ लो॒का ए॒ष्वेव॑ लो॒केषु॑ - [] 19

TS 5.2.3.7

प्रति॑ तिष्ठत्येक॒चिती॑कं चिन्वीत तृतीयं चिन्वा॑न एक॒धा वै सु॒वर्गो
लो॒क एक॑वृ॒तैव॑ सु॒वर्गं॑ लो॒कमे॒ति पु॒रीषे॑णा॒भ्यूह॑ति
तस्मा॑न्मा॒सेना॑स्थि॒ छन्नं॑ न दुश्च॒र्मा भ॑वति य एवं वे॒द पञ्च॑ चि॒तयो॑
भव॑न्ति पञ्च॒भिः पु॒रीषै॑र॒भ्यूह॑ति द॒श सं प॒द्यन्ते॑ द॒शाक्ष॑रा वि॒राडन्नं॑
वि॒राड् वि॒राज्ये॑वा॒ऽन्नाद्ये॑ प्रति॑ तिष्ठति ॥ 20 (अ॒ध्यव॑साय॒यति॑ -
ह्येत॑ - द्वि॒श्वामि॑त्रस्या - दध॒त द्वे॑ - लो॒कस्य॑ - लो॒केषु॑ -
सप्त॑च॒त्वारि॑ंश॒च्च) (A3)

TS 5.2.4.1

वि॒ वा ए॒तौ द्वि॑षा॒ते यश्च॑ पु॒रा ऽग्नि॑र्यश्चो॒खाया॒ꣳ समि॑तमि॒ति च॒तसृ॑भिः
सं॒ नि व॑पति च॒त्वारि॑ छन्दा॒ꣳसि छन्दा॑ꣳसि खलु॒ वा अ॒ग्नेः प्रि॒या
त॒नूः प्रि॒ययै॑वैनौ त॒नुवा॒ सꣳ शा॑स्ति॒ समि॑तमित्याह॒ तस्मा॑द्ब्रह्म॒णा
क्ष॒त्रꣳ स॒मेति॑ यथ् स॒न्युप्य॑ वि॒हर॑ति॒ तस्मा॑द् ब्रह्म॒णा
क्ष॒त्रं व्यै॑त्यृतुभिर् - [] 21

TS 5.2.4.2

वा ए॒तं दी॑क्षयन्ति॒ स ऋ॑तुभिरे॒व वि॒मुच्यो॑ मा॒तेव॑ पु॒त्रं पृ॑थि॒वी
पु॒रीष्य॑मित्याह-तु॒भिरे॑वैनं दी॒क्षयि॑त्वर्तुभिर्वि॒ मुञ्च॑ति वैश्वान॒र्या
शि॒क्यमा॑ द॒त्ते स्व॑दयत्ये॒वैन॑-नैर्ऋ॒तीः कृ॒ष्णा-स्ति॒स्र-स्तु॑षप॒क्वा
भव॑न्ति॒ निर्ऋ॑त्यै॒ वा ए॒तद्-भा॒गधे॑यं यत् तुषा॒ निर्ऋ॑त्यै॒ रूपं॑ कृ॒ष्णाꣳ
रूपे॑णै॒व निर्ऋ॑तिं॒ निर॑वदयत॒ इमां॑ दि॒शं य॑न्त्येषा - [] 22

TS 5.2.4.3

वै निर्ऋ॑त्यै दि॒ख् स्वा॒यामे॑व दि॒शि निर्ऋ॑तिं॒ निर॑वदयते स्व॒कृत॑
इ॒रिण॑ उप॒ दधा॑ति प्र॒दरे॑ वैतद् वै निर्ऋ॑त्या आ॒यत॑नꣳ स्व ए॒वाऽऽ
य॒तने॑ निर्ऋ॑तिं॒ निर॑वदयते शि॒क्यम॑भ्युप॒ दधा॑ति नैर्ऋ॒तो वै पा॑शः
सा॒क्षादे॑वैनं॒ निर्ऋ॑तिपा॒शान्-मु॑ञ्चति॒ तिस्र॑ उप॒ दधा॑ति त्रेधा॒विहि॑तो

वै॒ पुरु॑षो या॒वाने॒व पुरु॑षस्तस्मा॒न्-निर्ऋ॑तिम॒व यज॑ते

परा॑चीरुप - [] 23

TS 5.2.4.4

दधा॑ति परा॑चीमे॒वास्मा॒न्-निर्ऋ॑तिं प्र पु॒दते ऽप्र॑तीक्ष॒मा य॑न्ति
निर्ऋ॑त्या अ॒न्तर्ऋ॑त्यै मा॒र्जयि॒त्वोप॑ तिष्ठ॒न्ते मे॒द्ध्य॒त्वाय॑
गा॒र्हप॑त्यमु॒प तिष्ठ॒न्ते निर्ऋ॑तिलो॒क ए॒व च॑रि॒त्वा पू॒ता
दे॒वलोक॑मु॒पाव॑र्तन्त॒ एक॑यो॒प तिष्ठ॑न्त॒ एक॑धै॒व यज॑माने वी॒र्यं॑ दधति
नि॒वेश॑नः स॒ङ्गम॑नो वसू॒नामि॒त्याह॑ प्र॒जा वै प॒शवो॑ वसु॒ प्रज॑यै॒वैनं॑
प॒शुभिः॑ स॒मर्द्ध॑यन्ति ॥ 24

(ऋ॒तुभि॑ - रे॒षा- परा॑चीरु॒पा - षा॑च॒त्वारि॑ञ्श॒च्च) (A4)

TS 5.2.5.1

पुरु॑षमा॒त्रेण॑ वि मि॒मीते॑ य॒ज्ञेन॑ वै पुरु॑षः सं॒मितो॑ य॒ज्ञप॑रुषै॒वैनं॑ वि
मि॒मीते॑ या॒वान् पुरु॑ष ऊ॒र्ध्वबा॑हु॒स्तावा॑न् भव॒त्येता॑वद् वै पुरु॑षे वी॒र्यं॑
वी॒र्येणै॒वैनं॑ वि मि॒मीते॑ प॒क्षी भ॑वति न ह्य॒पक्षः॑ प॒तितु॑-म॒र्हत्य॑र॒न्निना॑
प॒क्षौ द्रा॑घीया॒सौ भ॑वतस्तस्मा॒त् पक्ष॑प्र॒वया॒सि वया॑सि
व्याम॑मा॒त्रौ प॒क्षौ च॑ पु॒च्छं च॑ भव॒त्येता॑वद् वै पुरु॑षे वी॒र्यं॑ -[] 25

TS 5.2.5.2

वी॒र्य॑सं॒मितो वे॒णु॒ना वि मि॑मीत आ॒ग्ने॒यो वै वे॒णुः स॒यो॒नि॒त्वाय॑
य॒जु॒षा यु॒नक्ति॑ य॒जु॒षा कृ॑षति व्यावृ॒त्यै ष॒ङ्गवे॑न कृषति ष॒ङ् वा
ऋ॒तव॑ ऋ॒तुभि॑रे॒वैनं॑ कृषति यद् द्वा॒द॒श॒ग॒वे॒न सँव॑त्स॒रेणै॒वे यं वा
अ॒ग्ने-र॑ति॒दाहा॑द॒बिभे॑त् सै॒तद् द्वि॒गु॒णम॑पश्यत् कृ॒ष्टं चा॒कृष्टं॑
च ततो॑ वा इ॒मां ना॒त्यद॑हद्-यत् कृ॒ष्टं चा॒कृष्टं॑ च - [] 26

TS 5.2.5.3

भ॒वत्य॑स्या अ॒न॒ति॒दाहा॑य द्वि॒गु॒णं त्वा अ॒ग्नि-मु॑द्यन्तु-म॒र्ह॒तीत्या॑हु॒र्यत्
कृ॒ष्टं चा॒कृष्टं॑ च भ॒वत्य॑ग्ने॒रुद्य॑त्या ए॒ताव॑न्तो वै प॒शवो॑ द्वि॒पाद॑श्च
च॒तुष्पा॑दश्च तान् यत् प्रा॒च उ॒त्सृ॑जेद्-रु॒द्राया॑पि द॒द्ध्य॒ाद्-यद्-
दक्षि॑णा पि॒तृभ्यो॑ नि धु॒वेद्-यत् प्र॒तीचो॑ र॒क्षाँ॑सि ह॒न्यु॒रुदी॑च
उ॒त् सृ॑जत्येषा वै दे॒वम॑नु॒ष्याणाँ॑ शान्ता दिक् - [] 27

TS 5.2.5.4

तामे॒वैनान॑नू॒त् सृ॑जत्यथो ख॒ल्वि॒मां दि॒शमु॑त् सृ॑जत्यसौ वा आ॒दि॒त्यः
प्रा॒णः प्रा॒णमे॒वैनान॑नू॒त् सृ॑जति दक्षि॑णा पर्या॒वर्त॑न्ते स्वमे॒व वी॒र्य॑मनु
पर्या॒वर्त॑न्ते तस्मा॑द्-दक्षि॑णो ऽर्द्ध आ॒त्मनो॑ वी॒र्या॑व॒त्तरो॑ ऽथो

आ॒दि॒त्यस्यै॒वाऽऽवृ॒तम॒नु॒ पर्या॑वर्तन्ते तस्मात् पराञ्चः पशवो
वि तिष्ठन्ते प्रत्यञ्च आ वर्तन्ते तिस्रस्तिस्रः सीताः - [] 28

TS 5.2.5.5

कृ॒षति॑ त्रि॒वृ॒तमे॒व य॒ज्ञमु॒खे वि॑ या॒तय॑त्योषधीर्वपति ब्रह्म॒णाऽन्न॑मव रुन्धे
ऽर्के॑ ऽर्कं श्रूयते चतु॒र्दश॑भिर्वपति सप्त॒ ग्राम्या॑ ओष॒धयः॑ सप्ताऽऽर॒ण्या
उ॒भयी॑षामवरुद्ध्य अन्नस्यान्नस्य वपत्यन्नस्यान्नस्यावरुद्ध्यै कृ॒ष्टे
व॒पति॑ कृ॒ष्टे ह्योष॑धयः प्र॒तिति॑ष्ठन्त्यनुसीतं व॒पति॑ प्रजा॒त्यै द्वा॒दश॑सु
सी॒तासु॑ व॒पति॑ द्वा॒दश॑ मा॒साः सँव॑त्सरः सँव॑त्सरेणैवास्मा
अन्नं॑ प॒चति॑ यदग्नि॒चि - [] 29

TS 5.2.5.6

-द॒नव॑रुद्धस्या-इ॒जीया॑दवरुद्धेन व्यृद्ध्येत ये वनस्प॒तीनां॑
फ॒ल॒ग्र॒हय॑-स्तानि॒द्धमे॒ ऽपि॑ प्रोक्षे-द॒नव॑रुद्धस्या-वरुद्ध्यै दिग्भ्यो
लो॒ष्टान्त् सम॑स्यति दि॒शामे॒व वी॒र्य॑मवरुद्ध्य दि॒शां वी॒र्यं॑ ऽग्निं चि॒नुते॑
यं द्वि॒ष्याद्-य॒त्र स॑ स्यात् तस्यै दि॒शो लो॒ष्टमा॑ ह॒रेदि॑ष-मूर्ज॑मह॒मित
आ द॒द इ॒तीष॑मेवोर्जं तस्यै दि॒शोऽव॑ () रुन्धे क्षो॒धुको॑ भवति
यस्तस्यां दि॒शि भ॑वत्युत्तरवेदिमुप वपत्युत्तरवेद्या॒ ह्यग्नि॑श्च्रीयते ऽथो
प॒शवो॑ वा उत्तरवेदिः प॒शूने॒वाव॑ रुन्धेऽथो य॒ज्ञप॑रुषोऽनन्तरित्यै ॥ 30

(च भवत्येतावद्वै पुरुषे वीर्यं - यत्कृष्टञ्चाकृष्टञ्च - दिख्- सीता
- अग्निचि - दव - पञ्चविंशतिश्च) (A5)

TS 5.2.6.1

अग्ने॑ तव॒ श्रवो॑ वय॒ इति॑ सि॒क॒ता॒ नि॒ व॒प॒त्ये॒तद् वा॑ अ॒ग्ने॒वै॑ श्वा॒नर॑स्य॒
सू॒क्तं॑ सू॒क्ते॒नै॒व वै॑ श्वा॒नर॑म॒व रु॒न्धे ष॒ड्भि॒र्नि॒ व॒प॒ति ष॒ड् वा ऋ॒तवः॑
सँ॒व॒त्स॒रः सँ॒व॒त्स॒रो॑ऽग्नि॒वै॑ श्वा॒नरः॑ सा॒क्षा॒दे॒व वै॑ श्वा॒नर॑-म॒व रु॒न्धे
स॒मु॒द्रं॑ वै॒ नामै॑तच्छ॒न्दः॑ स॒मु॒द्रम॑नु॒ प्र॒जाः प्र॒ जा॒य॒न्ते॒ यदे॒तेन॑ सि॒क॒ता
नि॒व॒प॒ति प्र॒जा॒नां॑ प्र॒ज॒न॒ना॒येन्द्रो॑ - [] 31

TS 5.2.6.2

वृ॒त्राय॑ व॒ज्रं॑ प्रा॒हर॒थ् स त्रे॒धा व्य॑भव॒थ् स्प॒य स्तृ॑तीयं॒ रथ॑ स्तृ॑तीयं॒
यू॒प॒स्तृ॑तीयं॒ यै॑ऽन्त॒श्श॒रा अ॒शी॒र्य॒न्त ताः॑ श॒र्करा॑ अ॒भवन्
तच्छ॒र्करा॑णां॒ श॒र्कर॑त्वं॒ व॒ज्रो॒ वै श॒र्कराः॑ प॒शुर॑ग्नि-र्यच्छ॒र्करा॑भिर॒ग्निं
प॒रि॒मि॒नोति॑ व॒ज्रे॒णै॒वास्मै॑ प॒शून् परि॑ गृह्णाति॒ तस्मा॑द्-व॒ज्रे॒ण प॒शवः॑
प॒रि॒गृ॒ही॒तास्त॑स्मा॒थ् स्थे॒यान॑स्थे॒यसो॑ नो॒प ह॑रते त्रि॒स॒प्ताभिः॑
प॒शु॒का॒म॒स्य - [] 32

TS 5.2.6.3

परि॑ मि॒नुया॑त् स॒प्त वै शी॑र्ष॒ण्याः प्रा॒णाः प्रा॒णाः प॒शवः॑ प्रा॒णैरे॒वास्मै॑
 प॒शून्व रु॒न्धे त्रि॒णवा॑भि-भ्रा॒तृव्य॑वत-स्त्रि॒वृत॑मेव वज्रं॑ संभृत्य
 भ्रा॒तृव्या॑य प्र॒ हरति॑ स्तृ॒त्या अ॒परि॒मिता॑भिः परि॑ मि॒नुया-द॒परि॒मित॑स्या-
 वरु॑द्ध्यै यं का॒मये॑ताप॒शुः स्या॑दित्य॒परि॒मित्य॑ तस्य॒ शर्कराः॑ सि॒कता
 व्यू॒हेद॒परि॒गृही॑त ए॒वास्य॑ वि॒षूची॑नं॒ रेतः॑ परा॒ सिञ्च॑त्य॒पशु॑रेव
 भवति॑ - [] 33

TS 5.2.6.4

यं का॒मये॑त प॒शुमा॑न्त् स्या॑दिति॒ परि॒मित्य॑ तस्य॒ शर्कराः॑ सि॒कता
 व्यू॒हेत् परि॒गृही॑त ए॒वास्मै॑ समी॒चीनं॒ रेतः॑ सिञ्चति॒ पशु॑मानेव
 भवति॑ सौ॒म्या व्यू॒हति॑ सोमो॒ वै रेतो॑धा रेत॑ ए॒व तद्-द॑धाति॒ गाय॑त्रिया
 ॥ ब्रा॒ह्मण॑स्य॒ गाय॑त्रो हि ब्रा॒ह्मण-स्त्रि॒ष्टुभा॑ राज॒न्यस्य॑ त्रै॒ष्टुभो॑ हि राज॒न्यः
 शं॒ युं बा॒र्हस्प॑त्यं मे॒धो नो॑पा॒नम॑त् सोऽग्निं॑ प्रा॒विश॑त् - [] 34

TS 5.2.6.5

सोऽग्नेः॑ कृ॒ष्णो रू॒पं कृ॒त्वोदा॑यत सोऽश्वं॑ प्रा॒विश॑त् सोऽश्व॑स्या-
 वान्तर॑शफो-ऽभवद्-यद॑श्वमाक्रमयति॒ य ए॒व मे॒धोऽश्वं॑ प्रा॒विश॑त्
 तमे॒वाव रु॒न्धे प्र॒जाप॑तिनाऽग्निश्चे॒तव्य॑ इत्याहुः॒ प्राजा॑पत्योऽश्वो

यद॑श्च॒मा॒क्र॒म॒य॒ति॒ प्र॒जा॒प॒ति॒नै॒वा॒ऽग्निं॑ चि॒नु॒ते पु॒ष्क॒र॒पर्ण॑मु॒प द॑धाति
यो॒नि॒र्वा अ॒ग्नेः पु॒ष्क॒र॒पर्ण॑ꣳ स॒यो॒नि- () -मे॒वा॒ग्निं चि॒नु॒ते ऽपां॑
पृ॒ष्ठ॒म॒सी॒त्यु॒प द॑धात्य॒पां वा॑ ए॒तत् पृ॒ष्ठं य॑त् पु॒ष्क॒र॒पर्ण॑ꣳ
रू॒पे॒णै॒वैन॑दु॒प द॑धाति ॥ 35

(इन्द्रः - पशुकामस्य - भवत्य - विशथ - सयोनिं - विंश
तिश्च) (A6)

TS 5.2.7.1

ब्र॒ह्म ज॒ज्ञान॑मि॒ति रु॒क्म॑मु॒प द॑धाति ब्र॒ह्म॑मु॒खा वै प्र॒जा॒प॒तिः प्र॒जा
अ॒सृ॒ज॒त ब्र॒ह्म॑मु॒खा ए॒व तत् प्र॒जा य॑ज॒मानः॑ सृ॒ज॒ते ब्र॒ह्म ज॒ज्ञान॑मि॒त्याह॑
तस्मा॑द्ब्रा॒ह्म॒णो मु॒ख्यो मु॒ख्यो भ॑वति य ए॒वं वे॑द ब्र॒ह्म॒वा॒दि॒नो व॑दन्ति
न पृ॒थि॒व्यां ना॒न्तरि॑क्षे न दि॒व्य॒ग्निश्चे॒तव्य॑ इति यत् पृ॒थि॒व्यां चि॒न्वी॒त
पृ॒थि॒वीꣳ शु॒चा ऽर्प॑येन्नौष॒धयो॑ न व॒नस्प॑तयः - [] 36

TS 5.2.7.2

प्र जा॒येरन् य॑द॒न्तरि॑क्षे चि॒न्वी॒ता॒न्तरि॑क्षꣳ शु॒चाऽर्प॑येन्न व॒याꣳसि॑
प्र जा॒येरन् य॑द्-दि॒वि चि॒न्वी॒त दि॒वꣳ शु॒चा ऽर्प॑येन्न प॒र्जन्यो॑
वर्षे॑द् रु॒क्म॑मु॒प द॑धात्य॒मृतं॑ वै हि॒रण्य॑म॒मृत॑ ए॒वा॒ग्निं चि॒नु॒ते प्र॒जा॒त्यै
हि॒रण्य॑म॒यं पु॒रुष॑मु॒प द॑धाति यज॒मान॑लो॒कस्य॑ वि॒धृत्यै॑ यदिष्ट॒काया॑

आ॒तृ॒ण्णम॒नूप॒द॒ध्यात् प॒शूनां॑ च॒ यज॒मान॒स्य च॒ प्रा॒णम॒पि
द॒ध्याद् दक्षि॑णतः – [] 37

TS 5.2.7.3

प्रा॒ञ्चमु॒प द॒धाति॑ दा॒धार यज॒मान॒लो॒कं न प॒शूनां॑ च॒ यज॒मान॒स्य
च प्रा॒णम॒पि द॒धात्य॑थो ख॒ल्विष्ट॑काया आ॒तृ॒ण्णम॒नूप द॒धाति॑
प्रा॒णाना॑मु॒त्सृ॒ष्ट्यै द्र॒प्सश्च॑स्क॒न्देत्य॑भि मृ॒शति॑ हो॒त्रास्वे॑वैनं
प्र॒ति ष्ठा॒पय॑ति सु॒चावु॑प द॒धात्या॑ज्यस्य पू॒र्णा का॒र्ष्य॒र्यमयीं॑ द॒ध्नः
पू॒र्णा-मौ॑दु॒म्बरी॒मियं॑ वै का॒र्ष्य॒र्यमय्य॑सावौ-दु॒म्बरी॒मे ए॒वोप॑
ध॒त्ते – [] 38

TS 5.2.7.4

तू॒ष्णीमु॒प द॒धाति॑ न ही॒मे यजु॑षाऽऽप्तु॒मर्ह॑ति दक्षि॑णां का॒र्ष्य॒र्यमयी॑-
मु॒त्तरा॒मौ-दु॒म्बरीं॑ तस्मा॑दस्या अ॒सावु॑त्तरा ऽज्य॑स्य पू॒र्णा का॒र्ष्य॒र्यमयीं॑
व॒ज्रो वा आ॒ज्यं व॒ज्रः का॒र्ष्य॒र्यो वज्रे॑णै॒व यज्ञ॑स्य दक्षि॑णतो
रक्षा॑स्यप ह॒न्ति द॒ध्नः पू॒र्णामौ॑दु॒म्बरीं॑ प॒शवो॑ वै द॒ध्यूर्गु॑दु॒म्बरः
प॒शुष्वे॒वोर्जं॑ द॒धाति॑ पू॒र्णे उप॑ द॒धाति॑ पू॒र्णे ए॒वैन॑ – [] 39

TS 5.2.7.5

ममुष्मिन्ँलोक उप तिष्ठेते विराज्यग्निश्चेतव्य इत्याहुः स्रुग्वै
 विराड् यथ् स्रुचावुपदधाति विराज्येवाग्निं चिनुते यज्ञमुखेयज्ञमुखे
 वै क्रियमाणे यज्ञञ् रक्षाञ्सि जिघाञ्सन्ति यज्ञमुखञ् रुक्मो यद्-
 रुक्मंँव्याधारयति यज्ञमुखादेव रक्षाञ्स्यप हन्ति पञ्चभिर्
 व्याधारयति पाङ्गो यज्ञो यावानेव यज्ञस्तस्माद्-रक्षाञ्स्यप
 हन्त्यक्ष्णयाव्या धारयति तस्मादक्ष्णया () पशवोऽङ्गानि प्र हरन्ति
 प्रतिष्ठित्यै ॥ 40

(वनस्पतयो- दक्षिणतो- धत्त- एनं- तस्मादक्ष्णया-
 पञ्च च) (A7)

TS 5.2.8.1

स्वयमातृण्णामुप दधातीयंँवै स्वयमातृण्णेमामेवोप धत्ते
 ऽश्वमुप घ्रापयति प्राणमेवास्यां दधात्यथो प्राजापत्यो वा अश्वः
 प्रजापतिनैवाग्निं चिनुते प्रथमेष्टकोपधीयमाना पशूनां च
 यजमानस्य च प्राणमपि दधाति स्वयमातृण्णा भवति
 प्राणानामुत्सृष्ट्या अथो सुवर्गस्य लोकस्यानुख्यात्या
 अग्नावग्निश्चेतव्य इत्याहुरेष वा - [] 41

TS 5.2.8.2

अ॒ग्निर्वै॑श्वा॒नरो॑ यद्ब्रा॒ह्मण॑स्तस्मै॑ प्रथ॒मामिष्ट॑कां॒ यजु॑ष्कृ॒तां प्र॑ य॒च्छेत्
तां ब्रा॒ह्मण॑ श्रो॒प द॑द्ध्या॒ता-म॒ग्नावे॒व तद॑ग्निं॒ चि॒नुत॑ ई॒श्वरो॑ वा ए॒ष
आ॒र्ति॒मा॒र्तो॒र्यो-ऽवि॑द्वा॒निष्ट॑का-मु॒प॒दधा॑ति॒ त्रीन्॑ व॒रान् द॑द्यात्
त्रयो॑ वै प्रा॒णाः प्रा॒णाना॑ꣳ स्पृ॒त्यै द्वावे॒व दे॒यौ द्वौ॑ हि प्रा॒णावे॒क
ए॒व दे॒य ए॒को हि॑ प्रा॒णः प॒शुर् - [] 42

TS 5.2.8.3

वा ए॒ष यद॑ग्निर्न ख॒लु वै प॒शव॑ आ॒यव॑से रम॒न्ते दूर्वे॑ष्ट॒कामु॑प॒ दधा॑ति
प॒शूनां॑ धृ॒त्यै द्वाभ्यां॑ प्र॒तिष्ठि॑त्यै काण्डा॒त्काण्डा॑त् प्र॒रोह॑न्तीत्याह
काण्डे॑नकाण्डे॑न ह्येषा॑ प्र॒तिष्ठि॑त्ये॒वा नो॑ दूर्वे॑ प्र॒ तनु॑ स॒हस्रे॑ण श॒तेन॑
चेत्या॑ह सा॒हस्रः॑ प्र॒जाप॑तिः प्र॒जाप॑तेरा॒प्त्यै दे॒वल॑क्ष्मं॒ वै त्र्या॑लि॒खिता॑
तामु॑त्तरलक्ष्माणं॒ दे॒वा उ॒पा॒दध॑ता-ध॒रल॑क्ष्माण-म॒सुरा॑ यं - [] 43

TS 5.2.8.4

का॒मये॑त व॒सीया॑न्थ् स्यादित्यु॒त्तर॑लक्ष्माणं॒ तस्यो॑प॒ दद्ध्या॑द्-व॒सीया॑ने॒व
भ॒वति॑ यं का॒मये॑त पा॒पीया॑न्थ् स्यादित्यध॒रल॑क्ष्माणं॒ तस्यो॑प
दद्ध्या॑दसुरयो॒नि-मे॒वैन॑मनु॒ परा॑ भा॒वय॑ति पा॒पीया॑न् भ॒वति॑ त्र्या॒लि॒खिता॑

भवती॒मे वै॒ लो॒कास्त्र्या॒लिखि॒तैभ्य॒ ए॒व लो॒केभ्यो॒ भ्रातृ॒व्यम॒न्तरे॒त्यङ्गिर॑सः
सु॒वर्गं॑ लो॒कं य॑तः पु॒रोडा॑शः कू॒र्मो भू॒त्वा ऽनु॒ प्रास॑र्पद् - [] 44

TS 5.2.8.5

यत् कू॒र्ममु॒पद॑धाति यथा॑ क्षे॒त्रवि॒दञ्ज॑सा न॒यत्ये॒वमे॒वैनं॑ कू॒र्मः
सु॒वर्गं॑ लो॒कम॒ञ्जसा॑ न॒यति॑ मे॒धो वा ए॒ष प॑शूनां य॑त् कू॒र्मो यत्
कू॒र्ममु॒पद॑धाति स्वमे॒व मे॒धं प॑श्यन्तः प॒शव॑ उप॒ तिष्ठ॑न्ते श्म॒शानं॑ वा
ए॒तत् क्रि॑यते यन्मृ॒तानां॑ प॒शूनां॑ शी॒र्षाण्यु॑प॒धीय॑न्ते यज्जी॒वन्तं॑
कू॒र्ममु॒पद॑धाति तेना॒श्मशान॑चिद्-वास्त॒व्यो वा ए॒ष यत् - [] 45

TS 5.2.8.6

कू॒र्मो म॒धु वा॒ता ऋ॒ताय॑त इति॑ द॒द्ध्ना म॒धुमि॑श्रेणा॒भ्यन॑क्ति
स्वद॑यत्ये॒वैनं॑ ग्रा॒म्यं वा ए॒तद॒न्नं य॑द्-द॒द्ध्यार॑ण्यं म॒धु यद् द॑द्ध्ना
म॒धुमि॑श्रेणा-भ्य॒नक्त्यु॑भय॒स्या-व॑रु॒द्ध्यै म॒ही द्यौः पृ॑थि॒वी च न
इ॒त्याहा॑ऽऽभ्यामे॒वैनमु॑भयतः परि॑ गृ॒ह्णाति॑ प्रा॒ञ्चमु॑प॒ दधा॑ति सु॒वर्गस्य॑
लो॒कस्य॑ स॒मष्ट्यै॑ पु॒रस्ता॑त् प्र॒त्यञ्च॑मु॒प द॑धाति तस्मा॑त् - [] 46

TS 5.2.8.7

पु॒रस्ता॑त् प्र॒त्यञ्चः॑ प॒शवो॑ मे॒धमु॑प॒ तिष्ठ॑न्ते यो वा अ॒प॒नाभि॑म॒ग्निं
चि॒नुते॑ यज॒मानस्य॑ नाभि॒मनु॑ प्र॒ विश॑ति स ए॒नमी॑श्व॒रो

हि॒ऽसि॒तो-रु॒लूख॒लमु॒प द॒धात्ये॒षा वा अ॒ग्नेर्ना॒भिः स॒नाभि॒मेवा॒ग्निं
चि॒नुते ऽहि॒ऽसा॒या औ॒दुम्ब॒रं भव॒त्यूर्वा उ॒दुम्ब॒र ऊ॒र्जमे॒वाव रु॒न्धे
म॒द्ध्यत॒ उप द॒धाति म॒द्ध्यत॒ एवा॒स्मा ऊ॒र्जं द॒धाति तस्मा॑न्-()-
म॒द्ध्यत॒ ऊ॒र्जा भु॒ञ्जत॒ इय॒द्-भव॒ति प्र॒जाप॒तिना य॒ज्ञमु॒खेन
सं॒मित॒मव॒ ह॒न्त्यन्न॒मेवा॒क-वै॒ष्णव्य॒र्चोप॒ द॒धाति वि॒ष्णुर्वै य॒ज्ञो वै॒ष्णावा
व॒नस्प॒तयो य॒ज्ञ ए॒व य॒ज्ञं प्र॒ति ष्ठा॒पय॒ति ॥ 47

(ए॒ष वै - प॒शु - र्य - म॒स॒र्प - दे॒ष यत् - तस्मा॑त् - तस्मा॑त् - तस्मा॑त् -
स॒प्तवि॒ंशति॑श्च) (A8)

TS 5.2.9.1

ए॒षां वा ए॒तल्लो॒कानां॑ ज्यो॒तिः सम्भृ॑तं य॒दुखा य॒दुखा-मु॒पद॒धात्ये॒भ्य
ए॒व लो॒केभ्यो॑ ज्यो॒तिर॒व रु॒न्धे म॒द्ध्यत॒ उप द॒धाति म॒द्ध्यत॒ एवा॒स्मै
ज्यो॒तिर्द॒धाति तस्मा॑न्म॒द्ध्यतो॑ ज्यो॒तिरूपा॑ऽऽस्महे॒ सिक॑ताभिः
पू॒रय॒त्येत॒द्-वा अ॒ग्नेर्वै॒श्वान॒रस्य॑ रू॒पं रू॒पेणै॒व वै॒श्वान॒रम॒व रु॒न्धे
यं का॒मये॒त क्षो॒धुकः॑ स्या॒दित्यू॒नां तस्यो॑प - [] 48

TS 5.2.9.2

द॒द्ध्यात् क्षो॒धुक॑ ए॒व भव॒ति यं का॒मये॒ता-नु॒पद॒स्य-द॒न्नम॒द्यादि॑ति
पू॒र्णां तस्यो॑प द॒द्ध्याद॒नुप॒दस्य॑-दे॒वान्न॑म॒त्ति स॒हस्रं॑ वै प्र॒ति पु॒रुषः॑

प॒शूनां॑ य॒च्छति॑ स॒हस्र॑म॒न्ये प॒शवो॑ म॒ध्ये पु॒रुष॑शी॒र्षमु॑प दधाति
स॒वीर्य॑त्वायो॒खाया॑-म॒पि द॑धाति प्र॒तिष्ठा॑मे॒वैन॑द्-गमयति व्यृ॒द्धं वा॑
ए॒तत् प्रा॒णैर॑मे॒द्ध्यं य॑त् पु॒रुष॑शी॒र्षम॑मृतं खलु वै प्रा॒णा - [] 49

TS 5.2.9.3

अ॒मृत॑ हिरण्यं प्रा॒णेषु॑ हिरण्यश॒ल्कान् प्र॑त्यस्यति प्र॒तिष्ठा॑मे॒वैन॑द्-
गमयित्वा प्रा॒णैः स॑म॒र्द्ध्यति॑ द॒ध्ना म॑धुमिश्रेण पू॒रय॑ति
म॒धव्यो॑ ऽसानीति शृ॒तात॑ङ्क्येन मे॒द्ध्यत्वा॑य ग्रा॒म्यं वा॑ ए॒तद॑न्नं
य॒द्-द॑द्ध्यार॒ण्यं म॑धु यद् द॒ध्ना म॑धुमिश्रेण पू॒रय॑त्यु॒भय॑स्या-
व॒रुद्ध्यै॑ प॒शुशी॒र्षाण्यु॑प दधाति प॒शवो॑ वै प॒शुशी॒र्षाणि॑ प॒शूने॒वाव॑
रु॒न्धे यं॑ का॒मये॑ताप॒शुः स्या॑दिति - [] 50

TS 5.2.9.4

वि॒षूची॑नानि तस्योप द॒द्ध्यद्-वि॒षूच॑ ए॒वास्मा॑त् प॒शून् द॑धात्यप॒शुरे॒व॑
भ॒वति॑ यं का॒मये॑त प॒शुमा॑न्थ-स्यादिति स॒मीची॑नानि तस्योप
द॒द्ध्यार्थ॑ स॒मीच॑ ए॒वास्मै॑ प॒शून् द॑धाति प॒शुमा॑ने॒व भ॒वति॑ पु॒रस्ता॑त्
प्र॒तीची॑नमश्चस्योप दधाति प॒श्चात् प्रा॑चीनमृषभस्या-प॒शवो॑ वा अ॒न्ये
गो॒अश्चे॑भ्यः प॒शवो॑ गो॒अश्वा॑ने॒वास्मै॑ स॒मीचो॑ द॒धात्ये॑-ता॒वन्तो॑ वै
प॒शवो॑ - [] 51

TS 5.2.9.4

द्वि॒पादश्च॑ चतु॒ष्पादश्च॑ तान्॒ वा ए॒तद॒ग्नौ प्र॑ द॒धाति॑ यत् प॒शु॒शीर्षा॑ण्युप॒
 -द॒धात्य॑-मु॒मा॒रण्यम॑नु ते दि॒शामी॑त्याह॒ ग्राम्ये॑भ्य ए॒व प॒शुभ्य॑ आ॒रण्यान्॑
 प॒शूञ्छु॑च-म॒नू॒त्सृ॑जति तस्मा॒त् स॒माव॑त् प॒शूनां॑ प्र॒जाय॑मानाना-
 मा॒रण्याः॑ प॒शवः॑ क॒नीया॑ऽसः शु॒चा ह्य॑ताः सर्प॒शीर्ष॑मुप॒ दधाति॑ यैव
 सर्पे॑ त्विषि॒स्तामे॑वाव रुन्धे - [] 52

TS 5.2.9.5

यथ् समी॒चीनं॑ प॒शु॒शीर्षै॑-रुप॒दद्ध्य॑ाद् ग्राम्यान् प॒शून् द॑ऽशु॒काः
 स्यु॒र्यद्-वि॒षूची॑न-मा॒रण्यान्॑ यजु॒रेव॑ वदे॒दव॑ तां त्विषि॑ रुन्धे या
 सर्पे॑ न ग्राम्यान् प॒शून् हि॒नस्ति॑ नाऽऽ*र॒ण्यान॑थो खलू॒पधे॑यमे॒व
 यदु॒पद॑धाति तेन तां त्विषि॒मव॑ रुन्धे या सर्पे॑ यद्-यजु॒र्वद॑ति
 तेन॑ शान्तं ॥ 53

(ऊ॒नान्त॑स्योप॑ - प्रा॒णाः - स्या॒दिति॑ - वै प॒शवो॑ - रुन्धे -
 चतु॑श्चत्वारि॒ऽशच्च॑) (A9)

TS 5.2.10.1

प॒शुर्वा ए॒ष यद॑ग्निर्योनिः खलु॒ वा ए॒षा प॒शोर्वि॑ क्रियते यत्
 प्रा॒चीन॑मैष्ट॒काद्-यजुः॑ क्रियते॒ रेतो॑ ऽप॒स्या अप॒स्या उप॑ दधाति

यो॒नावे॒व रे॒तो द॒धाति॑ पञ्चो॒प द॒धाति॑ पा॒ङ्गाः प॒शवः॑ प॒शूने॒वास्मै॑
 प्र॒ ज॒नय॑ति पञ्च दक्षि॒णतो॑ वज्रो॒ वा अ॒पस्या॑ वज्रेणै॒व य॒ज्ञस्य॑
 दक्षि॒णतो॑ रक्षा॒स्यप॑ ह॒न्ति पञ्च॑ पश्चात् – [] 54

TS 5.2.10.2

प्राची॒रुप॑ द॒धाति॑ पश्चाद् वै प्राची॒नः रे॒तो धी॑यते पश्चादे॒वास्मै॑
 प्राची॒नः रे॒तो द॒धाति॑ पञ्च पु॒रस्ता॑त् प्रतीची॒रुप॑ द॒धाति॑ पञ्च
 पश्चात् प्राची॒स्तस्मा॑त् प्राची॒नः रे॒तो धी॑यते प्रतीचीः॑ प्र॒जा जा॑यन्ते
 पञ्चो॒त्तर॑त इ॒च्छन्द्स्याः॑ प॒शवो॑ वै छ॒न्द्स्याः॑ प॒शूने॒व प्र॒जाता॑न्थ्
 स्व-मा॒यत॑नम॒भि पर्यू॑हत इ॒यं वा अ॒ग्ने-र॑तिदाहाद॒बिभे॑त्
 सै॒ता – [] 55

TS 5.2.10.3

अ॒पस्या॑ अ॒पश्य॑त् ता उ॒पाध॑त्त ततो॒ वा इ॒मां ना॑त्यद॒हद्-य॑द॒पस्या॑
 उ॒प॒द॒धात्य॑स्या अ॒न॒तिदा॑हायोवाच हे॒य-म॑ददि॒त् स ब्र॑ह्मणाऽन्नं य॒स्यै॒ता
 उ॒प॒धी॒यान्तै॑ य उ॒ चै॒ना ए॒वं वे॒द॒दि॒ति प्रा॑णभृ॒त उ॒प द॒धाति॑ रे॒तस्ये॒व
 प्रा॒णान् द॒धाति॑ तस्माद्-व॒दन् प्रा॑णन् प॒श्यञ्छृ॑ण्वन् प॒शुर्जा॑यते
 ऽयं पु॒रो – [] 56

TS 5.2.10.4

भुव॑ इति॑ पुरस्तादुप॑ दधाति॑ प्राणमेवैताभि॑-र्दाधारायं॑ दक्षिणा
विश्व॑क॒र्मेति॑ दक्षिणतो॑ मन॑ ए॒वैताभि॑र्दाधारायं॑ पश्चाद्-विश्वव्य॑चा इति॑
पश्चा-च्चक्षु॑-रेवैताभि॑-र्दाधारेद॑-मुत्तराथ् सुव॑-रित्युत्तरतः
श्रोत्र॑मेवैताभि॑-र्दाधारेयमुपरि॑ मतिरित्युपरिष्ठाद्-वाचमेवैताभि॑-
र्दाधार॑ दशदशोप॑ दधाति॑ सवीर्य॑त्वायाक्षणयो- [] 57

TS 5.2.10.5

-प दधाति॑ तस्मादक्ष्णया॑ पशवोऽङ्गानि॑ प्र हरन्ति॑ प्रतिष्ठित्यै॑ याः
प्राची॑स्ताभि-र्वसिष्ठ॑ आर्द्ध॑नोद् या दक्षिणा॑ ताभिर्भरद्वाजो॑ याः
प्रतीची॑स्ताभि वि॒श्वामित्रो॑ या उदीची॑स्ताभि-र्जमद॑ग्निर्या
ऊर्ध्वा॑स्ताभि-र्विश्व॑कर्मा य ए॒वमेतासा॑-मृद्धिं॑ वैदर्द्ध॑नोत्येव
य आ॒सामे॒वं बन्धु॑तां वैद॑ बन्धुमान् भवति॑ य आ॒सामे॒वं क्लृप्तिं॑
वैद॑ कल्पते - [] 58

TS 5.2.10.6

ऽस्मै॑ य आ॒सामे॒वमाय॑तनं॑ वैदाऽऽ॒यत॑नवान् भवति॑ य आ॒सामे॒वं
प्रतिष्ठां॑ वैद॑ प्रत्येव॑ तिष्ठति॑ प्राणभृ॑त उप॒धाय॑ सँय॑त उप॑ दधाति॑
प्रा॒णाने॒वास्मिन् धि॒त्वा सँय॑द्भिः सं यँच्छति॑ तथ् सँय॑ताञ्

सँयत्त्वमथो प्राण ए॒वा॒पा॒नं दधाति॑ तस्मात् प्रा॒णा॒पा॒नौ सं च॒रतो॑
विषू॒चीरु॒प दधाति॑ तस्माद्-विष्वञ्चौ प्रा॒णा॒पा॒नौ यद् वा
अ॒ग्ने॒रसँय॑त - [] 59

TS 5.2.10.7

-मसु॒वर्ग्य॑मस्य॒ तथ् सु॒वर्ग्यो॑ऽग्निर्यथ् सँय॑त उप दधाति॑ समे॒वैनं॑
यच्छति॑ सु॒वर्ग्य॑मे॒वाक-स्त्र्य॑विर्वयः कृत-मया॑ना-मि॒त्याह॑
वयो॑भिरे॒वाया॑नव रुन्धे॒ ऽयैर्वया॑ऽसि सर्वतो॑ वा॒युमती॑र्भवन्ति
तस्मादय॑ऽ सर्वतः॑ पवते ॥ 60 (पश्चा - दे॒ताः - पु॒रौ - ऽक्ष॒णया॑ -
कल्प॑ते - ऽसं यँतं - पञ्च॑त्रि॒ंशच्च॑) (A10)

TS 5.2.11.1

गा॒य॒त्री त्रि॒ष्टुब् जग॑त्यनु॒ष्टुक् पङ्क्त्या॑ सह ।
बृ॒ह॒त्यु॒ष्णिहा॑ ककुथ् सू॒चीभिः॑ शि॒म्यन्तु॑ त्वा ॥
द्वि॒पदा॑ या चतु॒ष्पदा॑ त्रि॒पदा॑ याच षट्पदा॑ ।
सछ॑न्दा या च वि॒च्छन्दाः॑ सू॒चीभिः॑ शि॒म्यन्तु॑ त्वा ॥
महा॑नाम्नी रे॒वतयो॑ वि॒श्वा आ॒शाः प्र॒सूव॑रीः ।
मे॒घ्या वि॒द्युतो॑ वाचः सू॒चीभिः॑ शि॒म्यन्तु॑ त्वा ॥
रज॑ता हरि॒णीः सी॒सा यु॒जो यु॒ज्यन्ते॑ कर्मभिः॑ ।

अ॒श्वस्य॑ वा॒जिन॑स्त्व॒चि सू॒चीभिः॑ शि॒म्यन्तु॑ त्वा ॥

नारी॑ – [] 61

TS 5.2.11.2

–स्ते॑ प॒त्नयो॑ लो॒म वि चि॑न्वन्तु मनी॒षया॑ ।

दे॒वानां॑ प॒त्नीर्दि॑शः सू॒चीभिः॑ शि॒म्यन्तु॑ त्वा ॥

कु॒विद॑ङ्ग॒ यव॑मन्तो॒ यवं चि॑द् यथा॒ दान्त्य॑नुपूर्वं॒ वियू॑य ।

इ॒हे॒हैषां॑ कृ॒णुत॑ भो॒जनानि॑ ये ब॒र्हिषो॑ नमो॒वृक्तिं॑ न ज॒ग्मुः ॥ 62

(नारी॑ – स्त्रि॒ंशच्च॑) (A11)

TS 5.2.12.1

क स्त्वा॑ च्छ॒यति॑ क स्त्वा॒ वि शा॑स्ति॒ क स्ते॑ गा॒त्राणि॑ शि॒म्यति॑ ।

क उ॑ ते श॒मिता॑ क॒विः ॥

ऋ॒तव॑ स्त ऋ॒तुधा॑ प॒रुः श॒मितारो॑ वि शा॒सतु॑ ।

सँ॒व॒थ्स॒रस्य॑ धा॒यसा॑ शिमी॒भिः शि॒म्यन्तु॑ त्वा ॥

दै॒व्या अ॒ध्व॒र्यव॑स्त्वा च्छ॒यन्तु॑ वि च॑ शा॒सतु॑ ।

गा॒त्राणि॑ प॒र्व॒शस्ते॑ शि॒माः कृ॒ण्वन्तु॑ शि॒म्यन्तः॑ ॥

अ॒र्द्ध॒मा॒साः प॒रू॒षि ते॑ मा॒सा इ॒च्छन्तु॑ शि॒म्यन्तः॑ ।

अ॒हो॒रा॒त्राणि॑ म॒रुतो॑ वि॒लिष्ट॑ – [] 63

TS 5.2.12.2

सू॒दयन्तु ते ॥

पृ॒थि॒वी ते ऽन्तरि॑क्षेण वा॒यु रि॒च्छ॒द्रं भि॑षज्यतु ।

द्यौ॒ स्ते नक्ष॑त्रैः सह रू॒पं कृ॑णोतु साधु॒या ॥

शं ते प॒रे॒भ्यो गा॒त्रे॒भ्यः श॒मस्त्व॑वरेभ्यः ।

श॒म॒स्थ॒भ्यो म॒ज्ज॒भ्यः श॒मु ते त॒नु॒वे भु॑वत् ॥ 64

(विलि॑ष्टं - त्रि॒॒श॒च्च॑) (A12)

Prasna Korvai with starting Padams of 1 to 12 Anuvaakams :-

(विष्णुमुखा - अन्नपते - यावती - वि वै - पुरुषमात्रेणा -
ग्ने तव श्रवो वयो - ब्रह्म जज्ञान७ - स्वयमातृण्णा - मेषां वै -
पशु - गायत्री - कस्त्वा - द्वादश)

Korvai with starting Padams of 1, 11, 21 Series of Panchaatis :-

(विष्णुमुखा - अपचितिमान् - वि वा एता - वग्ने तव -
स्वयमातृण्णां - विषूचीनानि - गायत्री - चतुष्षष्टिः)

First and Last Padam of Second Prasnam of 5th Kandam

(विष्णुमुखा - स्तनुवे भुवत्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.3 पञ्चमकाण्डे तृतीयः प्रश्नः – चितीनां निरूपणं

TS 5.3.1.1

उ॒थ्स॒न्नय॒ज्ञो वा ए॒ष यद॒ग्निः किं वा॑ऽहै॒तस्य॑ क्रि॒यते किं वा॑ न
यद्-वै य॒ज्ञस्य॑ क्रि॒यमा॑णस्या-न्त॒र्यन्ति॑ पू॒यति॑ वा अ॒स्य तदा॑श्चिनीरुप॑
दधा॒त्यश्चि॒नौ वै दे॒वानां॑ भिष॒जौ ताभ्या॑मेवास्मै भेष॒जं करो॑ति पञ्चोप॑
दधा॒ति पा॒ङ्क्तो य॒ज्ञो यावा॑नेव य॒ज्ञस्तस्मै॑ भेष॒जं करो॑त्यृत॒व्या उप॑
दधा॒त्यृतू॑नां क्लृ॒प्त्यै - [] 1

TS 5.3.1.2

पञ्चोप॑ दधा॒ति पञ्च॑ वा ऋ॒तवो॑ यावन्त॑ ए॒वर्त॑वस्तान् कल्प॒यति॑
समा॒नप्र॑भृतयो भवन्ति॑ समा॒नोद॑र्कास्तस्मा॒त् समा॒ना ऋ॒तव॑ ए॒केन॑
पदे॒न व्या॑वर्तन्ते तस्मा॒द्-ऋ॒तवो॑ व्या॒वर्त॑न्ते प्रा॒णभृ॑त उप॑ दधा॒त्यृतु॑ष्वेव
प्रा॒णान् दधा॒ति तस्मा॒त् समा॒नाः सन्त॑ ऋ॒तवो॑ न जी॒र्यन्त्य॑थो
प्र॒ जन॑यत्ये॒वैना॒नेष॒ वै वा॒युर्य॑त् प्रा॒णो यद्-ऋ॒तव्या॑ उप॒धाय॑
प्रा॒णभृ॑त - [] 2

TS 5.3.1.3

उप॒दधा॑ति तस्मा॒त् सर्वा॑नृ॒तून् वा॒युरा व॑रीव॒र्त्तिवृ॑ष्टि॒सनी॒रुप॑ दधाति
वृ॒ष्टिमे॒वाव रु॒न्धे यदे॑क॒धोप॑द॒ध्या-दे॑क॒मृतुं व॑र्षे॒दनु॑परि॒हारः
साद॑यति तस्मा॒त् सर्वा॑नृ॒तून् व॑र्षति यत् प्रा॒णभृ॑त उप॒धाय
वृ॒ष्टिस॑नी॒रुप॑दधाति तस्मा॒द्-वा॒युप्र॑च्युता दि॒वो वृ॑ष्टि॒रीर्ते प॑शवो
वै व॒यस्या॑ ना॒नाम॑नसः खलु॒ वै प॑शवो ना॒नाव॑रतास्ते ऽप॒ ए॒वाभि
स॒मन॑सो - [] 3

TS 5.3.1.4

यं का॒मये॑ताप॒शुः स्या॑दि॒ति व॒यस्या॑स्त॒स्यो-प॑धायाप॒स्या उप॑
द॒ध्याद॑सं॒ज्ञान॑मे॒वास्मै॑ प॒शुभिः॑ करोत्यप॒शुरे॒व भ॑वति यं का॒मये॑त
प॒शुमा॑न्त्-स्या॒दित्य॑-प॒स्यास्त॒स्योप॑धाय व॒यस्या॑ उप॑ द॒ध्यात्
सं॒ज्ञान॑मे॒वास्मै॑ प॒शुभिः॑ करोति प॒शुमा॑ने॒व भ॑वति चत॒स्रः पु॒रस्ता॑दुप॑
दधा॑ति तस्मा॒च्च॒त्वारि॑ चक्षु॒षो रू॒पाणि॑ द्वे शु॒क्ले द्वे कृ॒ष्णे - [] 4

TS 5.3.1.5

मूर्द्ध॑न्वती॒र्भव॑न्ति तस्मा॒त् पु॒रस्ता॑न्मूर्द्धा पञ्च दक्षि॑णाया॒ श्रो॒ण्यामु॑प
दधा॑ति पञ्चो॒त्तर॑स्यां तस्मा॒त् प॒श्चाद्-व॑र्षी॒यान् पु॒रस्ता॑त्प्रवणः
प॒शुर्ब॑स्तो व॒य इति॑ दक्षि॒णेऽस॑ उप॑ दधाति वृ॒ष्णिर्व॑य इत्यु॒त्तरे

ऽ॒सावे॒व प्रति॑ दधाति॑ व्याघ्रो॑ वय॑ इति॑ दक्षिणे॑ पक्ष॑ उप॑ दधाति॑
 सि॒हो वय॑ इत्यु॒त्तरे॑ पक्षयो॒रेव॑ वीर्यं॑ दधाति॑ पुरुषो॑ वय॑ इति॑ ()
 मद्ध्ये॑ तस्मात् पुरुषः॑ पशूनामधिपतिः॑ ॥ 5

(क्लृ॒प्त्या - उप॒धाय॑ प्राणभृ॒तः-सम॑नसः-कृ॒ष्णे-पुरु॑षो वय॑ इति -
 पञ्च॑ च) (A1)

TS 5.3.2.1

इन्द्रा॒ग्नी अव्य॑थमानामिति॑ स्वयमा॒तृण्णामु॑प दधातीन्द्रा॒ग्निभ्यां॑
 वा॑ इमौ॒ लोकौ॑ वि॒धृता॑वनयो॒-लो॒कयो॑-वि॒धृत्या॑ अ॒धृते॒व वा ए॒षा
 यन्म॑द्ध्यमा॒ चित्ति॑रन्तरिक्षमिव॑ वा ए॒षेन्द्रा॒ग्नी इत्या॑हेन्द्रा॒ग्नी वै
 दे॒वाना॑-मो॒जोभृ॑ता-वो॒जसै॑वैना॒-मन्त॑रिक्षे चिनुते॒ धृत्यै॑
 स्वयमा॒तृण्णामु॑प दधात्यन्तरिक्षं॑ वा॒ स्वयमा॒तृण्णा ऽन्त॑रिक्षमे॒वोप॑
 धत्ते॑ ऽश्वमु॒प - [] 6

TS 5.3.2.2

घ्रापयति॑ प्राणमे॒वास्यां॑ दधात्यथो॑ प्राजापत्यो॑ वा अश्वः॑
 प्रजा॑पतिनै॒वाग्निं॑ चिनुते॒ स्वयमा॒तृण्णा भ॑वति प्राणानामु॒त्सृष्ट्या॑
 अथो॑ सु॒वर्गस्य॑ लो॒कस्यानु॑ख्यात्यै दे॒वानां॑ वा॒ सु॒वर्गं लो॒कं
 य॒तां दि॒शः सम॑व्लीयन्त॒ त ए॒ता दि॒श्या अप॑श्यन् ता उपादधत॑

ताभिर्वै ते दि॒शोऽदृ॒हन्॒ यद्दि॒श्या उप॒दधा॑ति दि॒शां वि॒धृत्यै॑ द॒श
प्राण॑भृतः पु॒रस्ता॑दुप - [] 7

TS 5.3.2.3

दधा॑ति न॒व वै पु॒रुषे॑ प्रा॒णा नाभि॑र्द॒शमी॑ प्रा॒णाने॑व पु॒रस्ता॑द्-ध॒त्ते
तस्मा॑त् पु॒रस्ता॑त् प्रा॒णा ज्योति॑ष्मती-मु॒त्तमा॑मुप दधा॑ति तस्मा॑त्
प्रा॒णानां॑ वाग्ज्योति॑रु॒त्तमा॑ द॒शोप॑ दधा॑ति द॒शाक्ष॑रा वि॒राड् वि॒राट्
छ॒न्दसां॑ ज्योति॑र्ज्योति॒रेव॑ पु॒रस्ता॑द्-ध॒त्ते तस्मा॑त् पु॒रस्ता॑ज्ज्योति॒रुपा॑
ऽऽ*स्महे॑ छ॒न्दा॒सि प॒शुष्व॑जि॒मयु॑स्तान् बृ॒हत्यु॑द॒जय॑त्
तस्मा॑द्-बा॒र्हताः॑ - [] 8

TS 5.3.2.4

प॒शव॑ उच्यन्ते मा छ॒न्द इति॑ दक्षि॒णत॑ उप॒ दधा॑ति तस्मा॑द्
दक्षि॑णावृ॒तो मा॒साः पृथि॑वी छ॒न्द इति॑ पश्चा॒त् प्रति॑ष्ठित्या
अ॒ग्निर्दे॒वते॑त्यु॒त्तर॑त ओ॒जो वा अ॒ग्निरो॒ज ए॒वोत्त॑रतो ध॒त्ते
तस्मा॑दु॒त्तर॑तोऽभि॒प्रया॑यी ज॒यति॑ षट्त्रि॒ंशथ् सं प॑द्यन्ते
षट्त्रि॒ंशद॑क्षरा बृ॒हती॑ बा॒र्हताः॑ प॒शवो॑ बृ॒हत्यै॑वास्मै प॒शून॑व रु॒न्धे
बृ॒हती॑ छ॒न्दसा॑ स्वा॒राज्यं॑ प॒रीया॑य यस्यै॒ता - [] 9

TS 5.3.2.5

उप॒धी॒यन्ते॒ गच्छ॑ति॒ स्वारा॑ज्य॒ꣳ सप्त॑ वा॒लखि॑ल्याः पु॒रस्ता॑दुप॒
दधा॑ति सप्त॒ पश्चा॑त् सप्त॒ वै शी॑र्ष॒ण्याः प्रा॑णा द्वा॒ववाञ्चौ॑ प्रा॒णाना॑ꣳ
सवी॑र्य॒त्वाय॑ मूर्द्धाऽसि॒ राडि॑ति पु॒रस्ता॑दुप॒ दधा॑ति यन्त्री॒ राडि॑ति
पश्चा॑त् प्रा॒णाने॒वास्मै॑ समी॒चो दधा॑ति ॥ 10

(अ॒श्वमु॒प-पु॒रस्ता॑दु॒प-बा॒र्हता॑-ए॒ता-श्व॑तु॒स्त्रि॒ꣳश॑च्च) (A2)

TS 5.3.3.1

दे॒वा वै यद्-य॒ज्ञे ऽकु॑र्वत॒ तदसु॑रा अकुर्वत॒ ते दे॒वा ए॒ता
अ॒क्ष्णया॑स्तोमीया॒ अप॑श्यन् ता अ॒न्यथा॑ ऽनू॒च्या-न्य॑थोपा॒दध॑त तदसु॑रा
ना॒न्ववा॑यन् ततो॑ दे॒वा अ॒भवन्॑ परा॒ ऽसु॑रा यद॒क्ष्णया॑स्तोमीया॒ अन्य॑था
ऽनू॒च्यान्य॑थोपा॒दधा॑ति भ्रातृ॒व्याभि॑भू॒त्यै भव॑त्या॒त्मना॒ परा॑ ऽस्य॒ भ्रातृ॑व्यो
भव॑त्या-शु॒स्त्रिवृ॑दिति पु॒रस्ता॑दुप॒ दधा॑ति य॒ज्ञमु॒खं वै त्रि॒वृद्- [] 11

TS 5.3.3.2

य॒ज्ञमु॒खमे॒व पु॒रस्ता॑द्-वि या॒तय॑ति व्यो॒म सप्त॑दश इति दक्षि॒णतो॑
ऽन्नं॑ वै व्यो॒माऽन्न॑ꣳ सप्त॑दशोऽन्नमे॒व दक्षि॑णतो॒ धत्ते॑ तस्माद्-
दक्षि॑णेना॒न्नम॑द्यते धरु॒ण एक॑वि॒ꣳश इति॑ पश्चा॑त् प्र॒तिष्ठा॑ वा
एक॑वि॒ꣳशः प्र॒तिष्ठि॑त्यै भान्तः पञ्च॑दश इत्यु॒त्तर॑त ओजो॒ वै भान्त॑

ओजः पञ्चदश ओज एवोत्तरतो धत्ते तस्मादुत्तरतोऽभिप्रयायी
जयति प्रतूर्तिरष्टादश इति पुरस्ता- [] 12

TS 5.3.3.3

-दुप दधाति द्वौ त्रिवृतावभिपूर्वं यज्ञमुखे वि यातयत्यभिवर्तः
सवि॒श इति दक्षिणतो ऽन्नं वा अभिवर्तो ऽन्नं सवि॒शो ऽन्नमेव
दक्षिणतो धत्ते तस्माद्-दक्षिणेनान्नमद्यते वर्चो॑ द्वावि॒श इति
पश्चाद्-यद्-वि॒शतिर्द्वे तेन विराजौ यद् द्वे प्रतिष्ठा तेन विराजोरेवा-
भिपूर्वमन्नाद्ये प्रति तिष्ठति तपो नवदश इत्युत्तरत स्तस्मात्

सव्यो-[] 13

TS 5.3.3.4

हस्तयोस्तपस्वितरो योनिश्चतुर्वि॒श इति पुरस्तादुप दधाति
चतुर्वि॒शत्यक्षरा गायत्री गायत्री यज्ञमुखं यज्ञमुखमेव पुरस्ताद्-
वि यातयति गर्भाः पञ्चवि॒श इति दक्षिणतो ऽन्नं वै गर्भा अन्नं
पञ्चवि॒शो ऽन्नमेव दक्षिणतो धत्ते तस्माद् दक्षिणेनान्नमद्यत
ओजस्त्रिणव इति पश्चादिमे वै लोकास्त्रिणव एष्वेव लोकेषु
प्रति तिष्ठति संभरणस्त्रयोवि॒श इत्यु - [] 14

TS 5.3.3.5

–तरतस्तस्मात् सव्यो हस्तयोः सम्भार्यतरः क्रतुरेकत्रिंश इति
 पुरस्तादुप दधाति वाग्वै क्रतुर्यज्ञमुखं वाग्यज्ञमुखमेव पुरस्ताद्-वि
 यातयति ब्रध्नस्य विष्टपं चतुस्त्रिंश इति दक्षिणतोऽसौ वा
 आदित्यो ब्रध्नस्य विष्टपं ब्रह्मवर्चसमेव दक्षिणतो धत्ते तस्माद्
 दक्षिणोऽर्द्धो ब्रह्मवर्चसितरः प्रतिष्ठा त्रयस्त्रिंश इति पश्चात्
 प्रतिष्ठित्यै नाकः षट्त्रिंश इत्युत्तरतः सुवर्गो वै () लोको नाकः
 सुवर्गस्य लोकस्य समष्ट्यै ॥ 15

(वै त्रिवृ – दिति पुरस्तात् – सव्य – स्त्रयोविंश इति – सुवर्गो
 वै – पञ्च च) (A3)

Special Korvai for Anuvaakam 3

आशु – व्योम – धरुणो – भान्तः – प्रतूर्तिर – भिवर्तो – वर्च –
 स्तपो – योनि – गर्भा – ओजः – संभरणः – क्रतु – ब्रध्नस्य
 – प्रतिष्ठा – नाकः – षोडश)

TS 5.3.4.1

अग्नेर्भागोऽसीति पुरस्तादुप दधाति यज्ञमुखं वा अग्निर्यज्ञमुखं
 दीक्षा यज्ञमुखं ब्रह्म यज्ञमुखं त्रिवृद्-यज्ञमुखमेव पुरस्ताद्-वि

या॒तय॑ति नृ॒चक्ष॑सां भा॒गोऽसी॑ति दक्षि॒णतः॑ शु॒श्रु॒वाँ॒सो वै
 नृ॒चक्ष॑सो ऽन्नं॑ धा॒ता जा॒तायै॑वास्मा अन्नमपि दधाति
 तस्मा॒ज्जातोऽन्न॑मत्ति ज॒नित्र॑ँ स्पृ॒तँ स॒प्तद॒शः स्तोम॑ इत्या॒हाऽन्नं॑
 वै ज॒नित्र॑- [] 16

TS 5.3.4.2

-मन्न॑ँ स॒प्तद॒शो ऽन्न॑मेव दक्षि॒णतो॑ ध॒त्ते तस्मा॑द् दक्षि॒णेना॑-
 न्नम॑द्यते मि॒त्रस्य॑ भा॒गो ऽसी॑ति प॒श्चात् प्रा॒णो वै मि॒त्रो ऽपा॒नो वरु॑णः
 प्रा॒णापा॒नावे॒वास्मिन्॑ दधाति दि॒वो वृ॑ष्टि॒र्वाताः॑ स्पृ॒ता एक॑वि॒ंशः स्तोम॑
 इत्या॒ह प्र॒तिष्ठा॑ वा एक॑वि॒ंशः प्र॒तिष्ठि॑त्या इन्द्र॒स्य भा॒गो ऽसी॑त्युत्तर॒त
 ओजो॑ वा इन्द्र॒ ओजो॑ विष्णु॒रोजः॑ क्ष॒त्रमो॑जः पञ्चद॒श - [] 17

TS 5.3.4.3

ओज॑ ए॒वोत्तर॑तो ध॒त्ते तस्मा॑-दुत्तर॑तोऽभि॒प्रया॑यी ज॒यति॑ वसू॒नां
 भा॒गोऽसी॑ति पु॒रस्ता॑दुप॑ दधाति य॒ज्ञमु॒खं वै वस॑वो य॒ज्ञमु॒खँ रु॒द्रा
 य॒ज्ञमु॒खं च॑तुर्वि॒ंशो य॒ज्ञमु॒खमे॒व पु॒रस्ता॑द्-वि या॒तय॑त्यादि॒त्यानां॑
 भा॒गोऽसी॑ति दक्षि॒णतो॑ ऽन्नं॑ वा आ॒दित्या॑ अन्नं॑ मरु॒तो ऽन्नं॑ गर्भा॑ अन्नं॑
 पञ्च॑वि॒ंशो ऽन्न॑मेव दक्षि॒णतो॑ ध॒त्ते तस्मा॑द् दक्षि॒णेना॑ ऽन्नम॑द्यते
 ऽदि॒त्यै भा॒गो- [] 18

TS 5.3.4.4

ऽसीति पश्चात् प्रतिष्ठा वा अदितिः प्रतिष्ठा पूषा प्रतिष्ठा त्रिणवः
 प्रतिष्ठित्यै देवस्य सवितुर्भागोऽसीत्युत्तरतो ब्रह्म वै देवः सविता ब्रह्म
 बृहस्पतिर्ब्रह्म चतुष्टोमो ब्रह्मवर्चसमेवोत्तरतो धत्ते तस्मादुत्तरो ऽर्द्धो
 ब्रह्मवर्चसितरः सावित्रवती भवति प्रसूत्यै तस्माद् ब्राह्मणानामुदीची
 सनिः प्रसूता धर्त्रश्चतुष्टोम इति पुरस्तादुप दधाति यज्ञमुखं वै

धर्त्रो - [] 19

TS 5.3.4.5

यज्ञमुखं चतुष्टोमो यज्ञमुखमेव पुरस्ताद्-वि यातयति यावानां
 भागोऽसीति दक्षिणतो मासा वै यावा अर्द्धमासा अयावा-स्तस्माद्-
 दक्षिणावृतो मासा अन्नं वै यावा अन्नं प्रजा अन्नमेव दक्षिणतो धत्ते
 तस्माद् दक्षिणेना-न्नमद्यत ऋभूणां भागोऽसीति पश्चात् प्रतिष्ठित्यै
 विवर्तो ऽष्टाचत्वारिंश इत्युत्तरतोऽनयोर्लोकयोः सवीर्यत्वाय
 तस्मादिमौ लोकौ समावद्वीर्यौ - [] 20

TS 5.3.4.6

यस्य मुख्यवतीः पुरस्तादुपधीयन्ते मुख्य एव भवत्याऽस्य मुख्यो
 जायते यस्या-न्नवती-र्दक्षिणतो-ऽत्यन्नमाऽस्यान्नादो जायते यस्य

प्रतिष्ठावतीः पश्चात् प्रत्येव तिष्ठति यस्यौजस्वतीरुत्तरत ओजस्व्येव
भवत्याऽस्यौजस्वी जायते ऽर्को वा एष यदग्निस्तस्यैतदेव
स्तोत्रमेतच्छस्त्रं यदेषा विधा - [] 21

TS 5.3.4.7

विधीयतेऽर्क एव तद्वर्क्यमनु विधीयते ऽत्यन्नमा ऽस्यान्नादो
जायते यस्यैषा विधा विधीयते य उ चैनामेवं वेद सृष्टीरुप दधाति
यथासृष्टमेवाव रुन्धे न वा इदं दिवा न नक्तमासीदव्यावृत्तं ते देवा
एता व्युष्टीरपश्यन् ता उपादधत ततो वा इदं () व्यौच्छद्-
यस्यैता उपधीयन्ते व्येवास्मा उच्छत्यथो तम एवाप हते ॥ 22

(वै जनित्रं - पञ्चदशो - ऽदित्यै भागो - वै धर्त्रः -
समावद्ध्यौ - विधा - ततो वा इदं - चतुर्दश च) (A4)

Special Korvai for Anuvaakam 4

(अग्ने - नृचक्षसां - जनित्रं - मित्र - स्येन्द्रस्य - वसूना -
मादित्याना - मदित्यै - देवस्य सवितुः - सावित्रवती - धर्त्रो -
यावाना - मृभूणां - विवर्त - श्वतुर्दश)

TS 5.3.5.1

अग्ने॑ जा॒तान् प्र णु॑दा नः स॒प॒त्नानि॑ति पु॒रस्ता॑दुप॒ दधा॑ति जा॒ताने॒व
 भ्रातृ॑व्यान् प्र णु॑दते स॒हसा॑ जा॒तानि॑ति प॒श्चाज्ज॑निष्यमा॒णाने॒व प्रति॑ नुदते
 चतु॑श्चत्वारि॒ंशः स्तोम॑ इति दक्षिणतो ब्र॒ह्मव॑र्चसं वै चतु॑श्चत्वारि॒ंशो
 ब्र॒ह्मव॑र्चसमे॒व दक्षि॑णतो ध॒त्ते तस्मा॑द् दक्षि॒णो ऽर्द्धो॑ ब्र॒ह्मव॑र्चसि॒तरः
 षोड॑शः स्तोम॑ इत्युत्तरत ओजो वै षोड॑श ओज ए॒वोत्तर॑तो ध॒त्ते
 तस्मा॑ – [] 23

TS 5.3.5.2

दुत्तर॑तोऽभि॒प्रया॑यी जयति वज्रो वै चतु॑श्चत्वारि॒ंशो वज्रः॑ षोड॑शो
 यदे॒ते इष्ट॑के उप॒दधा॑ति जा॒ताञ्चै॒व ज॑निष्यमा॒णाञ्च॑ भ्रातृ॑व्यान्
 प्र॒णुद्य॑ वज्रमनु प्र हरति स्तृत्यै॒ पुरी॑षवतीं म॒द्ध्य उप॑ दधाति पुरी॒षं
 वै म॒द्ध्यमा॑त्मनः सा॒त्मान॑मे॒वाग्निं॑ चिनुते सा॒त्माऽमुष्मिन्॑ लो॒के
 भव॑ति य ए॒वं वैदै॒ता वा अ॑स॒पत्ना॑ नामेष्टका यस्यै॒ता
 उप॑धीयन्ते – [] 24

TS 5.3.5.3

नास्य॑ स॒पत्नो॑ भवति प॒शुर्वा ए॑ष यदग्निर्वि॒राज॑ उत्तमायां चित्यामुप॑
 दधा॑ति वि॒राज॑मे॒वोत्त॑मां प॒शुषु॑ दधाति तस्मात् प॒शुमा॑नुत्त॒मां वाचं॑

ँवदति दशदशोप दधाति सवीर्यत्वायाऽक्ष्णयोप दधाति तस्मादक्ष्णया
पशवोऽङ्गानि प्र हरन्ति प्रतिष्ठित्यै यानि वै छन्दाँसि सुवर्ग्याण्यासन्
तैर्देवाः सुवर्गं लोकमायन् तेनर्षयो – [] 25

TS 5.3.5.4

ऽश्राम्यन् ते तपोऽतप्यन्त तानि तपसा ऽपश्यन् तेभ्य एता इष्टका
निरमिमतेवश्छन्दो वरिवश्छन्द इति ता उपादधत ताभिर्वै ते सुवर्गं
लोकमायन्. यदेता इष्टका उपदधाति यान्येव छन्दाँसि सुवर्ग्याणि
तैरेव यजमानः सुवर्गं लोकमेति यज्ञेन वै प्रजापतिः

प्रजा असृजत ताः स्तोमभागैरेवासृजत यथ् – [] 26

TS 5.3.5.5

स्तोमभागा उपदधाति प्रजा एव तद्-यजमानः सृजते बृहस्पतिर्वा
एतद्-यज्ञस्य तेजः समभरद्-यथ् स्तोमभागा यथ् स्तोमभागा
उपदधाति सतेजसमेवाग्निं चिनुते बृहस्पतिर्वा एतां यज्ञस्य
प्रतिष्ठामपश्यद्-यथ् स्तोमभागा यथ् स्तोमभागा उपदधाति यज्ञस्य
प्रतिष्ठित्यै सप्तसप्तोप दधाति सवीर्यत्वाय

तिस्रो मध्ये प्रतिष्ठित्यै ॥ 27 (उत्तरतो धत्ते तस्मा – दुपधीयन्त –
ऋषयो – ऽसृजत यत् – त्रिचत्वारिंशच्च) (A5)

TS 5.3.6.1

र॒श्मि॒रि॒त्ये॒वाऽऽदि॒त्यम॑सृ॒जत॑ प्रेति॒रिति॑ ध॒र्मम॑न्वि॒तिरिति॑ दि॒वः॑
स॒न्धि॒रि॒त्यन्त॑रि॒क्षं प्रति॑धि-रि॒ति पृ॒थि॒वीं वि॑ष्ट॒म्भ इति॑ वृ॒ष्टिं
प्र॒वेत्य॑हर॒नुवे॑ति रा॒त्रिमु॑शि॒गिति॑ व॒सून् प्र॑के॒त इति॑ रु॒द्रान्त्
सु॒दी॒तिरि॒त्यादि॒त्यानो॑ज इति॑ पि॒तृऽस्त॑न्तु॒रिति॑ प्र॒जाः पृ॑त॒नाषा॑डि॒ति
प॒शून् रे॒वदि॒त्यो-ष॑धी॒रभि॑जि॒दसि॑ यु॒क्तग्रा॑वे - [] 28

TS 5.3.6.2

-न्द्रा॒य त्वे॒न्द्रं जि॒न्वेत्ये॒व दक्षि॑णतो व॒ज्रं पर्यो॑ह॒दभि॑जि॒त्यै ताः प्र॑जा
अ॒पप्रा॑णा अ॒सृज॑त तास्व॒धिप॑ति॒रसी॒त्येव॑ प्रा॒णम॑दधाद्-य॒न्तेत्य॑पा॒नः॑
सऽस॑र्प इति॑ चक्षु॒र्वयो॑धा इति॑ श्रो॒त्रं ताः प्र॑जाः प्रा॒णती॑रपा॒नतीः
प॒श्यन्तीः॑ शृ॒ण्वती॑र्न मि॒थुनी॑ अ॒भवन्॑ तासु॑ त्रि॒वृद॑सी॒त्येव
मि॒थुन॑म॒दधा॑त् ताः प्र॒जा मि॒थुनी॑ - [] 29

TS 5.3.6.3

भ॒वन्ती॑र्न प्रा॒जाय॑न्त ताः सऽरो॒हो ऽसि॑ नी॒रोहो॑ऽसी॒त्येव॑ प्रा॒जन॑यत्
ताः प्र॒जाः प्र॒जाता॑ न प्र॒त्यति॑ष्ठन् ता व॒सुको॑ऽसि॑ वेष॒श्रिर॑सि
व॒स्यष्टि॑रसी॒त्येवैषु॑ लो॒केषु॑ प्र॒त्यस्था॑पयद्-यदा॒ह व॒सुको॑ ऽसि॑
वेष॒श्रिर॑सि व॒स्यष्टि॑रसी॒ति प्र॒जा ए॒व प्र॒जाता॑ ए॒षु लो॒केषु॑ प्रति॑ ष्ठापयति॑

सा॒त्माऽन्तरि॑क्षं () रो॒हति॑ स॒प्रा॒णोऽमु॑ष्मिन् लो॒के प्र॑ति
तिष्ठ॑त्यव्य॒र्द्धु॒कः प्रा॑णा॒पाना॑भ्यां भव॑ति य ए॒वं वे॑द ॥ 30

(यु॒क्त॒ग्रा॒वा - प्र॒जा मि॒थु॒न्य - न्तरि॑क्षं - द्वा॒दश॑ च) (A6)

TS 5.3.7.1

ना॒कस॒द्भिर्वै॑ दे॒वाः सु॒वर्गं॑ लो॒कमा॑यन् तन्ना॒कस॒दां ना॒कस॒त्त्वं
य॒न्ना॒कस॒द उप॑दधाति ना॒कस॒द्भिरे॒व तद्-य॑ज॒मानः॑ सु॒वर्गं॑ लो॒कमे॑ति
सु॒वर्गो॑ वै लो॒को ना॒को यस्यै॒ता उप॑धी॒यन्ते॑ ना॒स्मा अ॒कं भव॑ति
यज॑माना॒यत॑नं वै ना॒कस॒दो य॒न्ना॒कस॒द उप॑दधा॒त्याय॑त॒नमे॒व
तद्-य॑ज॒मानः॑ कुरु॒ते पृ॒ष्ठानां॑ वा ए॒तत् तेजः॑ संभृ॒तं य॒न्ना॒कस॒दो
य॒न्ना॒कस॒द - [] 31

TS 5.3.7.2

उप॑दधाति पृ॒ष्ठाना॑मे॒व तेजो॑ऽव रु॒न्धे पञ्च॑चो॒डा उप॑ दधा॒त्यप्सर॑सं
ए॒वैन॑मे॒ता भू॒ता अ॒मुष्मिन्॑ लो॒क उप॑ शे॒रेऽथो॑ त॒नूपानी॑रे॒वैता॑
यज॑मानस्य यं द्वि॒ष्यात् तमु॑प॒दधद्-ध्या॑येदे॒ताभ्य॑ ए॒वैनं॑ दे॒वता॑भ्य
आ वृ॑श्चति ताजगा॒र्तिमा॑र्च्छत्यु॒त्तरा॑ ना॒कस॒द्भ्य उप॑ दधाति यथा
जा॒यामा॑नी॒य गृ॒हेषु॑ निषा॒दय॑ति तादृ॒गे॒व तत् - [] 32

TS 5.3.7.3

पश्चात् प्राचीमुत्तमामुप दधाति तस्मात् पश्चात् प्राची पत्यन्वास्ते
 स्वयमातृण्णां च विकर्णीं चोत्तमे उप दधाति प्राणो वै
 स्वयमातृण्णाऽऽयुर्विकर्णी प्राणं चैवाऽऽयुश्च प्राणानामुत्तमौ धत्ते
 तस्मात् प्राणश्चाऽऽयुश्च प्राणानामुत्तमौ नान्यामुत्तरामिष्टकामुप
 दद्ध्याद्-यदन्यामुत्तरा-मिष्टका-मुपदद्ध्यात् पशूनां - [] 33

TS 5.3.7.4

च यजमानस्य च प्राणं चाऽऽयुश्चापि दद्ध्यात् तस्मान्ना-
 न्योत्तरेष्टकोपधेया स्वयमातृण्णामुप दधात्यसौ वै स्वयमातृण्णा-
 ऽमूमेवोप धत्ते ऽश्वमुप घ्रापयति प्राणमेवास्यां दधात्यथो प्राजापत्यो
 वा अश्वः प्रजापतिनैवाग्निं चिनुते स्वयमातृण्णा भवति
 प्राणानामुत्सृष्ट्या अथो सुवर्गस्य लोकस्यानुख्यात्या एषा वै ()
 देवानां विक्रान्तिर्यद्-विकर्णी यद्-विकर्णीमुपदधाति देवानामेव
 विक्रान्तिमनु वि क्रमत उत्तरत उप दधाति तस्मा-दुत्तरतउपचारो
 ऽग्निर्वायुमती भवति समिद्ध्यै ॥ 34

(संभृतं यन्नाकसदो यन्नाकसद - स्तत् - पशूना-मेषा वै-
 द्वाविंशतिश्च) (A7)

TS 5.3.8.1

छन्दा॑ऽस्युप॑ दधाति॑ प॒शवो॑ वै छन्दा॑ऽसि प॒शूने॒वाव॑ रुन्धे
 छन्दा॑ऽसि वै दे॒वानां॑ वामं॑ प॒शवो॑ वाममे॒व प॒शून॑व रुन्ध
 ए॒ताऽह॑ वै य॒ज्ञसे॑न-श्रै॒त्रिया॑यण-श्रि॒तिं वि॑दां च॒कार॑ तया॒ वै
 स प॒शून॑वारुन्ध॒ यदे॒तामु॑प॒दधा॑ति प॒शूने॒वाव॑ रुन्धे गाय॒त्रीः
 पु॒रस्ता॑दुप॑ दधाति॑ ते॒जो वै गाय॑त्री ते॒ज ए॒व - [] 35

TS 5.3.8.2

मु॒खतो॑ ध॒त्ते मूर्द्ध॑न्वती॒र्भव॑न्ति मूर्द्धा॑नमे॒वैन॑ऽसमा॒नानां॑ करोति
 त्रि॒ष्टुभ॑ उप॑ दधातीन्द्रि॒यं वै त्रि॒ष्टुगिन्द्रि॑यमे॒व म॑द्ध्यतो॒ धत्ते॑ जगती॒रुप॑
 दधाति॑ जा॒गता॑ वै प॒शवः॑ प॒शूने॒वाव॑ रुन्धे ऽनु॒ष्टुभ॑ उप॑ दधाति॑ प्रा॒णा
 वा अ॒नुष्टु॑प् प्रा॒णाना॑मु॒त्सृष्ट्यै॑ बृ॒हती॑रु॒ष्णिहाः॑ प॒ङ्कीर॑क्षरप॒ङ्कीरि॑ति
 वि॒षुरू॑पाणि॒ छन्दा॑ऽस्युप॑ दधाति॑ वि॒षुरू॑पा वै
 प॒शवः॑ प॒शवः॑ - [] 36

TS 5.3.8.3

छन्दा॑ऽसि वि॒षुरू॑पाने॒व प॒शून॑व रुन्धे वि॒षुरू॑पमस्य॑ गृ॒हे
 दृ॒श्यते॑ यस्यै॒ता उप॑धी॒यन्ते॑ य उ॒ चैना॑ ए॒वं वै॑दाति॒च्छन्द॑समु॒प
 दधा॑त्यति॒च्छन्दा॑ वै सर्वा॑णि॒ छन्दा॑ऽसि॒ सर्वे॑भिरे॒वैनं॑ छन्दो॒भिश्चि॑नुते

व॒र्ष्म वा ए॒षा छ॒न्दसां॑ य॒दति॑च्छ॒न्दा य॒दति॑च्छ॒न्दस॑-मु॒प॒द॒धाति॑
व॒र्ष्मै॒वैन॑ꣳ स॒माना॑नां॒ करो॑ति द्वि॒प॒दा उप॑ द॒धाति॑ द्वि॒पाद्-य॑ज॒मानः॑
() प्र॒ति॒ष्ठि॒त्यै ॥ 37

(ते॒ज ए॒व - प॒शवः॑ प॒शवो॑ - य॒ज॒मान॑ - ए॒कञ्च॑) (A8)

TS 5.3.9.1

स॒र्वा॒भ्यो वै दे॒वता॑भ्यो ऽग्नि॒श्ची॒यते॑ यथ् स॒युजो॑ नो॒प॒द॒द्ध्याद् दे॒वता॑
अ॒स्याग्निं॑ वृ॒ज्जीर॑न्. यथ् स॒युज॑ उप॒द॒धा॒त्यात्म॑नै॒वैन॑ꣳ स॒युजं॑ चि॒नुते॑
ना॒ग्निना॑ व्यृ॒द्ध्यते॑ ऽथो यथा पु॒रुषः॑ स्ना॒व॒भिः स॑न्तत
ए॒वमे॒वैता॑भि॒र॒ग्निः स॑न्ततो ऽग्नि॒ना वै दे॒वाः सु॒वर्गं॑ लो॒कमा॑यन् ता
अ॒मूः कृ॒त्तिका॑ अ॒भवन्. य॒स्यैता॑ उप॒धी॒यन्ते॑ सु॒वर्गमे॒व - [] 38

TS 5.3.9.2

लो॒कमे॒ति ग॑च्छति प्र॒का॒शं चि॒त्रमे॒व भ॑वति मण्ड॒लेष्ट॑का उप॑ द॒धाती॑मे
वै लो॒का मण्ड॑लेष्ट॒का इ॒मे ख॒लु वै लो॒का दे॒वपु॒रा दे॒वपु॒रा ए॒व प्र
वि॒शति॑ नाऽऽ*र्ति॒माच्छ॑त्यग्निं चि॒क्या॒नो वि॒श्वज्यो॑तिष उप॑
द॒धाती॑माने॒वैता॑भि॒र्लो॒कान् ज्यो॑तिष्म॒तः कुरु॑तेऽथो प्रा॒णाने॒वैता॑
य॒ज॒मान॑स्य दा॒ध्रत्ये॒ता वै दे॒वताः॑ सु॒वर्ग्या॑स्ता ए॒वा- ()
-न्वा॒र॒भ्य सु॒वर्गं॑ लो॒कमे॒ति ॥ 39

(सुवर्गमेव – ता एव – चत्वारि च) (A9)

TS 5.3.10.1

वृष्टिसनीरुप दधाति वृष्टिमेवाव रुन्धे यदेकधोपदद्ध्यादेकमृतुं
 वर्षेदनुपरिहारं सादयति तस्मात् सर्वानृतून् वर्षति पुरोवातसनि-
 रसीत्याहैतद्-वै वृष्ट्यै रूपं रूपेणैव वृष्टिमव रुन्धे सँयानीभिर्वै देवा
 इमान् लोकान्थ समयुस्तथ सँयानीनां सँयानित्वं यथ
 सँयानीरुपदधाति यथाऽप्सु नावा सँयात्येव – [] 40

TS 5.3.10.2

-मेवैताभि र्यजमान इमान् लोकान्थ सं याति प्लवो वा एषोऽग्नेर्यथ
 सँयानीर्यथ सँयानीरुपदधाति प्लवमेवैतमग्नय उप दधात्युत
 यस्यैतासूपहितास्वापो ऽग्निं हरन्त्यहत एवास्या-ग्निरादित्येष्टका
 उप दधात्यादित्या वा एतं भूत्यै प्रति नुदन्ते यो ऽलं भूत्यै सन् भूतिं
 न प्राप्नोत्यादित्या – [] 41

TS 5.3.10.3

एवैनं भूतिं गमयन्त्यसौ वा एतस्याऽऽदित्यो रुचमा दत्ते यो ऽग्निं
 चित्वा न रोचते यदादित्येष्टका उपदधात्यसावे-वास्मिन्नादित्यो रुचं
 दधाति यथाऽसौ देवानां रोचत एवमेवैष मनुष्याणां रोचते

घृ॒ते॒ष्ट॒का॒ उप॑ द॒धा॒त्ये॒तद्वा॑ अ॒ग्नेः॑ प्रि॒यं धाम॑ यद्-घृ॒तं प्रि॒येणै॒वैनं॑
धा॒म्ना॒ सम॑र्द्धयत्य - [] 42

TS 5.3.11.1

-थो॑ तेजसा॑ ऽनु॒परि॒हार॑ꣳ सादय॑-त्य॒परि॒वर्ग॑-मे॒वास्मिन्॑ तेजो॑ दधाति
प्र॒जाप॑तिर॒ग्निम॑चिनुत॒ स यश॑सा॒ व्या॑र्द्धयत॒ स ए॒ता यशो॑दा॒ अप॑श्यत्
ता उपा॑धत्त॒ ताभि॑र्वै स॒ यश॑ आ॒त्मन्न॑धत्त॒ यद्-यशो॑दा॒ उप॑दधाति॒ यश॑
ए॒व ताभि॑र्यज॒मान॑ आ॒त्मन् ध॑त्ते पञ्चो॒प द॑धाति॒ पाङ्कः॑ पु॒रुषो॑
यावा॑ने॒व पु॒रुष॑स्तस्मिन्. यशो॑ दधाति ॥ 43

(ए॒वं - प्रा॒प्नो॒त्यादि॑त्या - अ॒र्द्धय॑त्ये - का॒न्न प॑ञ्चा॒शच्च॑) (A10)

TS 5.3.11.1

दे॒वा॒सु॒राः सँ॑य॒न्ता आ॑सन् कनी॒याꣳसो॑ दे॒वा आ॑सन् भू॒याꣳसो॑-
ऽसु॒रास्ते॑ दे॒वा ए॒ता इ॒ष्टका॑ अप॑श्यन् ता उपा॑दधत॒ भूय॑स्कृ॒दसी॑त्ये॒व
भू॒याꣳसो॑ ऽभ॒वन् वन॑स्पति॒भि-रोष॑धी॒भि-र्व॑रि॒वस्कृ॑दसी॒ती-मा॑मजयन्
प्रा॒च्यसी॑ति प्रा॒चीं दि॑शमजयन्नु॒र्द्ध्वा ऽसी॑त्यमूमजयन्-
नन्त॑रि॒क्षस॑दस्यन्त॒रि॒क्षे सी॑देत्य-न्त॒रि॒क्षम॑जयन् ततो॑ दे॒वा
अ॒भ॒वन् - [] 44

TS 5.3.11.2

परा ऽसुरा यस्यैता उपधीयन्ते भूयानेव भवत्यभीमान् लोकान् जयति
 भवत्यात्मना परा ऽस्य भ्रातृव्यो भवत्यप्सुषदसि श्येनसदसीत्याहैतद्
 वा अग्ने रूपं रूपेणैवाग्निमव रुन्धे पृथिव्यास्त्वा द्रविणे
 सादयामी-त्याहे मानेवैताभि-लोकान् द्रविणावतः कुरुत आयुष्या उप
 दधात्यायुरेवा - [] 45

TS 5.3.11.3

-स्मिन् दधात्यग्ने यत्ते परं हन्नामेत्याहैतद्वा अग्नेः प्रियं धाम
 प्रियमेवास्य धामोपाऽऽ*प्नोति तावेहि स रभावहा इत्याह व्यैवैनेन
 परि धत्ते पाञ्चजन्येष्वप्येद्ध्यग्न इत्याहैष वा अग्निः पाञ्चजन्यो यः
 पञ्चचितीक-स्तस्मादेवमाहर्तव्या उप () दधात्येतद्-वा ऋतूनां
 प्रियं धाम यदृतव्या ऋतूनामेव प्रियं धामाव रुन्धे सुमेक इत्याह
 सँवथ्सरो वै सुमेकः सँवथ्सरस्यैव प्रियं धामोपाऽऽ*प्नोति ॥ 46

(अभव - नायुरेव - तव्या उप - षड्विंशतिश्च) (A11)

TS 5.3.12.1

प्रजापतेरक्ष्यश्चयत् तत् परा ऽपतत् तदश्नो ऽभवद्-यदश्चयत्
 तदश्नस्याश्चत्वं तद्-देवा अश्नमेधेनैव प्रत्यदधुरेष वै प्रजापतिं सर्वं

करोति योऽश्वमेधेन यजते सर्व एव भवति सर्वस्य वा एषा
प्रायश्चित्तिः सर्वस्य भेषजं सर्वं वा एतेन पाप्मानं देवा अतरन्नपि
वा एतेन ब्रह्महत्यामतरन्त् सर्वं पाप्मानं – [] 47

TS 5.3.12.2

तरति तरति ब्रह्महत्यां योऽश्वमेधेन यजते य उ चैनमेवं वेदोत्तरं वै
तत् प्रजापतेरक्ष्यश्चयत् तस्मादश्वस्योत्तरतोऽव द्यन्ति दक्षिणतोऽन्येषां
पशूनां वैतसः कटो भवत्यप्सुयोनिर्वा अश्वोऽप्सुजो वैतसः स्व
एवैनं योनौ प्रति ष्ठापयति चतुष्टोमः स्तोमो भवति सरङ्गु वा अश्वस्य
सक्थ्या ऽवृहत् () तद्-देवाश्चतुष्टोमेनैव प्रत्यदधुर्यच्चतुष्टोमः स्तोमो
भवत्यश्वस्य सर्वत्वाय ॥ 48

(सर्वम् पाप्मानं – अवृहद् – द्वादश च) (A12)

=====

पञ्चमकाण्डे तृतीयः प्रश्नः

Prasna Korvai with starting Padams of 1 to 12 Anuvaakams :-

(उ॒थ्स॒न्नय॒ज्ञ - इन्द्रा॑ग्नी - दे॒वा वा अ॒क्ष॒णया॑स्तोमीया -
अ॒ग्नेर्भा॑गो - ऽस्य॑ग्ने जा॒तान् - रश्मि॑रिति - ना॒कस॒द्भिः -
छन्दा॑ऽसि - सर्वा॑भ्यो - वृ॒ष्टिस॒नी - दे॒वासु॒राः क॒नीया॑ऽसः -
प्र॒जाप॑तेर॒क्षि - द्वा॑द॒श)

Korvai with starting Padams of 1, 11, 21 Series of PanchaatIs :-

(उ॒थ्स॒न्नय॒ज्ञो - दे॒वा वै - यस्य॑ मु॒ख्यव॑ती - ना॒कस॒द्भिरे -
वै ता॑भिर - षा॒चत्वा॑रि॒शत्)

First and Last Padam of Third Prasnam of 5th Kandam

(उ॒थ्स॒न्नय॒ज्ञः - सर्व॑त्वाय)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे तृतीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.4 पञ्चमकाण्डे चतुर्थः प्रश्नः – इष्टकात्रयाभिधानं

TS 5.4.1.1

दे॒वा॒सु॒राः सँ॒य॒त्ता आ॒सन् ते न व्य॑जयन्त स ए॒ता इन्द्र॑स्तनूरपश्यत्
ता उ॒पा॒ध॒त्ता ताभि॑र्वै स तनु॒वमिन्द्रि॑यं वी॒र्य॑मात्मन्नधत्त ततो दे॒वा
अ॒भवन् परा ऽसु॒रा यदिन्द्र॑तनूरुपदधाति तनु॒वमे॒व ताभि॑रिन्द्रि॒यं वी॒र्यं
य॑जमान आ॒त्मन् ध॒त्ते ऽथो॒ सेन्द्र॑मे॒वाग्नि॑ स॒तनुं चि॑नुते भव॒त्यात्म॑ना
॥
परा॑ऽस्य भ्रातृ॒व्यो – [] 1

TS 5.4.1.2

भव॑ति य॒ज्ञो दे॒वेभ्यो॑ ऽपा॒क्राम॑त् तम॒वरु॑धं नाश॒क्नुव॑न्त ए॒ता
य॒ज्ञत॑नूरपश्यन् ता उ॒पा॒द॒धत्ता ताभि॑र्वै ते य॒ज्ञम॑वा॒रुन्ध॑त् यद्-
य॒ज्ञत॑नूरुपदधाति य॒ज्ञमे॒व ताभि॑र्य॒जमा॑नोऽव रुन्धे
त्रय॑स्त्रि॒ंश॒तमु॑प दधाति त्रय॑स्त्रि॒ंश॒द्-वै दे॒वता॑ दे॒वता॑ ए॒वाव रु॑न्धे
ऽथो॒ सा॒त्मान॑मे॒वाग्नि॑ स॒तनुं चि॑नुते सा॒त्माऽमु॑ष्मिन् लो॒के – [] 2

TS 5.4.1.3

भवति॑ य॒ एवं॑ वै॒द ज्योति॑ष्मतीरु॒प दधा॑ति ज्योति॑रेवास्मिन्
दधा॑त्येताभि॒र्वा अ॒ग्निश्चि॑तो ज्वलति॑ ताभि॑रेवैन॒ꣳ समि॑न्ध उ॒भयो॑रस्मै
लो॒कयो॑ज्योति॑र्भवति॑ नक्ष॒त्रेष्ट॑का उप॒ दधा॑त्येतानि॑ वै दि॒वो ज्योती॑ꣳषि
तान्ये॒वाव रु॒न्धे सु॒कृतां॑ वा ए॒तानि॑ ज्योती॑ꣳषि यन्नक्ष॑त्राणि
तान्ये॒वाऽऽ*प्नो॑त्यथो॒ अनू॑काशमे॒वैतानि॑ - [] 3

TS 5.4.1.4

ज्योती॑ꣳषि कुरु॑ते सु॒वर्गस्य॑ लो॒कस्यानु॑ख्यात्यै यथ् सꣳस्पृ॑ष्टा
उप॒दद्ध्याद्-वृ॑ष्ट्यै लो॒कमपि॑ दद्ध्यादव॑र्षुकः॒ पर्जन्यः॑
स्यादसꣳस्पृ॑ष्टा उप॒ दधा॑ति वृ॑ष्ट्या ए॒व लो॒कं करो॑ति व॑र्षुकः
पर्जन्यो॑ भवति॑ पु॒रस्ता॑दन्याः प्र॒तीची॑रुप॒ दधा॑ति पश्चा॑दन्याः
प्रा॒चीस्त॑स्मात् प्रा॒चीनानि॑ च प्र॒तीची॑नानि॑ च नक्ष॑त्राण्या॒ वर्तन्ते ॥ 4

(भ्रातृ॑व्यो - लो॒क - ए॒वैतान्ये॑ - क॒चत्वारि॑ꣳशच्च) (A1)

TS 5.4.2.1

ऋ॒तव्या॑ उप॒ दधा॑त्यृतू॒नां क्लृ॑प्त्यै॒ द्वन्द्व॑मुप॒ दधा॑ति तस्मा॑द् द्वन्द्व॑मृतवो
ऽधृ॑तेव वा ए॒षा यन्म॑द्ध्यमा॒ चितिर॑न्तरि॒क्षमि॑व वा ए॒षा द्वन्द्व॑मन्यासु
चिती॑षूप॒ दधा॑ति च॒तस्रो॑ म॒ध्ये धृ॑त्या अ॒न्तःश्ले॑षणं॒ वा

ए॒ताश्चि॒तीनां॑ य॒दृत॒व्या य॒दृत॒व्या उ॒प॒द॒धा॒ति चि॒तीनां॑ वि॒धृत्या॑
अ॒व॒का॒म॒नू॒प द॒धा॒त्ये॒षा वा अ॒ग्ने॒र्यो॒निः स॒यो॒नि - [] 5

TS 5.4.2.2

-मे॒वा॒ग्निं चि॒नु॒त उ॒वाच॑ ह वि॒श्वा॒मि॒त्रो ऽद॒दि॒त् स ब्र॒ह्म॒णा ऽन्नं॑
य॒स्यै॒ता उ॒प॒धी॒यान्तै॑ य उ॒ चै॒ना ए॒वं वे॒द॒दि॒ति सँव॑त्स॒रो वा ए॒तं
प्र॒ति॒ष्ठा॒यै नु॒द॒ते यो॑ ऽग्निं॑ चि॒त्वा न प्र॒ति॒ति॒ष्ठ॒ति पञ्च॑ पूर्वा॒श्चि॒त॒यो
भ॒व॒न्त्य॒थ ष॒ष्ठीं चि॒तिं चि॒नु॒ते ष॒ड् वा ऋ॒त॒वः सँव॑त्स॒र ऋ॒तु॒ष्वे॒व
सँव॑त्स॒रे प्र॒ति॒ति॒ष्ठ॒त्ये ता वा - [] 6

TS 5.4.2.3

अ॒धि॒प॒त्नी॒र्ना॒मे॒ष्ट॒का य॒स्यै॒ता उ॒प॒धी॒यन्ते॑ ऽधि॒प॒ति॒रे॒व स॒मा॒ना॒नां भ॒व॒ति
यं द्वि॒ष्या॒त् तमु॒प॒द॒धद् ध्या॒ये॒दे॒ताभ्य॑ ए॒वैनं॑ दे॒व॒ता॒भ्य आ वृ॑श्च॒ति
ता॒ज॒गा॒र्ति॒मा॒र्च्छ॒त्यङ्गि॑र॒सः सु॒व॒र्गं लो॒कं य॒न्तो॒ या य॒ज्ञ॒स्य
निष्कृ॑ति॒रासी॒त् ता॒मृ॒षि॒भ्यः प्र॒त्यौ॒हन् तद्वि॑रण्य॒मभ॒वद्-यद्वि॑रण्य॒श॒ल्कैः
प्रो॒क्ष॒ति य॒ज्ञ॒स्य निष्कृ॑त्या अ॒थो भे॒ष॒ज॒मे॒वा॒स्मै क॒रो॒त्य - [] 7

TS 5.4.2.4

-थो रू॒पे॒णै॒वैनं॑ सम॒र्द्ध॒य॒त्यथो॑ हि॒र॒ण्य॒ज्यो॒ति॒षै॒व सु॒व॒र्गं लो॒कमे॑ति
सा॒ह॒स्र॒व॒ता प्रो॒क्ष॒ति सा॒ह॒स्रः प्र॒जा॒प॒तिः प्र॒जा॒प॒ते॒रा॒प्त्या इ॒मा मे॑

अ॒ग्न इ॒ष्टका॑ धे॒नवः॑ स॒न्त्वित्या॑ह धे॒नूरे॒वैनाः॑ कुरु॒ते ता ए॒नं का॒मदु॒घा
अ॒मु॒त्रामु॒ष्मिन् लो॒क उप॑ तिष्ठन्ते ॥ 8

(स॒यो॒नि – मे॒ता वै – क॒रोत्ये – का॒न्नच॑त्वा॒रि॒ञ्शच्च॑) (A2)

TS 5.4.3.1

रु॒द्रो वा ए॒ष यद॒ग्निः स ए॒तर्हि॑ जा॒तो यर्हि॑ स॒र्वश्चि॒तः स यथा॑
व॒त्सो जा॒तः स्तनं॑ प्रे॒प्सत्ये॒वं वा ए॒ष ए॒तर्हि॑ भा॒गधे॒यं प्रे॒प्सति॑
तस्मै॑ यदाहु॒तिं न जुहु॒याद॑ध्व॒र्युं च यज॑मानं च ध्यायेच्छत॒रु॒द्रीयं॑
जुहो॑ति भा॒गधे॒येनै॒वैन॑ञ् शमयति नाऽऽ*र्ति॒माच्छ॑त्य॒ध्वर्यु॑र्न
यज॑मानो यद् ग्रा॒म्याणां॑ प॒शूनां॑ – [] 9

TS 5.4.3.2

पय॑सा जुहु॒याद् ग्रा॒म्यान् प॒शूञ्छु॒चा ऽर्प॑येद्-यदा॒र॒ण्यानां॑-मा॒र॒ण्यान्
ज॒र्तिल॑यवाग्वा वा जुहु॒याद् ग॒वीधु॑कयवाग्वा वा न ग्रा॒म्यान् प॒शून्.
हि॒नस्ति॑ नाऽऽ*र॒ण्यान॑थो ख॒ल्वाहु॒रनाहु॒तिर्वै ज॒र्तिला॑श्च
ग॒वीधु॑का-श्चेत्यजक्षी॒रेण॑ जुहोत्याग्नेयी वा ए॒षा यद॑जा ऽहु॒त्यैव॑
जुहो॑ति न ग्रा॒म्यान् प॒शून्. हि॒नस्ति॑ नाऽऽर॒ण्यान॑ङ्गिर॒सः सु॒वर्गं लो॒कं
य॒न्तो- [] 10

TS 5.4.3.3

–ऽजायां घर्मं प्रासिञ्चन्थ् सा शोचन्ती पर्णं परा ऽजिहीत
सौ(१)ऽर्को ऽभवत् तदर्कस्यार्कत्वमर्कपर्णेन जुहोति सयोनित्वायोदङ्
तिष्ठन् जुहोत्येषा वै रुद्रस्य दिग् स्वायामेव दिशि रुद्रं निरवदयते
चरमायामिष्टकायां जुहोत्यन्तत एव रुद्रं निरवदयते त्रेधाविभक्तं
जुहोति त्रय इमे लोका इमानेव लोकान्थ् समावद्ध्यान् करोतीत्यग्रे
जुहोत्य – [] 11

TS 5.4.3.4

–थेयत्यथेयति त्रय इमे लोका एभ्य एवैनं लोकेभ्यः शमयति तिस्र
उत्तरा आहुतीर्जुहोति षट् थ्सं पद्यन्ते षड् वा ऋतव ऋतुभिरेवैनं
शमयति यदनुपरिक्रामं जुहुयादन्तरवचारिणं रुद्रं कुर्यादथो
खल्वाहुः कस्यां वा ऽह दिशि रुद्रः कस्यां वैत्यनुपरिक्राममेव
होतव्यमपरिवर्गमेवैनं शमयत्ये – [] 12

TS 5.4.3.5

–ता वै देवताः सुवर्गा या उत्तमास्ता यजमानं वाचयति
ताभिरेवैनं सुवर्गं लोकं गमयति यं द्विष्यात् तस्य सञ्चरे पशूनां
न्यस्येद् यः प्रथमः पशुरभितिष्ठति स आर्तिमाच्छति ॥ 13

(प॒शूनां॑ – य॒न्तो – ऽग्ने॑ जु॒होत्य॑ – परि॒वर्ग॑मे॒वैन॑श्च॒ शम॑यति –
त्रि॑श्च॒) (A3)

TS 5.4.4.1

अ॒श्मन्न॑ूर्जमि॒ति परि॑ षिञ्च॒ति मा॒र्जय॑त्ये॒वैन॑मथो॒ तर्प॑यत्ये॒व स ए॑नं
तृ॒प्तो ऽक्षु॑द्ध्य-न्न॒शोच॑-न्न॒मुष्मिन्॑ लो॒क उप॑ तिष्ठ॒ते तृ॒प्यति॑ प्र॒जया॑
प॒शुभि॑र्य॒ एवं वे॑द तां न इ॒षमूर्जं॑ धत्त॒ मरु॑तः स॒र्राणा॑ इत्या॒हान्नं॑
वा ऊ॒र्गन्नं॑ म॒रुतो॑ऽन्नमे॒वाव रु॒न्धे ऽश्म॑स्ते क्षु॒दमुं॑ ते शु - [] 14

TS 5.4.4.2

-गृ॒च्छतु॑ यं द्वि॒ष्म इत्या॑ह॒ यमे॒व द्वेष्टि॑ तम॒स्य क्षु॒धा च शु॒चा चा॑र्पयति
त्रिः परि॑षिञ्चन् प॒र्येति॑ त्रि॒वृद्-वा॑ अ॒ग्निर्या॑वाने॒वा-ग्नि॑स्तस्य शुच॑श्च॒
शम॑यति त्रिः पुनः प॒र्येति॑ षट् थ्सं प॒द्यन्ते॑ षड् वा ऋ॒तव॑ ऋ॒तुभि॑रे॒वास्य॑
शुच॑श्च॒ शम॑यत्य॒पां वा ए॒तत् पु॒ष्पं य॒द्वेत॑सो ऽपा॑श्च - [] 15

TS 5.4.4.3

श॒रो ऽव॑का वे॒तस॑शा॒खया॑ चा॒वका॑भिश्च॒ वि क॑र्ष॒त्यापो॑ वै शा॒न्ताः
शा॒न्ताभि॑रे॒वास्य॑ शुच॑श्च॒ शम॑यति यो वा अ॒ग्निं चि॑तं प्रथ॒मः
प॒शुर॑धि॒क्राम॑तीश्च॒रो वै त॑श्च शु॒चा प्र॑दहो म॒ण्डूके॑न॒ वि क॑र्ष॒त्येष॑

वै प॒शूना-म॒नुपजीव॑नी॒यो न वा ए॒ष ग्रा॒म्येषु॑ प॒शुषु॑ हि॒तो
नाऽऽ*र॒ण्येषु॑ तमे॒व शु॒चा ऽर्प॑यत्य॒ष्टाभिर्वि॑ क॒र्षत्य॑ - [] 16

TS 5.4.4.4

-ष्टाक्ष॑रा गाय॒त्री गा॒यत्रौ॑ ऽग्नि॒र्यावा॑-ने॒वाऽग्नि॑ स्तस्य शुच॑ऽ शमयति
पाव॑कवतीभि॒रन्नं॑ वै पा॒वको॑ ऽन्नेनै॒वास्य॑ शुच॑ऽ शमयति मृ॒त्युर्वा
ए॒ष यद॒ग्निर्ब्र॑ह्मण ए॒तद्रूपं॑ यत् कृ॒ष्णाजि॑नं का॒ष्णी उ॒पा॒नहा॒वुप
मुञ्च॑ते ब्र॒ह्मणै॒व मृ॒त्योर्न॑त्तर्द्ध॒त्ते ऽन्त॑र्मृ॒त्योर्द्ध॒त्ते ऽन्त॑र॒न्नाद्या॑-
दि॒त्याहु॑र॒न्या-मु॒पमुञ्च॑ते ऽन्यां॑ नान्त - [] 17

TS 5.4.4.5

-रे॒व मृ॒त्योर्द्ध॒त्ते ऽवा॑ऽन्नाद्य॑ रु॒न्धे नम॑स्ते ह॒रसे॑ शोचिष इत्याह
नम॑स्कृत्य हि वसी॒याऽस॑-मु॒पच॑रन्त्यन्यं ते अ॒स्मत् तप॑न्तु हे॒तय
इत्याह॑ यमे॒व द्वेष्टि॑ तमस्य शु॒चा ऽर्प॑यति पा॒वको॑ अ॒स्मभ्य॑ऽ शि॒वो
भवे॑त्याहान्नं वै पा॒वको॑ऽन्नेमे॒वाव रु॒न्धे द्वाभ्या॑मधि॒ क्राम॑ति
प्रति॑ष्ठित्या अ॒पस्य॑वतीभ्याऽ शान्त्यै ॥ 18

(शु - र्वेत॑सोऽ॒पा - म॒ष्टाभिर्वि॑ क॒र्षति॑ - नान्त -
रे॒कान्न॑पञ्चा॒शच्च॑) (A4)

TS 5.4.5.1

नृषदे॑ वडि॒ति व्या॑घारयति पङ्क्त्या ऽऽहु॑त्या यज्ञ॒मुख॑मा र॒भते
 ऽक्ष॑णया व्या॑घारयति तस्मा॑दक्ष॒णया प॑शवो ऽङ्गानि॑ प्र ह॒रन्ति
 प्रति॑ष्ठित्यै यद्व॑षट्कुर्याद्-या॒तया॑माऽस्य वषट्कारः॑ स्याद्यन्न
 वषट्कुर्याद्-रक्षा॑ँसि यज्ञ॑ँ ह॒न्युर्वडि॑त्याह परोक्ष॑मेव
 वषट् करो॑ति नास्य या॒तया॑मा वषट्कारो भव॑ति न यज्ञ॑ँ रक्षा॑ँसि
 घ्नन्ति हु॒तादो॑ वा अ॒न्ये दे॒वा - [] 19

TS 5.4.5.2

अहु॒तादो॑ ऽन्ये तान॑ग्निचिदे॒वोभ्या॑न् प्रीणा॒ति ये दे॒वा दे॒वाना॑मिति
 द॒ध्ना म॑धुमिश्रेणावोक्षति हु॒तादश्चै॒व दे॒वानहु॒तादश्च॑ यज॒मानः
 प्रीणा॒ति ते यज॑मानं प्रीणन्ति द॒ध्ने॒व हु॒तादः॑ प्रीणा॒ति म॑धुषा
 ऽहु॒तादो॑ ग्रा॒म्यं वा ए॒तदन्नं॑ यद्-द॒ध्धार॑ण्यं म॑धु यद्-द॒ध्ना
 म॑धुमिश्रेणा-वोक्ष॑त्युभयस्या-वरु॑द्ध्यै गु॒मुष्टि॑नाऽवोक्ष॑ति

प्राजाप॑त्यो - [] 20

TS 5.4.5.3

वै गु॒मुष्टिः॑ स॒योनि॒त्वाय॑ द्वाभ्यां॑ प्रति॑ष्ठित्या अनु॒परि॑चार-मवोक्ष॑त्य-
 परि॒वर्ग॑मे॒वैनान्॑ प्रीणा॒ति वि वा ए॒ष प्रा॒णैः प्र॒जया॑ प॒शुभिर्ऋ॑द्ध्यते

योऽग्निं चिन्वन्नधिक्रामति प्राणदा अपानदा इत्याह प्राणानेवाऽऽत्मन्
धत्ते वर्चोदा वरिवोदा इत्याह प्रजा वै वर्चः पशवो वरिवः प्रजामेव
पशूनात्मन् धत्त इन्द्रो वृत्रमहन् तं वृत्रो - [] 21

TS 5.4.5.4

हतः षोडशभिर्भोगैरसिनाथ् स एतामग्नयेऽनीकवत आहुतिमपश्यत्
तामजुहोत् तस्याग्निरनी कवान्थस्वेन भागधेयेन प्रीतः षोडशधा
वृत्रस्य भोगानप्यदहद्-वैश्वकर्मणेन पाप्मनो नि-रमुच्यत
यदग्नयेऽनीकवत आहुतिं जुहोत्यग्निरेवा-स्यानीकवान्थ् स्वेन
भागधेयेन प्रीतः पाप्मानमपि दहति वैश्वकर्मणेन पाप्मनो निर्मुच्यते
यं कामयेत चिरं पाप्मनो - [] 22

TS 5.4.5.5

निर्मुच्येतेत्येकैकं तस्य जुहुयाच्चिरमेव पाप्मनो निर्मुच्यते यं कामयेत
ताजक् पाप्मनो निर्मुच्येतेति सर्वाणि तस्यानुद्रुत्य जुहुयात् ताजगेव
पाप्मनो निर्मुच्यते ऽथो खलु नानैव सूक्ताभ्यां जुहोति नानैव
सूक्तयोर्वीर्यं दधात्यथो प्रतिष्ठित्यै ॥ 23

(देवाः - प्राजापत्यो-वृत्र - शिरं पाप्मन - श्रत्वारि७शच्च) (A5)

TS 5.4.6.1

उदे॒नमु॒त्तरां॑ न॒येति॑ स॒मिध॑ आ द॒धाति॑ यथा॒ जनं॑ य॒ते ऽव॑सं करो॒ति
तादृ॒गेव॑ तत् ति॒स्र आ द॒धाति॑ त्रि॒वृद्-वा॑ अ॒ग्निर्या॑वाने॒वाग्नि॑ स्तस्मै
भा॒गधे॑यं करो॒त्यौदु॑म्बरी-र्भ॒वन्त्यू॑र्ग्व उ॒दुम्बर॑ ऊ॒र्जमे॑वास्मा॒ अपि॑
द॒धात्यु॑दु॒ त्वा वि॒श्वे दे॒वा इ॒त्याह॑ प्रा॒णा वै वि॒श्वे दे॒वाः प्रा॒णै- [] 24

TS 5.4.6.2

-रे॒वैन॑मुद्-य॒च्छते॑ ऽग्ने॒ भर॑न्तु चि॒त्तिभि॑रि॒त्याह॑ यस्मा॒ ए॒वैनं॑
चि॒त्तायो॑द्य॒च्छते॑ तेनै॒वैन॑ꣳ स-म॒र्द्धय॑ति पञ्च दि॒शो दै॒वीर्य॑ज्ञम॒वन्तु॑
दे॒वीरि॑त्याह दि॒शो ह्येषो॑ऽनु प्र॒च्यव॑ते ऽपाम॑तिं दु॒र्मतिं॑ बा॒धमा॑ना
इ॒त्याह॑ र॒क्षसा॑मप॒हत्यै॑ रा॒यस्पो॑षे य॒ज्ञप॑ति-मा॒भज॑न्तीरि॒त्याह॑ प॒शवो॑
वै रा॒यस्पो॑षः - [] 25

TS 5.4.6.3

प॒शूने॒वाव॑ रु॒न्धे ष॑डि॒भर्.हर॑ति ष॒ड् वा ऋ॑तव॒ ऋ॒तुभि॑रे॒वैन॑ꣳ
हर॑ति द्वे परि॒गृह्य॑वती भ॒वतो॑ र॒क्षसा॑मप॒हत्यै॑ सू॒र्यर॑श्मिर्. हरि॒केशः॑
पु॒रस्ता॑दि॒त्याह॑ प्र॒सूत्यै॑ ततः पा॒वका॑ आ॒शिषो॑ नो जुष॑न्ता॒मित्या॑हान्नं
वै पा॒वको॑ऽन्नमे॒वाव॑ रु॒न्धे दे॒वासुराः॑ सँय॑त्ता आ॒सन् ते॑ दे॒वा
ए॒त-द॑प्रति॒रथ-म॑प॒श्यन् ते॒न वै ते॑ ऽप्र॒त्य - [] 26

TS 5.4.6.4

-सुरानजयन् तदप्रतिरथस्या-प्रतिरथत्वं यदप्रतिरथं द्वितीयो
 होता ऽन्वाहाप्रत्येव तेन यजमानो भ्रातृव्यान् जयत्यथो
 अनभिजितमेवाभि जयति दशर्चं भवति दशाक्षरा विराड् विराजेमौ
 लोकौ विधृतावनयोर्लोकयोर्विधृत्या अथो दशाक्षरा विराडन्नं विराड्
 विराज्येवान्नाद्ये प्रति तिष्ठत्यसदिव वा अन्तरिक्ष-मन्तरिक्ष-
 मिवाऽऽग्नीद्ध्रमाग्नीद्ध्रे - [] 27

TS 5.4.6.5

ऽश्मानं नि दधाति सत्त्वाय द्वाभ्यां प्रतिष्ठित्यै विमान एष दिवो
 मद्ध्य आस्त इत्याह व्यैवैतया मिमीते मद्ध्ये दिवो निहितः
 पृश्निरश्मेत्याहान्नं वै पृश्न्यन्नमेवाव रुन्धे चतसृभिरा पुच्छादेति
 चत्वारि छन्दाँसि छन्दाभिरेवेन्द्रं विश्वा अवीवृधन्नित्याह
 वृद्धिमेवोपावर्तते वाजानाँ सत्यतिं पति - [] 28

TS 5.4.6.6

-मित्याहान्नं वै वाजो ऽन्नमेवाव रुन्धे सुम्नहूर्यज्ञो देवाँ आ च
 वक्षदित्याह प्रजा वै पशवः सुम्नं प्रजामेव पशूनात्मन् धत्ते
 यक्षदग्निर्देवो देवाँ आ च वक्षदित्याह स्वगाकृत्यै

वाजस्य मा प्रसवे-नोद्ग्राभेणो-दग्रभी-दित्याहासौ वा आदित्य
उद्यन्नुद्ग्राभ एष () निम्रोचन् निग्राभो ब्रह्मणैवाऽऽत्मान-मुद्गृह्णाति
ब्रह्मणा भ्रातृव्यं नि गृह्णाति ॥ 29

(प्राणैः-पोषो-ऽप्रत्या - ग्नीदध्रे - पति - मेष - दश च) (A6)

TS 5.4.7.1

प्राचीमनु प्रदिशं प्रेहि विद्वानित्याह देवलोक-मेवैतयोपावर्तते
क्रमद्ध्वमग्निना नाक-मित्याहेमानेवैतया लोकान् क्रमते पृथिव्या
अहमुदन्तरिक्षमा ऽरुहमित्याहेमानेवैतया लोकान्त् समारोहति
सुवर्यन्तो नापेक्षन्त इत्याह सुवर्गमेवैतया
लोकमेत्यग्ने प्रेहि - [] 30

TS 5.4.7.2

प्रथमो देवयता-मित्याहोभयैष्वेवैतया देवमनुष्येषु चक्षुर्दधाति
पञ्चभिरधि क्रामति पाङ्क्तो यज्ञो यावानेव यज्ञ स्तेन सह सुवर्गं
लोकमेति नक्तोषासेति पुरोनुवाक्यामन्वाह प्रत्या अग्ने
सहस्राक्षेत्याह साहस्रः प्रजापतिः प्रजापतेराप्त्यै तस्मै ते विधेम
वाजाय स्वाहेत्याहान्नं वै वाजो ऽन्नमेवाव - [] 31

TS 5.4.7.3

रुन्धे द॒ध्नः पू॒र्णामौ॑दु॒म्बरी॑ꣳ स्वयमा॒तृण्णायां॑ जुहो॒त्यूर्ग्वै॑
द॒ध्यूर्गु॑दु॒म्बरो॒ऽसौ स्वयमा॒तृण्णा ऽमु॒ष्यामे॒वोर्जं॑ दधाति
तस्मा॑दमु॒तोऽर्वा॒ची-मूर्ज॑मुप जीवाम स्तिसृ॒भिः सा॒दयति॑ त्रिवृद्-वा
अ॒ग्निर्या॒वाने॒वाग्नि॒स्तं प्रति॑ष्ठां गमयति प्रे॒द्धो अग्ने॑ दीदिहि पु॒रो न
इत्यौ॑दु॒म्बरी॑मा दधात्येषा वै सू॒र्मि कर्ण॑कावत्येतया ह स्म - [] 32

TS 5.4.7.4

वै दे॒वा असु॑राणाꣳ शत॒तर्.हा॑ꣳ स्तृꣳहन्ति॑ यदे॒तया॑ समि॒धमा॑दधाति
वज्र॑मेवैतच्छत॒घ्नीं य॑जमानो भ्रातृ॒व्याय॑ प्र हरति स्तृ॒त्या
अछ॑म्बट्कारं वि॒धेम ते॑ परमे जन्म॒न्नग्न॑ इति वैकङ्क॒तीमा॑ दधाति
भा ए॒वाव रुन्धे॑ ताꣳ सवि॒तुर्वरे॑ण्यस्य चि॒त्रामि॑ति शमी॒मयीꣳ शान्त्या॑
अ॒ग्निर्वा ह वा॑ अ॒ग्निचि॑तं दुहे॒ऽग्निचि॑द्-वा ऽग्निं दुहे॒ ताꣳ- [] 33

TS 5.4.7.5

सवि॒तुर्वरे॑ण्यस्य चि॒त्रामि॑त्याहैष वा अग्ने॒र्दोह॑ स्तमस्य कण्व
ए॒व श्रा॑यसो ज्वेत् तेन ह स्मै॒नꣳ स दुहे॑ यदे॒तया॑ समि॒ध-
मा॒दधा॑त्यग्निचिदे॒व तद॑ग्निं दुहे सप्त ते अग्ने॒ समि॒धः

सप्त जिह्वा इत्याह सप्तैवास्य साप्तानि प्रीणाति पूर्णया जुहोति
पूर्ण इव हि प्रजापतिः प्रजापते - [] 34

TS 5.4.7.6

-राप्त्यै न्यूनया जुहोति न्यूनाद्धि प्रजापतिः प्रजा असृजत प्रजानां
सृष्ट्या अग्निर्देवेभ्यो निलायत स दिशोऽनु प्रा-विशज्जुह्वन्मनसा
दिशो॑ ध्यायेद्-दिग्भ्य एवैनमव रुन्धे दद्धना पुरस्ताज्जुहोत्या-
ज्येनोपरिष्ठात् तेजश्चैवास्मा इन्द्रियं च समीची दधाति द्वादशकपालो
वैश्वानरो भवति द्वादश मासाः सँवत्सरः सँवत्सरौ॑ ऽग्निर्वैश्वानरः

साक्षा- [] 35

TS 5.4.7.7

-देव वैश्वानरमव रुन्धे यत् प्रयाजानूयाजान् कुर्याद्-विकस्तिः सा
यज्ञस्य दर्विहोमं करोति यज्ञस्य प्रतिष्ठित्यै राष्ट्रं॑ वै वैश्वानरो
विण् मरुतो वैश्वानरं॑ हुत्वा मारुतान् जुहोति राष्ट्र एव विशमनु
बद्धनात्युच्चै-वैश्वानरस्याऽऽश्रावयत्युपांशु मारुतान् जुहोति
तस्माद्-राष्ट्रं॑ विशमति वदति मारुता भवन्ति मरुतो वै देवानां॑ विशो॑
देवविशेनैवास्मै मनुष्यविश () -मव रुन्धे सप्त भवन्ति सप्तगणा

वै मरुतो गणश एव विशमव रुन्धे गणेन गणमनुद्रुत्य जुहोति
विशमेवास्मा अनुवर्त्मानं करोति ॥ 36

(अग्ने प्रेह्य - व - स्म - दुहे तां - प्रजापतेः - साक्षान् -
मनुष्यविश - मेकविंशतिश्च (A7)

TS 5.4.8.1

वसोर्द्धारां जुहोति वसोर्मे धारा ऽसदिति वा एषा हूयते घृतस्य
वा एनमेषा धारा ऽमुष्मिन् लोके पितृमानोप तिष्ठत आज्येन
जुहोति तेजो वा आज्यं तेजो वसोर्द्धारा तेजसैवास्मै तेजो ऽव
रुन्धे ऽथो कामा वै वसोर्द्धारा कामानेवाव रुन्धे यं कामयेत
प्राणानस्यान्नाद्यं वि - [] 37

TS 5.4.8.2

च्छिन्द्यामिति विग्राहं तस्य जुहुयात् प्राणानेवास्यान्नाद्यं वि च्छिनत्ति
यं कामयेत प्राणानस्यान्नाद्यं सं तनुयामिति सन्ततां तस्य जुहुयात्
प्राणानेवास्यान्नाद्यं सं तनोति द्वादश द्वादशानि जुहोति द्वादश
मासाः सँवथ्सरः सँवथ्सरेणैवास्मा अन्नमव रुन्धे ऽन्नं च
मे ऽक्षुच्च म इत्याहैतद् वा - [] 38

TS 5.4.8.3

अ॒न्नस्य॑ रू॒पꣳ रू॒पेणै॑वान्नमव॑ रुन्धे ऽग्निश्च॑ म आप॑श्च म इत्या॑हैषा
वा अ॒न्नस्य॑ योनिः॑ स॒योन्ये॑वान्नमव॑ रुन्धे ऽर्धेन्द्रा॑णि जुहोति॑ दे॒वता॑
ए॒वाव॑ रुन्धे यत् सर्वे॑षा-म॒र्द्धमिन्द्रः॑ प्रति॑ तस्मादिन्द्रो॑ दे॒वता॑नां
भूयिष्ठ॑भा॒क्तम॑ इन्द्रमु॒त्तर-माहेन्द्रि॑यमेवास्मि-न्नुप॑रिष्ठाद् दधाति
य॒ज्ञायु॑धानि जुहोति॑ य॒ज्ञो - [] 39

TS 5.4.8.4

वै य॒ज्ञायु॑धानि य॒ज्ञमे॒वाव॑ रुन्धे ऽथो॑ एतद्-वै य॒ज्ञस्य॑ रू॒पꣳ रू॒पेणै॑व
य॒ज्ञमव॑ रुन्धे ऽव॒भृथश्च॑ मे स्व॒गाका॑रश्च म इत्या॑ह स्व॒गाकृ॑त्या
अ॒ग्निश्च॑ मे घ॒र्मश्च॑ म इत्या॑हैतद् वै ब्र॒ह्मव॑र्चसस्य॑ रू॒पꣳ रू॒पेणै॑व
ब्र॒ह्मव॑र्चस-मव॑ रुन्ध ऋक्च॑ मे साम॑ च म इत्या॑है - [] 40

TS 5.4.8.5

-तद् वै छ॒न्दसा॑ꣳ रू॒पꣳ रू॒पेणै॑व छ॒न्दाꣳस्य॑व रुन्धे गर्भा॑श्च मे
व॒थसा॑श्च म इत्या॑हैतद् वै प॒शूना॑ꣳ रू॒पꣳ रू॒पेणै॑व प॒शून॑व
रुन्धे क॒ल्पान् जुहो॑त्यक्लृ॒प्तस्य॑ क्लृ॒प्त्यै यु॒ग्मद॑युजे जुहोति॑
मिथु॑नत्वायो-त्तरा॑वती भवतोऽभि॒क्रान्त्या॑ ए॒का च॑ मे तिस्रश्च॑
म इत्या॑ह दे॒वछ॒न्दसं॑ वा ए॒का च॑ तिस्रश्च॑ - [] 41

TS 5.4.8.6

मनुष्यछन्दसं चतस्रश्चाष्टौ च देवछन्दसं चैव मनुष्य छन्दसञ्चाव
 रुन्ध आ त्रयस्त्रिंशतो जुहोति त्रयस्त्रिंशद्-वै देवता देवता
 एवाव रुन्ध आ ऽष्टाचत्वारिंशतो जुहो-त्यष्टाचत्वारिंशदक्षरा जगती
 जागताः पशवो जगत्यैवास्मै पशूनव रुन्धे वाजश्च प्रसवश्चेति द्वादशं
 जुहोति द्वादश मासाः सँवत्सरः सँवत्सर एव प्रति तिष्ठति ॥ 42

(वि - वै - यज्ञः-साम च म इत्याह - च तिस्र -

श्रैकान्नपञ्चाशच्च) (A8)

TS 5.4.9.1

अग्निर्देवेभ्यो ऽपाक्रामद्-भागधेयमिच्छमानस्तं देवा अब्रुवन्नुप
 न आ वर्तस्व हव्यं नो वहेति सो ऽब्रवीद्-वरं वृणै मह्यमेव
 वाजप्रसवीयं जुहवन्निति तस्मादग्नये वाजप्रसवीयं जुह्वति
 यद्-वाजप्रसवीयं जुहोत्यग्निमेव तद्-भागधेयेन स-मर्दधयत्यथो
 अभिषेक एवास्य स चतुर्दशभिर्जुहोति सप्त ग्राम्या ओषधयः

सप्ता - [] 43

TS 5.4.9.2

–ऽऽर॒ण्या उ॒भयी॑षाम॒वरु॑द्ध्य॒ अन्न॑स्यान्नस्य जुहोत्यन्नस्यान्नस्या–
वरु॑द्ध्य॒ औदु॑म्बरेण सु॒वेण जु॒होत्यूर्वा उ॒दुम्बर॑ ऊ॒र्गन्न॑मूर्जे॒वास्मा
ऊ॒र्जम॑न्नमव रुन्धे ऽग्नि॒र्वे दे॒वाना॑–म॒भिषि॑क्तोऽग्निचिन्–मनु॒ष्याणां
तस्मा॑दग्निचिद्–वर्ष॑ति न धा॒वेद॑वरुद्ध॒ ह्यस्या॑–न्नम॑न्नमिव खलु वै
वर्ष॑ ँयद्–धा॒वेद॑न्नाद्याद्–धा॒वेदु॑पावर्तेता–न्नाद्य॑मेवा॒भ्यु – [] 44

TS 5.4.9.3

–पाव॑र्तते नक्तोषासेति कृ॒ष्णायै॑ श्वेतव॒थ्सायै॑ पयसा जुहोत्यहै॒वास्मै
रात्रिं॑ प्र दापयति रात्रि॒या ऽह॑–रहो॒रात्रे ए॒वास्मै॑ प्र॒त्ते का॒मम॑न्नाद्यं दुहाते
राष्ट्र॑भृतो जुहोति राष्ट्र॒मेवाव॑ रुन्धे षड्भिर्जुहोति षड् वा ऋ॒तव॑ ऋ॒तुष्वेव॑
प्रति॑ तिष्ठति भुवनस्य पत॒ इति॑ रथ॒मुखे पञ्चा॑ऽऽहुतीर्जुहोति वज्रो वै
रथो॑ वज्रेणैव दि॒शो – [] 45

TS 5.4.9.4

–ऽभि जयत्यग्निचित॑ ह वा अ॒मुष्मिन् लो॒के वातो॑ऽभि पवते
वा॒तना॑मानि जुहोत्यभ्ये॒वैन॑–म॒मुष्मिन् लो॒के वा॒तः प॑वते त्रीणि
जुहोति त्रय॑ इमे लो॒का ए॒भ्य ए॒व लो॒केभ्यो॑ वा॒तम॑व रुन्धे समु॒द्रो

ऽसि नभस्वानित्याहैतद्-वै वातस्य रूपं रूपेणैव वातमव रुन्धे
ऽञ्जलिना जुहोति न ह्येतेषामन्यथा () ऽहुतिरवकल्पते ॥ 46

(ओषधयः सप्ता - भि - दिशो - अन्यथा - द्वे च) (A9)

TS 5.4.10.1

सुवर्गाय वै लोकाय देवरथो युज्यते यत्राकूताय मनुष्यरथ एष खलु
वै देवरथो यदग्निरग्निं युनज्मि शवसा घृतेनेत्याह युनक्त्येवैनं स
एनं युक्तः सुवर्गं लोकमभि वहति यत् सर्वाभिः पञ्चभि-
र्युञ्ज्याद्-युक्तोऽस्याऽग्निः प्रच्युतः स्यादप्रतिष्ठिता आहुतयः
स्यु-रप्रतिष्ठिताः स्तोमा अप्रतिष्ठितान्युक्थानि तिसृभिः
प्रातस्सवनेऽभि मृशति त्रिवृ - [] 47

TS 5.4.10.2

-द्वा अग्निर्यावानेवा-ग्निस्तं युनक्ति यथाऽनसि युक्त आधीयत
एवमेव तत् प्रत्याहुतयस्तिष्ठन्ति प्रति स्तोमाः प्रत्युक्थानि यज्ञायज्ञियस्य
स्तोत्रे द्वाभ्यामभि मृशत्येतावान् वै यज्ञो यावानग्निष्टोमो भूमा त्वा
अस्यात ऊर्ध्वः क्रियते यावानेव यज्ञ-स्त-मन्ततोऽन्वारोहति द्वाभ्यां
प्रतिष्ठित्या एकयाऽप्रस्तुतं भवत्यथा - [] 48

TS 5.4.10.3

-भि॑ मृ॒शत्यु॑पै॒नमु॑त्तरो॒ यज्ञो॑ न॒मत्य॑थो स॒न्तत्यै॑ प्र॒ वा
 ए॒षोऽस्मा॑ ल्लो॒काच्च्य॑वते॒ योऽग्निं॑ चि॒नुते॑ न॒ वा ए॒तस्या॑निष्ट॒क
 आहु॑तिर॒व क॑ल्पते॒ यां वा॑ ए॒षोऽनिष्ट॑क आहु॒तिं जु॑होति स्र॒वति॑ वै
 सा ता॑ स्र॒वन्तीं॑ य॒ज्ञोऽनु॑ परा॒ भवति॑ य॒ज्ञं य॑ज॒मानो॑ यत् पुनश्चि॒तिं
 चि॒नुत॑ आहु॒तीनां॑ प्र॒तिष्ठि॑त्यै प्र॒त्याहु॑तय॒ स्तिष्ठ॑न्ति - [] 49

TS 5.4.10.4

न य॒ज्ञः परा॑भवति॒ न य॑ज॒मानो॑ ऽष्टावु॒प द॑धात्य॒ष्टाक्ष॑रा गाय॒त्री
 गाय॑त्रेणै॒वैनं॑ छन्द॒सा चि॒नुते॑ यदेकाद॒श त्रै॑ष्टु॒भेन॑ यद् द्वा॒दश
 जा॒गते॑न छन्दो॒भिरे॑वैनं॑ चि॒नुते॑ नपा॒त्को वै॑ नामै॒षोऽग्नि॑र्यत् पुनश्चि॒तिर्य
 एवं॑ वि॒द्वान् पु॑नश्चि॒तिं चि॒नुत॑ आ तृ॒तीया॑त् पु॒रुषा॑दन्नम॒त्ति
 यथा॑ वै पुनरा॒धेय॑ एवं पुनश्चि॒तिर्योऽग्न्या॑धेये॒न न॑ - [] 50

TS 5.4.10.5

ध्नो॑ति स पुनरा॒धेय॑मा ध॒त्ते योऽग्निं॑ चि॒त्वा न॑र्द्ध॒नोति॑ स पुनश्चि॒तिं
 चि॒नुते॑ यत् पुनश्चि॒तिं चि॒नुत॑ ऋ॒द्ध्या अ॒थो ख॑ल्वाहु॒र्न चे॑त॒व्येति॑ रु॒द्रो
 वा ए॒ष य॑द॒ग्निर्य॑था व्याघ्र॑ सु॒प्तं बो॑धयति॒ तादृ॑गे॒व तद॑थो
 ख॑ल्वाहुश्चे॒तव्ये॑ति॒ यथा॑ वसी॒याँ सं भा॑ग॒धेये॑न बो॒धय॑ति॒ तादृ॑गे॒व

तन्मनु-रग्नि-मचिनुत () तेन नाऽऽर्ध्नोत्स एतां पुनश्चितिमपश्यत्
तामचिनुत तया वै स आर्ध्नोद्-यत् पुनश्चितिं चिनुत ऋद्ध्यै ॥ 51

(त्रिवृ-दथ-तिष्ठ-न्यग्न्याधेयेन ना-चिनुत-सप्तदश- च) (A10)

TS 5.4.11.1

छन्दश्चितं चिन्वीत पशुकामः पशवो वै छन्दांसि पशुमानेव भवति
श्येनचितं चिन्वीत सुवर्गकामः श्येनो वै वयसां पतिष्ठः श्येन एव
भूत्वा सुवर्गं लोकं पतति कङ्कचितं चिन्वीत यः कामयेत
शीर्षण्वानमुष्मिन् लोके स्यामिति शीर्षण्वानेवाऽमुष्मिन् लोके
भवत्यलजचितं चिन्वीत चतुस्सीतं प्रतिष्ठाकाम श्वतस्रो दिशो दिक्ष्वेव
प्रति तिष्ठति प्रउगचितं चिन्वीत भ्रातृव्यवान् प्रै - [] 52

TS 5.4.11.2

-व भ्रातृव्यान् नुदत उभयतःप्रउगं चिन्वीत यः कामयेत प्र जातान्
भ्रातृव्यान् नुदेय प्रति जनिष्यमाणानिति प्रैव जातान् भ्रातृव्यान् नुदते
प्रति जनिष्यमाणान् रथचक्रचितं चिन्वीत भ्रातृव्यवान् वज्रो वै रथो
वज्रमेव भ्रातृव्येभ्यः प्र हरति द्रोणचितं चिन्वीतान्नकामो द्रोणे वा
अन्नं भ्रियते सयोन्येवान्नमव रुन्धे समूह्यं चिन्वीत पशुकामः
पशुमानेव भवति - [] 53

TS 5.4.11.3

परिचाय्यं चिन्वीत ग्रामकामो ग्राम्येव भवति श्मशानचितं चिन्वीत
यः कामयेत पितृलोक ऋद्ध्युयामिति पितृलोक एवर्द्धनोति
विश्वामित्रजमदग्नी वसिष्ठेना ऽस्पर्द्धेता॑ स एता जमदग्निर्विहव्या
अपश्यत् ता उपाधत्त ताभिर्वै स वसिष्ठस्येन्द्रियं वीर्यमवृद्ध यद्-
विहव्या उपदधातीन्द्रियमेव ताभिर्वीर्यं यजमानो भ्रातृव्यस्य वृद्धे
होतुर्दधिष्णिय उप दधाति यजमानायतनं वै - [] 54

TS 5.4.11.4

होता स्व एवास्मा आयतन इन्द्रियं वीर्यमव रुन्धे द्वादशोप दधाति
द्वादशाक्षरा जगती जागताः पशवो जगत्यैवास्मै पशूनव रुन्धे
ऽष्टावष्टावन्येषु धिष्णियेषूप दधात्यष्टाशफाः पशवः पशूनेवाव रुन्धे
॥ षण्मार्जालीये षड् वा ऋतव ऋतवः खलु वै देवाः पितर ऋतूनेव
देवान् पितृन् प्रीणाति ॥ 55

(प्र - भवति - यजमानायतनं॑वा - अष्टाचत्वारि॑शच्च) (A11)

TS 5.4.12.1

पवस्व वाजसातय इत्यनुष्टुक् प्रतिपद्-भवति तिस्रो ऽनुष्टुभ श्रतस्रो
गायत्रियो यत् तिस्रो ऽनुष्टुभ-स्तस्मा-दश्व-स्त्रिभिस्तिष्ठ॑ स्तिष्ठति

यच्चतस्रो गायत्रिय स्तस्मात् सर्वाँश्चतुरः पदः प्रतिदधत् पलायते
 परमा वा एषा छन्दसां यदनुष्टुक् परमश्चतुष्टोमः स्तोमानां
 परमस्त्रिरात्रो यज्ञानां परमोऽश्वः पशूनां परमेणैवैनं परमतां
 गमयत्येकविंश-महर्भवति - [] 56

TS 5.4.12.2

यस्मिन्नश्च आलभ्यते द्वादश मासाः पञ्चर्तवस्त्रय इमे लोका
 असावादित्य एकविंश एष प्रजापतिः प्राजापत्योऽश्वस्तमेव
 साक्षाद्दध्नोति शक्वरयः पृष्ठं भवन्त्यन्यदन्य-च्छन्दोऽन्येन्ये वा
 एते पशव आ लभ्यन्त उतेव ग्राम्या उतेवाऽऽरण्या यच्छक्वरयः
 पृष्ठं भवन्त्यश्वस्य सर्वत्वाय पार्थुरश्मं ब्रह्मसामं भवति रश्मिना
 वा अश्वो - [] 57

TS 5.4.12.3

यत ईश्वरो वा अश्वो ज्यतोऽप्रतिष्ठितः परां परावतं गन्तोर्यत्
 पार्थुरश्मं ब्रह्मसामं भवत्यश्वस्य यत्यै धृत्यै संकृत्यच्छावाकसामं
 भवत्युत्सन्नयज्ञो वा एष यदश्वमेधः क स्तद्-वेदेत्याहुर्यदि सर्वो वा
 क्रियते न वा सर्व इति यथ् संकृत्यच्छावाकसामं भवत्यश्वस्य

सर्व॒त्वाय॑ पर्या॒प्त्या॑ अन॒न्तरा॑याय॒ सर्व॑स्तोमो ऽति॒रात्र॑ उत्त॒मम॑हर्भवति
() सर्व॒स्याऽऽप॑त्यै॒ सर्व॑स्य॒ जित्यै॒ सर्व॑मेव तेनाऽऽप॑नोति
सर्वं॑ जयति ॥ 58

(अ॒हर्भ॑वति - वा अ॒श्वो - ऽह॑र्भ॒वति - द॒श च॑) (A12)

Prasna Korvai with starting Padams of 1 to 12 Anuvaakams :-

(दे॒वा॒सु॒रा॒स्तेन॑ – त॒व्या॑ – रु॒द्रो॑ – ऽ॒श्म॑ – नृ॒षदे॑ व – दु॒दे॒नं॑ –
प्रा॒ची॒मि॒ति॒ – व॒सो॒र्द्धा॒रा॑ – म॒ग्नि॒र्दे॒वेभ्यः॑ – सु॒वर्गा॑य॒ यत्रा॑कू॒ताय॑ –
छ॒न्द॒श्चि॒तं॑ – प॒वस्व॑ – द्वा॒दश॑)

Korvai with starting Padams of 1, 11, 21 Series of Panchaatis :-

(दे॒वा॒सु॒रा॒ – अ॒जा॒यां॑ – वै॒ ग्रु॒मु॒ष्टिः॑ – प्र॒थ॒मो॑ दे॒व॒य॒तामे॑ – त॒द्वै॒
छ॒न्द॒सा॑ – मृ॒ध्नो॑ – त्य॒ष्टौ॑ पञ्चा॒शत्)

First and Last Padam of Fourth Prasnam of 5th Kandam

(दे॒वा॒सु॒राः॑ – स॒र्वं॑ ज॒यति॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे चतुर्थः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.5 पञ्चमकाण्डे पञ्चमः प्रश्नः – वायव्यपश्चाद्यानं निरूपणं

TS 5.5.1.1

यदे॒केन॑ स॒ऽस्था॒पय॑ति य॒ज्ञस्य॑ स॒न्तत्या॑ अ॒विच्छे॑दायैन्द्राः प॒शवो॑
ये मु॒ष्करा॑ यदैन्द्राः स॒न्तोऽग्नि॑भ्य आ॒लभ्य॑न्ते दे॒वता॑भ्यः स॒मदं॑
दधा॒त्याग्ने॒यी स्त्रि॒ष्टुभो॑ या॒ज्यानु॒वाक्याः॑ कुर्याद्-यदा॒ग्नेयी॑स्तेना॒
ऽऽग्ने॒या यत् त्रि॒ष्टुभस्ते॑नैन्द्राः स॒मृद्ध्यै॑ न दे॒वता॑भ्यः स॒मदं॑
दधा॒ति वा॒यवे॑ नि॒युत्व॑ते तू॒पर॒मा ल॑भते ते॒जो ऽग्ने॒र्वायु॑ स्ते॒जस ए॒ष
आ ल॑भ्यते तस्माद्-यद्रि॒यङ् वा॒यु - [] 1

TS 5.5.1.2

-र्वा॒ति तद्रि॒यङ्-ग्नि॑र्द॒हति॑ स्वमे॒व तत् ते॒जोऽन्वे॑ति यन्न नि॒युत्व॑ते
स्यादु॒न्माद्ये॑-यज॒मानो॑ नि॒युत्व॑ते भव॒ति यज॑मानस्याऽ*नु॒न्मादा॑य
वा॒युम॑ती श्वे॒तव॑ती या॒ज्यानु॒वाक्ये॑ भव॒तः स॒तेज॑स्त्वाय॒ हिर॑ण्यग॒र्भः
स॒मव॑र्तताग्र इ॒त्याघा॑र॒मा घा॑रयति प्र॒जाप॑तिर्वै हिर॑ण्यग॒र्भः
प्र॒जाप॑ते-रनु॒रूप॑त्वाय॒ सर्वा॑णि वा ए॒ष रू॒पाणि॑ प॒शूनां॑ प्र॒त्या ल॑भ्यते
यच्छ॑मश्रुण॒ स्तत् - [] 2

TS 5.5.1.3

पुरुषाणां रूपं यत् तूपर स्तदश्वा॑नां यदन्यतो॑दन् तद्-गवां
 यदव्या॑ इव श॒फास्तदवी॑नां यदज॒ स्तदजा॑नां वा॒युर्वै प॒शूनां प्रि॒यं
 धाम॒ यद्-वा॒यव्यो भव॑त्येतमे॒वैनम॑भि सं॒जाना॑नाः प॒शव॑ उप॒ तिष्ठ॑न्ते
 वा॒यव्यः का॒र्या(३): प्रा॒जाप॒त्या(३) इत्याहु॑-र्यद्-वा॒यव्यं कु॒र्यात्
 प्र॒जाप॒तेरि॒याद्-यत् प्रा॒जाप॒त्यं कु॒र्याद्-वा॒यो - [] 3

TS 5.5.1.4

-रि॒याद्-यद्-वा॒यव्यः प॒शुर्भव॑ति तेन॒ वा॒योर्नैति॑ यत् प्रा॒जाप॒त्यः
 पु॒रोडा॑शो भव॑ति तेन॒ प्र॒जाप॒तेर्नैति॑ यद् द्वा॒दश॑कपाल॒ स्तेन॑
 वैश्वा॑नरान्नैत्या॒ग्नावैष्ण॑व-मे॒काद॑शकपालं॒ निर्व॑पति दी॒क्षिष्य॑माणोऽग्निः
 सर्वा॑ दे॒वता॒ विष्णु॑र्यज्ञो दे॒वता॑श्चै॒व य॒ज्ञं चाऽऽ र॑भतेऽग्नि॒रव॑मो
 दे॒वता॑नां विष्णुः प॒रमो॑ यदा॒ग्नावैष्ण॑व-मे॒काद॑शकपालं॒ निर्व॑पति
 दे॒वता॑ - [] 4

TS 5.5.1.5

ए॒वोभ॑यतः परि॒गृह्य॒ यज॑मानो ऽव॒ रुन्धे॑ पु॒रोडा॑शेन॒ वै दे॒वा अ॒मुष्मिन्
 लो॒क आ॒र्द्ध॒धुवन्॑ च॒रुणा॑ ऽस्मिन्. यः का॒मये॑ता ऽमुष्मिन् लो॒क
 ऋ॒द्ध॒धुया॑मिति॒ स पु॒रोडा॑शं कु॒र्वीता॑ ऽमुष्मिन्ने॒व लो॒क ऋ॒द्ध॒ध्नोति॑

यद॑ष्टाक॑पाल॒ स्तेनाऽऽग्ने॑यो यत् त्रि॑कपाल॒स्तेन॑ वैष्ण॒वः समृ॑द्ध्यै
यः काम॑येतास्मिन् लो॒क ऋ॑द्ध्यु॒यामि॑ति स चरुं कु॒र्वीताग्ने॑र्धृतं
विष्णो॑स्तण्डु॒ला-स्तस्मा॑ - [] 5

TS 5.5.1.6

-च्चरुः कार्या॑ ऽस्मिन्ने॒व लो॒क ऋ॑द्ध्यु॒नोत्यादि॑त्यो भव॑तीयं वा
अदि॑तिरस्यामे॒व प्रति॑ तिष्ठ॒त्यथो॑ अस्यामे॒वाधि॑ यज्ञं तनु॑ते यो वै
सँव॑त्सर-मुख्य-मभृ॑त्वा ऽग्निं चि॒नुते॑ यथा सा॒मि गर्भो॑ ऽवप॑द्यते
तादृ॑गे॒व तदा॑र्तिमाच्छे॒द्-वैश्वा॑नरं द्वाद॑शकपालं पु॒रस्ता॒न्निर्व॑पेथ्
सँव॑त्सरो वा अ॒ग्निर्वैश्वा॑नरो यथा स॒मँव॑त्सरमाप्त्वा - [] 6

TS 5.5.1.7

काल॑ आ॒गते॑ विजा॒यत॑ ए॒वमे॒व सँव॑त्सरमाप्त्वा काल॑ आ॒गते॑ ऽग्निं
चि॒नुते॑ नाऽऽ*र्तिमाच्छे॒त्येषा॑ वा अ॒ग्नेः प्रि॒या तनू॑र्यद्-वैश्वा॑नरः
प्रि॒यामे॒वास्य॑ तनु॒वम॑व रुन्धे त्री॒ण्येता॑नि ह॒वींषि॑ भवन्ति त्रय॑ इमे
लो॒का ए॒षां लो॒कानां॑ रोहा॒य ॥ 7

(यद्रि॑यङ् वा॒यु - र्यच्छ॑मश्रुणस्तद् - वा॒यो - निर्व॑पति दे॒वता॑ -
स्तस्मा॑ - दा॒प्त्वा - षा॒न्निर्व॑पति) (A1)

TS 5.5.2.1

प्र॒जाप॑तिः प्र॒जाः सृ॑ष्ट्वा प्रे॒णा ऽनु॑ प्रावि॑शत् ताभ्यः पुनः संभ॑वितुं
नाश॑क्नो॒त् सोऽब्र॑वीदृ॒द्धन्व॑दि॒त् स यो मे॒तः पुनः॑ संचि॑नवदिति तं
दे॒वाः सम॑चि॒न्वन् ततो॑ वै त आ॒र्द्ध॑न्वन् यथ् सम॑चि॒न्वन् तच्चि॑त्यस्य
चि॒त्यत्वं ँ॒ एवं वि॒द्वान॒ग्निं चि॑नुत ऋ॒द्ध्नो॑त्येव कस्मै॒ क-म॑ग्निश्ची॒यत
इ॒त्याहु॑र॒ग्निवा - [] 8

TS 5.5.2.2

-न॒सानी॑ति वा अ॒ग्निश्ची॑यते ऽग्नि॒वाने॑व भ॒वति कस्मै॒ कम॑ग्निश्ची॒यत
इ॒त्याहु॑र्दे॒वा मा वेद॑न्निति वा अ॒ग्निश्ची॑यते वि॒दुरे॑नं दे॒वाः कस्मै॒
कम॑ग्निश्ची॒यत इ॒त्याहु॑र्गृह्य॒सानी॑ति वा अ॒ग्निश्ची॑यते गृ॒ह्येव॑ भ॒वति
कस्मै॒ कम॑ग्निश्ची॒यत इ॒त्याहुः॑ पशु॒मान॑सानीति वा अ॒ग्नि - [] 9

TS 5.5.2.3

-श्ची॑यते पशु॒माने॑व भ॒वति कस्मै॒ कम॑ग्निश्ची॒यत इ॒त्याहुः॑ सप्त
मा पु॒रुषा॑ उप जी॒वानि॑ति वा अ॒ग्निश्ची॑यते त्रयः प्राञ्च॑स्त्रयः
प्रत्य॑ञ्च आ॒त्मा सप्त॑म ए॒तावन्त॑ ए॒वैन॑ममुष्मिन् लो॒क उप॑ जी॒वन्ति
प्र॒जाप॑तिर॒ग्निम॑चि॒कीष॑त तं पृ॒थिव्य॑ब्रवीन्न मय्य॒ग्निं चैष्य॑से ऽति
मा धक्ष्य॑ति सा त्वा ऽति॑दह्यमा॒ना वि ध॑विष्ये - [] 10

TS 5.5.2.4

स पापी॒यान् भ॒विष्य॒सीति॑ सौ॒ऽब्रवीत्॑ तथा॒ वा अ॒हं क॑रिष्यामि यथा॑
 त्वा नाति॑धक्ष्यतीति॒ स इ॒मा-म॒भ्यमृ॑शत् प्रजापति॑स्त्वा सादयतु॒ तया॑
 दे॒वतया॑ ऽङ्गिर॒स्वद् ध्रु॒वा सी॒देती॒मामे॒वेष्ट॑कां कृ॒त्वोपा॑-धत्ता-नति॑दाहाय
 यत् प्रत्य॒ग्निं चि॒न्वीत॑ तद॒भि मृ॑शेत् प्रजापति॑स्त्वा सादयतु॒ तया॑
 दे॒वतया॑ ऽङ्गिर॒स्वद् ध्रु॒वा सी॒दे - [] 11

TS 5.5.2.5

-ती॒मामे॒वेष्ट॑कां कृ॒त्वोप॑ धत्ते॒ऽनति॑दाहाय प्रजापति॑रकामयत
 प्र जा॒येयेति॑ स ए॒तमु॒ख्यम॑पश्यत् त॒ँ सँ॑वथ्सरम॑बिभस्ततो॒ वै
 स प्रा॒जाय॑त तस्मा॒त् सँ॑वथ्सरं॒ भार्यः॑ प्रै॒व जा॑यते तं वँ॑सवो ऽब्रु॒वन्
 प्र त्वम॑जनिष्ठा वयं॒ प्रजा॑यामहा इति॒ तं वँ॑सुभ्यः प्रायच्छत् तं
 त्री॒ण्यहा॑न्यबिभरु॒स्तेन॑ - [] 12

TS 5.5.2.6

त्री॒णि च॑ श॒तान्य॑सृजन्त त्रय॑स्त्रि॒ँशतं॑ च तस्मा॒त् त्र्य॒हं भार्यः॑
 प्रै॒व जा॑यते तान् रु॒द्रा अब्रु॑वन् प्र यू॒यम॑जनि॒द्वं वँ॑यं प्र जा॑यामहा
 इति॒ त॒ँ रु॒द्रेभ्यः॑ प्रायच्छन् त॒ँ षड॑हान्यबिभरु॒स्तेन॑ त्री॒णि च॑

श॒तान्य॑सृ॒जन्त॑ त्रय॒स्त्रि॒॑शतं॑ च तस्मा॒त् षड॑हं भा॒र्यः॑ प्रै॒व जा॑यते
ता॒नादि॑त्या अ॒ब्रुव॑न् प्र यू॒य-म॑जनि॒द्वं व॑यं - [] 13

TS 5.5.2.7

प्र जा॒याम॑हा इति त-मा॒दित्ये॑भ्यः प्राय॑च्छन् तं द्वा॒दशा॑हान्य॒बिभ॑रु
स्तेन॑ त्रीणि॑ च श॒तान्य॑सृ॒जन्त॑ त्रय॒स्त्रि॒॑शतं॑ च तस्मा॒द् द्वा॒दशा॑हं
भा॒र्यः॑ प्रै॒व जा॑यते तेन॑ वै ते स॒हस्र॑मसृ॒जन्तो॒खा सह॑स्र॒तमीं॑ य
ए॒वमु॒ख्यं सा॒हस्रं॑ वै॒द प्र स॒हस्रं॑ प॒शूना॑प्नोति ॥ 14

(अ॒ग्नि॒वान् - प॒शुमा॑न॒सानी॑ति वा अ॒ग्नि - र्वि॑ष्ये - मृ॒शेत्
प्र॒जाप॑तिस्त्वा सा॒दय॑तु॒ तया॑ दे॒वत॑याऽङ्गि॒रस्व॑द् ध्रु॒वा सी॑द - तेन॑ -
ता॒नादि॑त्या अ॒ब्रुव॑न् प्र यू॒यम॑जनि॒द्वं व॑यं - च॒त्वारि॒॑शच्च॑) (A2)

TS 5.5.3.1

यजु॑षा वा ए॒षा क्रि॑यते यजु॑षा प॒च्यते॑ यजु॑षा वि मु॒च्यते॑ यदु॒खा
सा वा ए॒षैत॑र्हि या॒तया॑म्नी सा न पुनः॑ प्रयु॒ज्येत्या॑हु॒रग्ने॑ यु॒क्ष्वा
हि ये तव॑ यु॒क्ष्वा हि दे॒वहू॑तमा॒ इत्यु॒खायां॑ जुहोति॑ तेनै॒वैनां॑ पुनः॑
प्र यु॒ङ्क्ते ते॑नाया॒तया॑म्नी यो वा अ॒ग्निं यो॒ग आ॑गते यु॒नक्ति॑ यु॒ङ्क्ते
यु॒ञ्जाने॑ष्वग्ने - [] 15

TS 5.5.3.2

यु॒क्ष्वा हि॑ ये तव॑ यु॒क्ष्वा हि॑ दे॒व॒हू॒त॒मा॒ꣳ इ॒त्या॒है॒ष वा॑
 अ॒ग्ने॒र्यो॒ग॒स्ते॒नै॒वैनं॑ यु॒नक्ति॑ यु॒ङ्क्ते यु॒ञ्जाने॑षु ब्र॒ह्म॒वा॒दि॒नो॑ वदन्ति
 न्य॒ङ्कु॒ग्निश्चे॒त॒व्या(३)॑ उ॒त्ता॒ना(३)॑ इति॑ वय॒सां वा॑ ए॒ष प्र॒ति॒मया॑ ची॒यते॑
 यद॒ग्निर्य॒न्यञ्चं॑ चि॒नुयात्॑ पृ॒ष्टित॑ ए॒न॒माहु॑तय ऋ॒च्छेयु॑र्यदु॒त्ता॒नं न
 पति॑तुꣳ शक्नु॒याद॒सुव॒र्ग्योऽस्य॑ स्यात् प्रा॒ची॒नमु॒त्ता॒नं - [] 16

TS 5.5.3.3

पु॒रु॒ष॒शी॒र्ष॒मुप॑ दधाति॑ मु॒ख॒त ए॒वैन॒माहु॑तय ऋ॒च्छन्ति॑ नो॒त्ता॒नं चि॒नुते॑
 सु॒व॒र्ग्योऽस्य॑ भवति॑ सौ॒र्या जु॒होति॑ चक्षु॒रेवा॒स्मिन् प्रति॑ दधाति॑
 द्वि॒र्जु॒होति॑ द्वे हि चक्षु॒षी॒ समा॒न्या जु॒होति॑ समा॒नꣳ हि चक्षुः॑ स॒मृ॒द्ध्यै
 दे॒वा॒सु॒राः सँय॑त्ता आ॒सन् ते॒ वामं॑ व॒सु सं न्य॑दधत तद्-दे॒वा
 वा॒म॒भृ॒ता ऽवृ॑ञ्जत तद्-वा॒म॒भृ॒तो वा॒म॒भृ॒त्त्वं यद्-वा॒म॒भृ॒त ()
 मु॒प॒दधा॑ति वा॒ममे॒व तया॑ व॒सु यज॑मानो भ्रा॒तृ॒व्यस्य॑ वृ॒ङ्क्ते हि॒र॒ण्यमूर्द॑ध्नी
 भवति॑ ज्योति॒र्वै हि॒र॒ण्यं ज्योति॑र्वा॒मं ज्योति॑षै॒वास्य॑ ज्योति॒र्वा॒मं वृ॒ङ्क्ते
 द्वि॒यजु॑र्भवति॑ प्रति॒ष्ठित्यै॑ ॥ 17

(यु॒ञ्जाने॒ष्वग्नै॑-प्रा॒ची॒नमु॒त्ता॒नं - वा॒म॒भृ॒तं - चतु॑र्वि॒ंशति॑श्च) (A3)

TS 5.5.4.1

आपो वरुणस्य पत्नय आसन् ता अग्निरभ्यद्ध्यायत् ताः
 समभवत् तस्य रेतः परा ऽपतत् तदियमभवद्-यद् द्वितीयं परा
 ऽपतत् तदसावभवदियं वै विराडसौ स्वराड् यद्-विराजावुपदधातीमे
 एवोप धत्ते यद्-वा असौ रेतः सिञ्चति तदस्यां प्रति तिष्ठति तत्
 प्र जायते ता ओषधयो - [] 18

TS 5.5.4.2

वीरुधो भवन्ति ता अग्निरत्ति य एवं वैद प्रैव जायते ऽन्नादो भवति
 यो रेतस्वी स्यात् प्रथमायां तस्य चित्यामुभे उप दद्ध्यादिमे एवास्मै
 समीची रेतः सिञ्चतो यः सिक्तेताः स्यात् प्रथमायां तस्य
 चित्यामन्यामुप दद्ध्यादुत्तमायामन्यां रेत एवास्य
 सिक्तेमाभ्यामुभयतः परि गृह्णाति सँवत्सरं न क - [] 19

TS 5.5.4.3

ञ्चन प्रत्यवरोहेन्न हीमे कञ्चन प्रत्यवरोहतस्तदेनयोर्व्रतं
 यो वा अपशीर्षाणमग्निं चिनुते ऽपशीर्षा ऽमुष्मिन् लोके भवति
 यः सशीर्षाणं चिनुते सशीर्षा ऽमुष्मिन् लोके भवति चित्तिं
 जुहोमि मनसा घृतेन यथा देवा इहाऽऽगमन् वीतिहोत्रा ऋतावृधः

समु॒द्रस्य॑ व॒युन॑स्य॒ प॒त्मन् जु॒होमि॑ वि॒श्वक॑र्मणे॒ विश्वा॑ ऽहा ऽम॒र्त्यं
ह॒विरि॑ति॒ स्वय॑मा॒तृ॒ण्णामु॑प॒धाय॑ जु॒होत्ये॑ – [] 20

TS 5.5.4.4

तद्-वा॑ अ॒ग्नेः शि॒रः स॒शीर्षा॑णमे॒वाग्निं॑ चि॒नुते॑ स॒शीर्षा॑ ऽमु॒ष्मिन्
लो॒के भ॑वति॒ य ए॒वं वे॑द सु॒वर्गा॑य॒ वा ए॒ष लो॒काय॑ ची॒यते॑
यद॒ग्निस्त॑स्य॒ यद॑यथापूर्वं क्रि॒यते॑ ऽसु॒वर्ग्य॑म॒स्य तथ्
सु॒वर्ग्यो॑ ऽग्नि॒ श्रिति॑-मु॒पधा॑या॒भि मृ॑शे॒च्चि॒त्तिम॑चि॒त्तिं चि॒नव॑द्-वि
वि॒द्वान् पृ॒ष्ठेव॑ वी॒ता वृ॑जि॒ना च॑ म॒र्तान् रा॒ये च॑ नः॒ स्वप॑त्याय॒ () दे॒व
दि॒तिं च॑ रा॒स्वाद॑िति॒-मु॒रुष्ये॑ति॒ यथा॑पूर्वमे॒वैना॑मु॒प ध॑त्ते प्राञ्चमे॒नं
चि॒नुते॑ सु॒वर्ग्यो॑ ऽस्य॒ भवति॑ ॥ 21

(ओष॑धयः - कं - जु॑होति - स्व॒प॒त्याया॑ - षा॑दश च) (A4)

TS 5.5.5.1

वि॒श्वक॑र्मा दि॒शां प॑तिः स नः॒ पशून् पा॑तु॒ सो ऽस्मा॑न् पा॑तु॒ तस्मै॑ नमः॒
प्र॒जाप॑ती रु॒द्रो व॑रु॒णो ऽग्नि॑दि॒शां प॑तिः स नः॒ पशून् पा॑तु॒ सो ऽस्मा॑न्
पा॑तु॒ तस्मै॑ नम॒ एता॑ वै दे॒वता॑ ए॒तेषां॑ प॒शूना॑-म॒धिप॑तय॒-स्ता॑भ्यो
वा ए॒ष आ वृ॑श्च॒यते॑ यः प॒शुशी॑र्षा॒ण्युप॑दधाति॒ हिर॑ण्येष्ट॒का उप॑
दधा॒त्येता॑भ्य॒ एव॑ दे॒वता॑भ्यो नम॒स्करो॑ति ब्र॒ह्मवा॑दि॒नो - [] 22

TS 5.5.5.2

वदन्त्य॒ग्नौ॒ ग्रा॒म्यान् प॒शून् प्र द॑धाति शु॒चा ऽऽर॑ण्यान॒र्पय॑ति किं
तत॒ उच्छि॑ष्तीति य॒द्धिर॑ण्येष्टका उप॒दधा॑त्यमृतं॒ वै हि॑रण्यममृते॒नैव
ग्रा॒म्येभ्यः॑ प॒शुभ्यो॑ भेषजं करोति नैनान् हिनस्ति प्रा॒णो वै प्र॑थमा
स्वय॑मातृ॒ण्णा व्या॒नो द्वि॒तीया ऽपान॑ स्तृतीया ऽनु प्रा॒ण्यात् प्र॑थमा॒
स्वय॑मातृ॒ण्णामुप॑धाय प्रा॒णेनै॒व प्रा॒णं सम॑र्द्धयति व्य॒न्याद्- [] 23

TS 5.5.5.3

द्वि॒तीया॒मुप॑धाय व्या॒नेनै॒व व्या॒नं सम॑र्द्धयत्य॒पान्यात्
तृतीया॒मुप॑धाया-पानेनै॒वापानं॑ सम॑र्द्धयत्यथो प्रा॒णैरे॒वैनं॑ समि॒न्धे
भूर्भुवः॑ सुव॒रिति॑ स्वय॑मातृ॒ण्णा उप॑ दधातीमे वै लो॒काः स्वय॑मातृ॒ण्णा
ए॒ताभिः॑ खलु॒ वै व्या॑हतीभिः प्र॒जाप॑तिः प्रा॒जाय॑त यदे॒ताभिर्व्या॑हतीभिः
स्वय॑मातृ॒ण्णा उप॑दधाती॒माने॒व लो॒कानु॑प॒धायै॑षु- [] 24

TS 5.5.5.4

लो॒केष्व॑धि प्र जा॒यते प्रा॒णाय॑ व्या॒नाया॑पानाय वा॒चे त्वा चक्षु॑षे
त्वा तया॑ दे॒वतया॑ ऽङ्गि॒रस्वद् ध्रु॒वा सी॑दाग्निना॒ वै दे॒वाः सु॒वर्गं
लो॒कम॑जिगा॒ंसन् तेन॑ पति॒तुं ना॑शक्नुवन् त ए॒ताश्च॑तस्रः
स्वय॑मातृ॒ण्णा अप॑श्यन् ता दि॒क्षूपा॑दधत तेन स॒र्वत॑श्चक्षुषा सु॒वर्गं

लोकमायन् यच्चतस्रः स्वयमातृणा दिक्षूपदधाति सर्वतश्चक्षुषैव
तदग्निना यजमानः () सुवर्गं लोकमेति ॥ 25

(ब्रह्मवादिनो - व्यन्या - देषु - यजमान - स्त्रीणि च) (A5)

TS 5.5.6.1

अग्न आ याहि वीतय इत्याहा-हृतैवैन-मग्निं दूतं वृणीमह इत्याह
हूत्वैवैनं वृणीते ऽग्निनाऽग्निः समिद्ध्यत इत्याह समिन्ध
एवैनमग्निर्वृत्राणि जङ्घनदित्याह समिद्ध एवास्मिन्निन्द्रियं दधात्यग्नेः
स्तोमं मनामह इत्याह मनुत एवैनमेतानि वा अहाँ रूपाण्य - [] 26

TS 5.5.6.2

-न्वहमेवैनं चिनुते ऽवाहाँ रूपाणि रुन्धे ब्रह्मवादिनो वदन्ति
कस्मात् सत्याद्यातयाम्नीरन्या इष्टका अयातयाम्नी लोकंपृणेत्यैन्द्राग्नी
हि बार्हस्पत्येति ब्रूयादिन्द्राग्नी च हि देवानां
बृहस्पतिश्चा-यातयामानो ऽनुचरवती भवत्यजामित्वाया-नुष्टुभा ऽनु
चरत्यात्मा वै लोकं पृणा प्राणो ऽनुष्टुप् तस्मात् प्राणः सर्वाण्यङ्गान्यनु
चरति ता अस्य सूददोहस - [] 27

TS 5.5.6.3

इ॒त्याह॑ तस्मा॒त् प॒रुषि॑प॒रुषि॑ र॒सः सोम॑ऽ श्री॒णन्ति॑ पृ॒श्नय॑ इ॒त्याहा॒न्नं
 वै पृ॒श्न्यन्न॑मे॒वाव रु॒न्धेऽर्को॑ वा अ॒ग्नि-र॒र्को ऽन्न॑म॒न्नमे॒वाव रु॒न्धे
 जन्म॑न् दे॒वानां॑ वि॒श स्त्रि॑ष्वा रो॒चने॑ दि॒व इ॒त्याहे॑मा॒नेवा॒स्मै लो॒कान्
 ज्योति॑ष्म॒तः करो॑ति यो वा इ॒ष्टका॑नां प्र॒तिष्ठां॑ वैद॒ प्रत्ये॑व तिष्ठति
 तया॑ () दे॒वत॑या ऽङ्गि॒रस्वद् ध्रु॒वा सी॒देत्या॑हैषा वा इ॒ष्टका॑नां प्र॒तिष्ठा
 य ए॒वं वैद॒ प्रत्ये॑व तिष्ठति ॥ 28

(रूपाणि - सूददोहस - स्तया - षोडश च) (A6)

TS 5.5.7.1

सु॒वर्गाय॑ वा ए॒ष लो॒काय॑ ची॒यते॑ यद॒ग्निर्वज्र॑ ए॒काद॑शिनी
 यद॒ग्नावे॑का॒दशि॑नीं॑ मि॒नुयाद्-वज्रे॑णै॒नऽ सु॒वर्गा ल्लो॒काद॑न्त॒र्दद्ध्य॑द्
 यन्न॑ मि॒नुया॑त् स्वरु॒भिः प॒शून् व्य॑र्द्धये॒देक॑यूपं मि॒नोति॑ नैनं॒ वज्रे॑ण
 सु॒वर्गा ल्लो॒काद॑न्त॒र्दधा॑ति न स्वरु॒भिः प॒शून् व्य॑र्द्धयति वि॒ वा ए॒ष
 इन्द्रि॑येण वी॒र्ये॑ण॒र्द्ध्यते॑ योऽग्निं॒ चिन्व॑-न्न॒धिक्र॑ामत्यैन्द्रि॒य- [] 29

TS 5.5.7.2

-र्चा ऽऽक्र॑मणं प्र॒तीष्ट॑कामुप॒ दद्ध्य॑न्नेन्द्रि॒येण॑ वी॒र्ये॑ण व्य॒र्द्ध्यते॑
 रु॒द्रो वा ए॒ष यद॑ग्नि॒ स्तस्य॑ ति॒स्रः श॒रव्याः॑ प्र॒तीची॑ ति॒रश्च॑य॒नूची॑

ताभ्यो॑ वा ए॒ष आ वृ॑क्ष्यते यो॑ ऽग्निं॑ चि॒नुते॑ ऽग्निं॑ चित्वा
 तिसृ॑धन्व-मया॑चितं ब्राह्म॑णाय दद्यात् ताभ्य॑ ए॒व नम॑स्करोत्यथो॑ ताभ्य॑
 ए॒वाऽऽत्मानं॑ निष्क्री॑णीते यत्ते॑ रु॒द्र पु॒रो - [] 30

TS 5.5.7.3

धनु॑ स्तद्-वातो॑ अनु॑ वातु ते॒ तस्मै॑ ते रु॒द्र सँव॑थ्सरेण नम॑स्करोमि
 यत्ते॑ रु॒द्र दक्षि॑णा धनु॑ स्तद्-वातो॑ अनु॑ वातु ते॒ तस्मै॑ ते रु॒द्र
 परिव॑थ्सरेण नम॑स्करोमि यत्ते॑ रु॒द्र पश्चा॑द्-धनु॑-स्तद्-वातो॑ अनु॑
 वातु ते॒ तस्मै॑ ते रु॒द्रेदा॑वथ्सरेण नम॑स्करोमि यत्ते॑

रु॒द्रोत्तरा॑द्-धनु॑स्तद् - [] 31

TS 5.5.7.4

वातो॑ अनु॑ वातु ते॒ तस्मै॑ ते रु॒द्रेदु॑वथ्सरेण नम॑स्करोमि यत्ते॑ रु॒द्रोपरि॑
 धनु॑ स्तद्-वातो॑ अनु॑ वातु ते॒ तस्मै॑ ते रु॒द्र व॑थ्सरेण नम॑स्करोमि रु॒द्रो
 वा ए॒ष यद॑ग्निः स यथा॑ व्याघ्रः॑ कु॒ब्ध स्तिष्ठ॑त्येवं वा॑ ए॒ष ए॒तर्हि॑
 सञ्चित॑मेतैरुप तिष्ठते नम॑स्कारैरे॒वैनं॑ शमयति॑ ये॒ ऽग्नयः॑ - [] 32

TS 5.5.7.5

पुरी॑ष्याः प्रवि॑ष्टाः पृथि॑वीमनु॑ ।
 तेषां॑ त्वम॑स्युत्तमः प्र॒णो जी॒वात॑वे सुव ॥

आपं॑ त्वा॒ ऽग्ने॒ मन॒सा ऽऽपं॑ त्वा॒ ऽग्ने॒ तप॒सा ऽऽपं॑ त्वा॒ ऽग्ने॒ दी॒क्षया॒
 ऽऽपं॑ त्वा॒ऽग्ने॒ उप॒स॒द्भि-रापं॑ त्वा॒ऽग्ने॒ सु॒त्यया॒ऽऽपं॑ त्वा॒ऽग्ने॒
 दक्षि॑णाभि-रापं॑ त्वा॒ ऽग्ने॒ ऽव॒भृ॒थेनापं॑ त्वा॒ ऽग्ने॒ व॒शया॒ ऽऽपं॑ त्वा॒ऽग्ने॒
 स्व॒गाका॒रेणे॒त्याहै॒ () षा॒ वा अ॒ग्ने-राप्ति॑ स्तयै॒वैन-मा॒प्नोति॑ ॥ 33

(ऐ॒न्द्रिया॒ - पु॒र - उ॒त्तरा॒ध्व॒नुस्त- द॒ग्नय॑ - आ॒हा - षौ च॑) (A7)

TS 5.5.8.1

गा॒य॒त्रेण॑ पु॒रस्ता॒दुप॑ तिष्ठते प्रा॒णमे॒वास्मिन्॑ दधाति बृ॒ह॒द्रथ॑न्तरा॒भ्यां॑
 प॒क्षावो॑ज ए॒वास्मिन्॑ दधात्यृ॒तु॒स्था॒य॒ज्ञा॒य॒ज्ञि॒येन॑ पु॒च्छ॒मृ॒तु॒ष्वेव॑ प्रति॑
 तिष्ठति॑ पृ॒ष्ठैरु॒प तिष्ठते॑ ते॒जो वै पृ॒ष्ठानि॑ तेज ए॒वास्मिन्॑ दधाति
 प्र॒जाप॑तिर॒ग्निम॑सृजत सो॒ऽऽस्मा॒त् सृष्टः॑ प॒राडै॒त् तं वा॑रव॒न्तीये॑ना-
 वा॒रय॑त तद्-वा॒रव॒न्तीय॑स्य वा॒रव॒न्तीय॑त्व॒ इयै॑तेन॑ इ॒येती॑ अ॒कुरु॑त
 तच्छ॒यैत॑स्य इ॒यैत॑त्वं - [] 34

TS 5.5.8.2

यद्-वा॒रव॒न्तीये॑नोपतिष्ठते वा॒रय॑त ए॒वैन॑ इ॒यैतेन॑ इ॒येती॑ कुरुते
 प्र॒जाप॑तेर्हृ॒दये॑ना-पिपक्षं प्रत्यु॒प तिष्ठते॑ प्रे॒माण॑मे॒वा॒स्य ग॑च्छति
 प्रा॒च्या त्वा दि॒शा सा॒दयामि॑ गा॒य॒त्रेण॑ छ॒न्दसा॒ ऽग्नि॑ना दे॒वत॑या॒ ऽग्नेः॑
 शी॒र्ष्णाग्नेः॑ शि॒र उप॑ दधामि दक्षि॑णया त्वा दि॒शा सा॒दयामि॑

त्रैष्टु॒भेन॑ छ॒न्दसे॒न्द्रेण॑ दे॒वत॑या ऽग्नेः पक्षे॒णाग्नेः॑ पक्षमु॒प द॑धामि
प्रती॒च्या॑ त्वा दि॒शा सा॒दयामि॑ – [] 35

TS 5.5.8.3

जा॒गते॑न छ॒न्दसा॑ सवि॒त्रा दे॒वत॑या ऽग्नेः पु॒च्छेना॑ग्नेः पु॒च्छमु॒प
द॑धाम्युदी॒च्या॑ त्वा दि॒शा सा॒दयाम्या॑नुष्टु॒भेन॑ छ॒न्दसा॑ मि॒त्राव॑रुणाभ्यां
दे॒वत॑या ऽग्नेः पक्षे॒णाग्नेः॑ पक्षमु॒प द॑धाम्यूर्ध्व॒या त्वा दि॒शा सा॒दयामि॑
पा॒ङ्केन॑ छ॒न्दसा॑ बृ॒हस्प॑तिना दे॒वत॑या ऽग्नेः पृ॒ष्ठेना॑ग्नेः पृ॒ष्ठमु॒प द॑धामि
यो वा अ॒पा॒त्मान॑मग्निं चि॒नुते॑ ऽपा॒त्मा ऽमु॒ष्मिन् लो॒के भ॑वति यः
सा॒त्मानं॑ चि॒नुते॑ () सा॒त्मा ऽमु॒ष्मिन् लो॒के भ॑वत्या॒त्मेष्ट॑का उप
द॑धात्येष वा अ॒ग्नेरा॒त्मा सा॒त्मान॑मेवाग्निं चि॒नुते॑ सा॒त्मा ऽमु॒ष्मिन्
लो॒के भ॑वति य एवं वे॒द ॥ 36 (इ॒यैत॑त्त्वं – प्रती॒च्या॑ त्वा दि॒शा
सा॒दयामि॑ – यः सा॒त्मानं॑ चि॒नुते॑ – द्वाविं॑शतिश्च) (A8)

TS 5.5.9.1

अ॒ग्न उ॒दधे॑ या त इ॒षुर्यु॑वा ना॒म तया॑ नो मृ॒ड तस्या॑स्ते न॒म स्तस्या॑
स्त उप जी॒वन्तो॑ भूया॒स्माग्ने॑ दु॒ध्र ग॒ह्य किं॑श्चि॒ल व॒न्य या त

इषुर्यु॒वा नाम॒ तया॒ नो मृ॒ड तस्या॒स्ते नम॒ स्तस्या॒ स्त उप॒ जीव॒न्तो
भूया॒स्म पञ्च॒ वा ए॒तेऽग्नयो॒ यच्चि॒तय॒ उद॒धिरे॒व नाम॒ प्रथ॒मो

दु॒द्ध्रो- [] 37

TS 5.5.9.2

द्वि॒तीयो ग॒ह्यस्तृ॒तीयः॑ कि॒ञ्शिल॑श्चतु॒र्थो व॒न्यः पञ्च॒मस्तेभ्यो॒
यदाहु॑तीर्न जुहु॒याद॑ध्व॒र्युं च यज॑मानं च प्र द॒हेयु॑र्यदे॒ता
आहु॑तीर्जु॒होति॑ भा॒गधे॒येनै॒वैना॒ञ्छम॑यति नाऽऽ*ति॒माच्छ॑त्य॒ध्वर्यु॑र्न
यज॑मानो वाङ् म आ॒सन् न॒सोः प्रा॒णोऽक्ष्यो॑श्चक्षुः कर्ण॑योः श्रो॒त्रं
बाहु॑वोर्बल-मू॒रुवो॑रोजोऽरि॒ष्टा वि॒श्वान्य॑ङ्गानि त॒नू - [] 38

TS 5.5.9.3

-स्तनु॑वा मे सह नम॒स्ते अस्तु॒ मा मा हि॒ञ्सीर॑प वा ए॒तस्मात्
प्रा॒णाः क्रा॑मन्ति यो ऽग्निं चि॒न्व-न्न॑धि॒क्राम॑ति वाङ् म आ॒सन् न॒सोः
प्रा॒ण इ॒त्याह॑ प्रा॒णाने॒वाऽऽत्म॑न् ध॒त्ते यो रु॒द्रो अ॒ग्नौ यो अ॒प्सु
य ओष॑धीषु यो रु॒द्रो वि॒श्वा भु॒वना ऽऽवि॑वेश तस्मै रु॒द्राय॑ नमो
अ॒स्त्वाहु॑तिभा॒गा वा अ॒न्ये रु॒द्रा ह॒विर्भा॑गा - [] 39

TS 5.5.9.4

अ॒न्ये श॑तरु॒द्रीय॑ꣳ हु॒त्वा गा॑वी॒धुकं॑ च॒रुमे॑तेन यजु॑षा च॒रमा॑यामिष्ट॑कायां
 नि द॑द्ध्याद्-भा॒गधे॑र्ये॒नैवैन॑ꣳ श॒मय॑ति तस्य त्वै श॑तरु॒द्रीय॑ꣳ
 हु॒तमि॑त्याहु॒र्यस्यै॑तद॒ग्नौ क्रि॑यत इति व॒सव॑स्त्वा रु॒द्रैः पु॒रस्ता॑त् पा॒न्तु
 पि॒तर॑स्त्वा यम॒राजा॑नः पि॒तृभिर्द॑क्षिणतः पा॒न्त्वादित्या॑स्त्वा वि॒श्वैर्दे॑वैः
 प॒श्चात् पा॑न्तु द्यु॒तान॑ स्त्वा मा॒रुतो॑ म॒रुद्धि॑-रु॒त्तर॑तः पा॒तु - [] 40

TS 5.5.9.5

दे॒वास्त्वेन्द्र॑ज्ये॒ष्ठा व॑रु॒णरा॑जानो ऽध॒स्ताच्चो॑-प॒रिष्ठा॑च्च पा॒न्तु
 न वा ए॒तेन॑ पू॒तो न मे॑द्ध्यो न प्रो॒क्षितो॑ यदे॒नमतः॑ प्रा॒चीनं॑ प्रो॒क्षति॑
 यथ् स॒ज्चित॑मा॒ज्येन॑ प्रो॒क्षति॑ तेन पू॒तस्तेन॑ मे॒द्ध्यस्तेन॑ प्रो॒क्षितः॑ ॥ 41

(दु॒ध्र - स्त॒नूर - ह॒विर्भा॑गाः - पा॒तु - द्वा॒त्रिंश॑च्च) (A9)

TS 5.5.10.1

समी॑ची॒ नामा॑सि प्रा॒ची दिक् तस्या॑स्ते ऽग्नि॑रधि॒पति॑ र॒सितो॑ र॒क्षिता॑
 यश्चा॑धि॒पति॑ र्यश्च गो॒प्ता ता॑भ्यां नम॒स्तौ नो॑ मृ॒डय॑तां ते यं द्वि॒ष्मो यश्च॑
 नो द्वेष्टि॑ तं वां जं॒भे द॑धाम्यो॒जस्वि॑नी॒ नामा॑सि दक्षि॒णा दिक्
 तस्या॑स्त इन्द्रो॒ ऽधि॑पतिः पृ॒दाकुः॑ प्रा॒ची नामा॑सि प्र॒तीची॑
 दिक् तस्या॑स्ते - [] 42

TS 5.5.10.2

सोमो ऽधिपतिः स्वजो ऽवस्थावा नामा-स्युदीची दिक् तस्यास्ते
वरुणोऽधिपति-स्तिरश्च राजिरधिपत्नी नामासि बृहती दिक् तस्यास्ते
बृहस्पति-रधिपतिः श्वित्रो वशिनी नामासीयं दिक् तस्यास्ते
यमो ऽधिपतिः कल्माषग्रीवो रक्षिता यश्चाधिपति र्यश्च गोप्ता ताभ्यां
नमस्तौ नो मृडयतां ते यं द्विष्मो यश्च - [] 43

TS 5.5.10.3

नो द्वेष्टि तं वां जंभे दधाम्येता वै देवता अग्निं चित् रक्षन्ति
ताभ्यो यदाहुतीर्न जुहुयादध्वर्युं च यजमानं च ध्यायेयुर्यदेता
आहुतीर्जुहोति भागधेयेनैवैनाञ्छमयति नाऽऽ*र्तिमाच्छत्यध्वर्युर्न
यजमानो हेतयो नाम स्थ तेषां वः पुरो गृहा अग्निर्व इषवः
सलिलो निलिंपा नाम - [] 44

TS 5.5.10.4

स्थ तेषां वो दक्षिणा गृहाः पितरो व इषवः सगरो वज्रिणो नाम स्थ
तेषां वः पश्चाद् गृहाः स्वप्नो व इषवो गह्वरो ऽवस्थावानो नाम स्थ
तेषां व उत्तराद् गृहा आपो व इषवः समुद्रो ऽधिपतयो नाम स्थ

तेषां॑ ँ॒ उप॒रि॒ गृ॒हा॒ व॒र्षं॑ ँ॒ व॒ इ॒ष॒वो॒ऽव॒स्वान् क्र॒व्या॒ नाम॒ स्थ॒
पा॒र्त्वि॒वा-स्तेषां॑ ँ॒ व॒ इ॒ह गृ॒हा - [] 45

TS 5.5.10.5

अ॒न्नं॑ ँ॒ व॒ इ॒ष॒वो॒ ऽनि॒मि॒षो॒ वा॒तना॒मं ते॒भ्यो॒ वो॒ नम॒स्ते नो॒ मृ॒डय॒त॒
ते॒ यं द्वि॒ष्मो॒ यश्च॑ नो॒ द्वेष्टि॒ तं॑ वो॒ जं॒भे द॒धामि॒ हु॒तादो॒ वा अ॒न्ये दे॒वा
अ॒हु॒तादो॒ ऽन्ये॒ तान॒ग्नि॒चिदे॒वोभ॑यान् प्री॒णाति॒ द॒ध्ना म॒धुमि॒श्रेणै॒ता
आ॒हु॒तीर्जु॒होति॒ भा॒ग॒धेये॒नैवै॑नान् प्री॒णात्य॒थो ख॒ल्वाहु॒रिष्ट॒का वै दे॒वा
अ॒हु॒ताद॒ इत्य॑ - [] 46

TS 5.5.10.6

-नु॒प॒रि॒क्रामं॑ जु॒होत्य॑प॒रि॒वर्ग॑मे॒वैनान्॑ प्री॒णाती॒म॒ स्तन॒मूर्ज॑स्वन्तं
ध॒यापां॑ प्र॒प्यात॑म॒ग्ने स॒रि॒रस्य॑ म॒द्ध्यै ।
उ॒थ्सं॑ जु॒षस्व॑ म॒धुम॑न्त॒मूर्व॑ स॒मु॒द्रिय॑ स॒दन॑मा॒ विश॑स्व ॥
यो॒ वा अ॒ग्निं प्र॑युज्य न वि॒मुञ्च॑ति यथा॒ ऽश्वो॑ यु॒क्तो॒ऽवि॒मुच्य॑मानः
क्षु॒द्ध्यन्॑ प॒राभ॑वत्ये॒वम॑स्या॒ग्निः प॒रा भ॑वति तं प॒राभ॑वन्तं॒ यज॑मानो
ऽनु॒ प॒रा भ॑वति सो॒ ऽग्निं॑ चि॒त्वा लू॒क्षो - [] 47

TS 5.5.10.7

भवती॑म॒ स्तन॑मूर्ज॑स्वन्तं॒ धया॑पामित्याज्य॑स्य पूर्णा॑ सु॒चं जु॑होत्येष॒
वा अ॒ग्नेर्वि॑मो॒को वि॒मुच्यै॑वास्मा॒ अन्न॑मपि॒ दधा॑ति तस्मा॑दाहु॒र्यश्चै॑वं
वे॒द यश्च॑ न सु॒धाय॑ ह॒ वै वा॒जी सु॑हितो दधातीत्यग्नि॒र्वाव वा॒जी
तमे॒व तत् प्री॑णाति स ए॒नं प्री॑तः प्री॒णाति व॑सीयान् भवति () ॥ 48

(प्र॒तीची॒ दि॒क्तस्या॑स्ते-द्वि॒ष्मो यश्च॑-नि॒लिम्पा॒ ना-मे॒ ह गृ॒हा-इति॑-
लू॒क्षो-व॑सीयान् भवति) (A10)

TS 5.5.11.1

इन्द्रा॑य रा॒ज्ञे सू॒करो व॑रुणाय रा॒ज्ञे कृ॒ष्णो य॑माय रा॒ज्ञ ऋ॒श्य ऋ॒षभा॑य
रा॒ज्ञे ग॒वयः॑ शा॒र्दूला॑य रा॒ज्ञे गौ॒रः पु॒रुष॑राजाय म॒र्कटः॑ क्षिप्र॒श्येन॑स्य
वर्ति॑का नील॒ङ्गोः क्रि॒मिः सोम॑स्य रा॒ज्ञः कु॒लुङ्गः॑ सिन्धोः॑

शि॒शु॒मारो॑ हि॒मव॑तो ह॒स्ती ॥ 49 (इन्द्रा॑य रा॒ज्ञे-ऽष्टा॑वि॒शतिः॑) (A11)

TS 5.5.12.1

म॒युः प्रा॒जाप॑त्य ऊ॒लो ह॒लीक्ष्णो॑ वृष॒द॒शस्ते॑ धातुः सर॒स्वत्यै॑
शा॒रिः श्ये॒ता पु॒रुष॑वाख् सर॒स्वते॑ शु॒कः श्ये॒तः पु॒रुष॑वागा॒रण्योऽजो॑
नकु॑लः श॒का ते पौ॑ष्णा वा॒चे क्रौ॒ञ्चः ॥ 50

(म॒यु - स्त्रयो॑वि॒शतिः॑) (A12)

TS 5.5.13.1

अपां॑ न॒प्त्रे जषो॑ ना॒क्रो म॒करः कु॒लीक॑यस्तेऽ॒कूपार॑स्य वा॒चे
पैङ्ग॑रा॒जो भ॒गाय॑ कु॒षीत॑क आ॒ती वा॒हसो॑ दर्वि॒दा ते वा॑यव्या
दिग्भ्यश्च॑क्रवाकः ॥ 51 (अ॒पा - मे॒कान्न॑वि॒ंशतिः॑) (A13)

TS 5.5.14.1

ब॒लाया॑जगर आ॒खुः सृ॒जया॑ शयण्डकस्ते मै॒त्रा मृ॒त्यवे॑ ऽसि॒तो
म॒न्यवे॑ स्वजः कुं॒भीन॑सः पु॒ष्कर॑सादो लो॒हिता॑हिस्ते त्वाष्ट्राः
प्रति॑श्रु॒त्कायै॑ वा॒हसः॑ ॥ 52 (ब॒लाया॑ - ष॒दश॑) (A14)

TS 5.5.15.1

पु॒रुष॑मृ॒गश्च॑न्द्रम॒से गो॒धा का॒लका॑ दा॒र्वाघा॑टस्ते वनस्प॒तीना॑मे॒ण्यहे॑
कृ॒ष्णो रा॒त्रियै॑ पि॒कः क्षि॒वङ्गा नी॒लशी॑र्ष्णी ते ऽ॒र्यम्णे॑ धा॒तुः
क॒त्कटः॑ ॥ 53

(पु॒रुष॑मृ॒गो-ष॒दश॑) (A15)

TS 5.5.16.1

सौरी॑ ब॒लाक॑श्यो म॒यूरः श्ये॑नस्ते ग॒न्धर्वा॑णां व॒सूनां॑ क॒पिञ्ज॑लो
रु॒द्राणां॑ ति॒त्तिरी॑ रो॒हित् कु॑ण्ड॒णाची॑ गो॒लत्ति॑का ता अ॒प्सर॑सा-
म॒रण्या॑य सृ॒मरः॑ ॥ 54

(सौ-र्य॑ष॒दश॑) (A16)

TS 5.5.17.1

पृ॒षतो॑ वै॒श्वदे॒वः पि॒त्वो न्य॒ङ्कुः क॒श स्ते॑ ऽनु॒मत्या॑ अ॒न्यवा॒पो॑
 ऽर्ध॒मासा॑नां मा॒सां क॒श्यपः॑ क्वयिः कु॒टरु॑र्दात्यौहस्ते सि॒नीवा॒ल्यै
 बृ॒हस्प॑तये शि॒त्पुटः॑ ॥ 55 (पृ॒षतो॑ - ऽष्टा॒दश) (A17)

TS 5.5.18.1

श॒का भौ॒मी पा॒न्त्रः क॒शो मा॒न्थील॑वस्ते पि॒तृणा॑मृ॒तूनां॑ ज॒हका॑
 सँव॒थ्सरा॑य लो॒पा क॒पोत॑ उ॒लूकः॑ श॒शस्ते॑ नैर्ऋ॒ताः कृ॒कवा॑कुः
 सा॒वित्रः॑ ॥ 56 (श॒का - ऽष्टा॒दश) (A18)

TS 5.5.19.1

रु॒रु रौ॒द्रः कृ॒कला॑सः श॒कुनिः॑ पि॒प्पका॑ ते श॒रव्या॑यै ह॒रिणो॑ मा॒रुतो॑
 ब्र॒ह्मणे॑ शा॒र्गस्तर॑क्षुः कृ॒ष्णः श्वा च॑तु॒रक्षो॑ गर्द॒भस्त॑ इ॒तरज॑नाना॒मग्न॑ये
 धू॒ङ्क्षणा॑ ॥ 57 (रु॒रु - विं॒शतिः) (A19)

TS 5.5.20.1

अ॒लज॑ आ॒न्तरि॑क्ष उ॒द्रो म॒द्गुः प्ल॒व स्ते॑ ऽपा॒मदि॑त्यै
 ह॒ससा॑चि॒रिन्द्रा॑ण्यै की॒र्शा गृ॒द्ध्रः शि॒तिक॑क्षी वा॒र्द्ध्राण॑सस्ते
 दि॒व्या द्या॑वापृ॒थिव्या॑ श्वा॒वित् ॥ 58
 (अ॒लजो॑ - ऽष्टा॒दश) (A20)

TS 5.5.21.1

सु॒पर्णः॑ पा॒र्जन्यो॑ ह॒सो वृ॒को वृष॑द॒शस्त॑ ऐ॒न्द्रा अपा॑मु॒द्रौ ऽर्य॑म्णे
लो॒पाशः॑ सि॒हो न॒कुलो॑ व्याघ्र॒स्ते महे॑न्द्राय॒ कामा॑य॒ पर॑स्वान् ॥ 59

(सु॒पर्णो – ऽष्टा॑दश) (A21)

TS 5.5.22.1

आ॒ग्नेयः॑ कृ॒ष्णाग्री॑वः सा॒रस्व॑ती मे॒षी ब॒भ्रुः सौ॒म्यः पौ॒ष्णः श्या॑मः
शि॒तिपृ॑ष्ठो बा॒र्हस्प॑त्यः शिल्पो॑ वै॒श्वदे॑व ऐ॒न्द्रो ऽरु॑णो मा॒रुतः॑ क॒ल्माष॑
ऐ॒न्द्रा॒ग्नः स॒हितो॑ ऽधो॒रामः॑ सा॒वित्रो॑ वा॒रुणः॑ पे॒त्वः ॥ 60

(आ॒ग्नेयो – द्वावि॑ंशतिः) (A22)

TS 5.5.23.1

अ॒श्वस्तू॑परो गो॒मृग॑स्ते प्रा॒जाप॑त्या आ॒ग्नेयौ॑ कृ॒ष्णाग्री॑वौ त्वाष्ट्रौ
लो॒मश॑स॒क्थौ शि॒तिपृ॑ष्ठौ बा॒र्हस्प॑त्यौ धा॒त्रे पृ॑षो॒दरः॑ सौ॒र्यो
ब॒लक्षः॑ पे॒त्वः ॥ 61 (अ॒श्वः – षोड॑श) (A23)

TS 5.5.24.1

अ॒ग्नये॑ऽनी॒कव॑ते रोहि॒ताज्जि॑-र॒नड्वा॑न॒धोरा॑मौ सा॒वित्रौ॑ पौ॒ष्णौ
र॒जत॑ना॒भी वै॒श्वदे॑वौ पि॒शङ्गौ॑ तू॒परौ॑ मा॒रुतः॑ क॒ल्माष॑ आ॒ग्नेयः॑
कृ॒ष्णो ऽजः॑ सा॒रस्व॑ती मे॒षी वा॒रुणः॑ कृ॒ष्ण ए॒कशि॑तिपा॒त् पे॒त्वः ॥ 62

(अ॒ग्नये – द्वावि॑ंशतिः) (A24)

Prasna Korvai with starting Padams of 1 to 24 Anuvaakams :-

(यदेकेन - प्रजापतिः प्रेणाऽनु - यजुषा - ऽऽपो - विश्वकर्मा -
ऽग्न आ याहि - सुवर्गाय वज्रो - गायत्रेणा - ग्न उदधे - समीची
- न्द्राय - मयु - रपां - बलाय - पुरुषमृगः - सौरी - पृषतः -
शका - रुरु - रलजः - सुपर्ण - आग्नेयो - ऽश्वो -
ऽग्नयेऽनीकवते - चतुर्विंशतिः)

Korvai with starting Padams of 1, 11, 21 Series of Panchaatis :-

(यदेकेन - स पापीया - नेतद्वा अग्ने - र्धनुस्तद् -
देवास्त्वेन्द्रज्येष्ठा - अपां नप्त्रे - ऽश्वस्तूपरो - द्विषष्टिः)

First and Last Padam of Fifth Prasnam of 5th Kandam

(यदेके - नैकशितिपात् पेट्वः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे पञ्चमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.6 पञ्चमकाण्डे षष्ठः प्रश्नः – उपानुवाक्याभिधानं

TS 5.6.1.1

हिरण्यवर्णाः शुचयः पावका यासु जातः कश्यपो यास्विन्द्रः ।
अग्निं या गर्भं दधिरे विरूपास्ता न आपः श७ स्योना भवन्तु ॥
यासां राजा वरुणो याति मद्ध्ये सत्यानृते अवपश्यन् जनानां ।
मधुश्रुतः शुचयो याः पावकास्ता न आपः श७ स्योना भवन्तु ॥
यासां देवा दिवि कृण्वन्ति भक्षं या अन्तरिक्षे बहुधा भवन्ति ।
याः पृथिवीं पयसोन्दन्ति – [] 1

TS 5.6.1.2

शुक्रास्ता न आपः श७ स्योना भवन्तु ॥
शिवेन मा चक्षुषा पश्यताऽऽपः शिवया तनुवोप स्पृशत त्वचं मे ।
सर्वां अग्नीं रप्सुषदो हुवे वो मयि वर्चो बलमोजो नि धत्त ॥
यददः संप्रयती-रहावनदता हते ।
तस्मादा नद्यो नाम स्थ ता वो नामानि सिन्धवः ॥
यत् प्रेषिता वरुणेन ताः शीभं समवल्गात । 2

TS 5.6.1.3

तदा॑प्नो॒-दिन्द्रो॑ वो॒ यती॑-स्तस्मा॒-दापो॑ अनु॒ स्थन॑ ॥
 अप॒काम॑ꣳ स्यन्द॑माना॒ अवी॑वरत॒ वो हि॑कं ॥
 इन्द्रो॑ वः शक्ति॑भि दे॒वी-स्तस्मा॒द्-वा॒र्णामि॑ वो हि॒तं ॥
 ए॒को दे॒वो अप्य॑तिष्ठथ् स्यन्द॑माना यथा व॒शं ।
 उ॒दानि॑षु-र्महीरि॒ति तस्मा॑-दु॒दक॑-मु॒च्यते॑ ॥
 आपो॑ भ॒द्रा घृ॒तमि॑दाप॒ आसु॑-र॒ग्नीषो॑मौ बिभ्र॒त्याप॑ इत् ताः ।
 ती॒व्रो र॒सो म॑धुपृ॒चा - [] ३

TS 5.6.1.4

-म॒रंग॑म आ मा॒ प्राणे॑न॒ सह॑ वर्च॒सा ग॑न् ॥
 आ॒दि॒त् प॑श्याम्यु॒त वा॑ शृ॒णो॒म्या मा॑ घो॒षो ग॑च्छति वाङ् न आ॒सां ।
 म॒न्ये भे॑जानो अ॒मृत॑स्य तर्हि॒ हिर॑ण्यव॒र्णा अ॑तृपं य॒दा वः॑ ॥
 आपो॑ हि ष्टा॒ मयो॑ भुव॒स्ता न ऊ॒र्जे द॑धातन ।
 म॒हे र॑णाय चक्ष॒से ॥
 यो वः॑ शि॒वत॑मो र॒सस्त॑स्य भाज॒यते॑ह नः ।
 उ॒शती॑रिव मा॒तरः॑ () ॥
 तस्मा॑ अ॒रं ग॑माम॒ वो य॒स्य क्ष॑याय जि॒न्वथ॑ ।

आपो **जनयथा** च नः ॥

दिवि श्रयस्वान्तरिक्षे यतस्व पृथिव्या सं भव ब्रह्मवर्चस-मसि
ब्रह्मवर्चसाय त्वा ॥ 4 (उन्दन्ति - समवल्गात - मधुपृचां - मातरो
- द्वाविंशतिश्च) (A1)

TS 5.6.2.1

अपां ग्रहान् गृह्णात्येतद्-वाव राजसूयं यदेते ग्रहाः सवो
ऽग्निर्वरुणसवो राजसूय-मग्निसव-श्चित्य स्ताभ्या-मेव सूयतेऽथो
उभावेव लोकावभि जयति यश्च राजसूयेनेजानस्य यश्चाऽग्निचित
आपो भवन्त्यापो वा अग्नेर्भ्रातृव्या यदपो ऽग्ने-रधस्तादुप दधाति
भ्रातृव्याभिभूत्यै भवत्यात्मना पराऽस्य भ्रातृव्यो भवत्यमृतं - [] 5

TS 5.6.2.2

ँवा आपस्तस्मा-दद्भिरवतान्त-मभि षिञ्चन्ति नाऽऽर्तिमाच्छति
सर्वमायुरेति यस्यैता उपधीयन्ते य उ चैना एवं वेदान्नं वा आपः
पशव आपो ऽन्नं पशवो ऽन्नादः पशुमान् भवति यस्यैता उपधीयन्ते
य उ चैना एवं वेद द्वादश भवन्ति द्वादश मासाः सँवथ्सरः
सँवथ्सरेणैवास्मा - [] 6

TS 5.6.2.3

अ॒न्नम॒व रु॒न्धे पा॒त्राणि॑ भव॒न्ति पा॒त्रे वा अ॒न्नम॒द्यते॑ स॒योन्ये॑वा॒न्नम॒व
रु॒न्ध आ द्वा॒दशा॑त् पु॒रुषा॑द॒न्न-म॒त्यथो॑ पा॒त्रान्न॑ छि॒द्यते॑ य॒स्यैता॑
उप॒धी॒यन्ते॑ य उ चै॒ना ए॒वं वै॒द कुं॒भाश्च॑ कुं॒भीश्च॑ मि॒थुना॑नि भव॒न्ति
मि॒थुन॑स्य प्र॒जात्यै॑ प्र प्र॒जया॑ प॒शुभि॑-मि॒थुनै॑-जा॒यते॑ य॒स्यैता॑
उप॒धी॒यन्ते॑ य उ - [] 7

TS 5.6.2.4

चै॒ना ए॒वं वै॒द शु॒ग्-वा अ॒ग्निः सो॑ ऽ॒ध्वर्यु॑ य॒जमा॑नं प्र॒जाः
शु॒चा ऽर्प॑यति यदप॑ उप॒दधा॑ति शु॒चमे॒वा॒स्य श॑मयति
नाऽऽ॒र्तिमा॑च्छत्य॒ध्वर्यु॑र्न य॒जमा॑नः शा॒म्यन्ति॑ प्र॒जा यत्रै॑ता उप॒धी॒यन्ते॑
ऽपां॑ वा ए॒तानि॑ हृद॒यानि॑ यदे॒ता आ॒पो यदे॒ता अप॑ उप॒दधा॑ति
दि॒व्याभि॑रे॒वैनाः॑ सꣳ सृ॒जति॑ वर्॒षुकः॑ पर्ज॒न्यो - [] 8

TS 5.6.2.5

भव॑ति यो वा ए॒तासा॑-मा॒यत॑नं क्लृ॒प्तिं वै॒दाऽऽय॑तनवान् भव॑ति
क्ल॒पते॑ ऽस्मा अनु॒सीत॑-मुप॑ दधात्ये॒तद्-वा आ॑सामा॒यत॑नमेषा
क्लृ॒प्तिर्य॑ ए॒वं वै॒दाऽऽय॑तनवान् भव॑ति क॒ल्पते॑ऽस्मै द्व॒न्द्वम॒न्या उप॑

दधाति चतस्रो मध्ये धृत्या अन्नं वा इष्टका एतत् खलु वै
साक्षादन्नं यदेष चरुयदेतं चरुमुप दधाति साक्षा - [] 9

TS 5.6.2.6

देवास्मा अन्नमव रुन्धे मध्यत उप दधाति मध्यत एवास्मा अन्नं
दधाति तस्मान् मध्यतो ऽन्न-मद्यते बार्हस्पत्यो भवति ब्रह्म वै
देवानां बृहस्पति-ब्रह्मणैवास्मा अन्नमव रुन्धे ब्रह्मवर्चसमसि
ब्रह्मवर्चसाय त्वेत्याह तेजस्वी ब्रह्मवर्चसी भवति यस्यैष उपधीयते
य उ चैनमेवं वेद ॥ 10

(अमृत - मस्मै - जायते यस्यैता - उपधीयन्ते य उ - पर्जन्य -
उपदधाति साक्षात् - सप्तचत्वारिंशच्च) (A2)

TS 5.6.3.1

भूतेष्टका उप दधात्यन्नात्र वै मृत्युर्जायते यत्रयत्रैव मृत्युर्जायते
तत एवैनमव यजते तस्मादग्निचिथ् सर्वमायुरेति सर्वे ह्यस्य
मृत्यवो ऽवेष्टा स्तस्मा-दग्निचिन्ना-भिचरितवै प्रत्यगेन-मभिचारः
स्तृणुते सूयते वा एष योऽग्निं चिनुते देवसुवा-मेतानि हवींषि
भवन्त्येतावन्तो वै देवानां सवास्त एवा - [] 11

TS 5.6.3.2

–स्मै॑ स॒वान् प्र॑ य॒च्छन्ति॑ त ए॒नꣳ सु॑वन्ते स॒र्वोऽग्नि॑र्व॒रुण॑स॒वो
रा॒ज॒सूयं॑ ब्र॒ह्म॑स॒वश्चित्यो॑ दे॒वस्य॑ त्वा स॒वितुः॑ प्र॒सव॑ इत्याह
स॒वितृ॑प्र॒सूत॑ ए॒वैनं॑ ब्र॒ह्म॑णा दे॒वता॑भिर॒भि षिञ्च॑त्यन्नस्यान्नस्याभि
षिञ्च॑त्यन्नस्यान्नस्या–वरु॑द्ध्यै पु॒रस्ता॑त् प्रत्यञ्च॑मभि षिञ्च॑ति
पु॒रस्ता॑द्धि प्र॒तीची॑न–म॒न्नम॑द्यते शी॒र्षतो॑ ऽभि षिञ्च॑ति शी॒र्षतो॑
ह्यन्न॑मद्यत आ मु॒खाद॑न्वव॒स्राव॑यति – [] 12

TS 5.6.3.3

मु॒खत॑ ए॒वास्मा॑ अ॒न्नाद्यं॑ द॒धात्य॑ग्ने स्त्वा सा॒म्राज्ये॑नाभि
षिञ्चा॑मीत्याहैष वा अ॒ग्नेः स॒व–स्तेनै॑वैन॒मभि षिञ्च॑ति बृ॒हस्प॑ते॒स्त्वा
सा॒म्राज्ये॑नाभिषिञ्चा॑मीत्याह ब्र॒ह्म वै दे॒वानां॑ बृ॒हस्प॑तिर्ब्र॒ह्मणै॑वैन॒मभि
षिञ्च॑तीन्द्र॒स्य त्वा सा॒म्राज्ये॑नाभि षिञ्चा॑–मीत्याहेन्द्रि॒यमे॒वास्मि–
न्नु॒परि॑ष्ठाद् द॒धात्ये॑ तद् – [] 13

TS 5.6.3.4

वै रा॒ज॒सूय॑स्य रू॒पं य॑ एवं वि॒द्वान॑ग्निं चि॒नुत॑ उ॒भावे॑व लो॒काव॑भि
ज॒यति॑ यश्च रा॒ज॒सूये॑ने॒जान॑स्य यश्चा॒ग्नि॒चित॑ इन्द्र॒स्य सु॑षु॒वाण॑स्य
द॒शधे॑न्द्रि॒यं वी॒र्यं॑ प॒रा ऽप॑तत् तद्–दे॒वाः सौ॒त्राम॑ण्या स॒मभ॑रन्थ् सू॒यते॑

वा ए॒ष यो॑ ऽग्निं॑ चि॒नुते॑ ऽग्निं॑ चि॒त्वा सौ॒त्राम॒ण्या य॑जेतेन्द्रि॒यमे॒व
वीर्यं॑ संभृ॒त्याऽऽत्मन्॑ धत्ते ॥ 14

(त ए॒वा - न्वव॑स्रावयत्ये - त - द॒ष्टाच॑त्वारि॒ंशच्च॑) (A3)

TS 5.6.4.1

स॒जूर॒ब्दोऽया॑वभिः स॒जूर॒षा अ॑रुणीभिः स॒जूः सूर्य॑ एत॒शेन॑
स॒जोषा॑व॒श्विना॑ द॒सोभिः॑ स॒जूर॒ग्निर्वै॑श्वानर इ॒डाभि॑र्घृतेन स्वाहा
सँव॒थ्सरो॑ वा अ॒ब्दो मा॑सा अया॒वा उ॒षा अ॑रुणी सूर्य॑ एत॒श इ॒मे
अ॒श्विना॑ सँव॒थ्सरो॑ऽग्निर्वै॑श्वानरः प॒शव॑ इ॒डा प॒शवो॑ घृ॒तं
सँव॒थ्सरं॑ प॒शवो॑ऽनु प्र जा॒यन्ते॑ सँव॒थ्सरे॒णैवा॑स्मै प॒शून्
प्र ज॑नयति द॒र्भस्त॒म्बे जु॑होति यद् - [] 15

TS 5.6.4.2

वा अ॒स्या अ॒मृतं॑ यद्-वीर्यं॑ तद्-द॒र्भा स्त॑स्मिन् जुहोति प्रै॒व जा॑यते
ऽन्ना॒दो भ॑वति यस्यै॒वं जु॑ह्वत्येता वै दे॒वता॑ अ॒ग्नेः पु॒रस्ता॑द्भागास्ता
ए॒व प्री॑णात्यथो चक्षु॒रेवा॑ग्नेः पु॒रस्ता॑त् प्रति दधात्यन॒न्धो भ॑वति य
ए॒वं वै॒दाऽऽपो॑ वा इ॒दम॑ग्रे स॒लिल॑मासीथ् स प्र॒जाप॑तिः पु॒ष्कर॑पर्णे
वा॒तो भू॑तोऽले॒लाय॑थ् स - [] 16

TS 5.6.4.3

प्रति॒ष्ठां॑ ना॒विन्द॑त॒ स ए॒तद॒पां॑ कु॒लाय॑मपश्यत् तस्मि॑न्नग्नि॒मचि॑नुत्
तदि॒यम॑भवत् ततो॒ वै स प्र॑त्यतिष्ठद्-यां पु॒रस्ता॑दुपा॒दधा॑त् तच्छि॒रो
ऽभव॑त् सा प्रा॒ची दिग्-यां॑ दक्षि॒णत॑ उपा॒दधा॑त् स दक्षि॒णः
पक्षो॑ ऽभव॑त् सा दक्षि॒णा दिग्-यां॑ पश्चा॒-दुपा॑दधात् तत्
पुच्छ॑मभवत् सा प्र॒तीची॑ दिग्-या-मु॒त्तर॑त उपा॒दधा॑त्- [] 17

TS 5.6.4.4

स उत्तरः॑ पक्षो॑ ऽभव॑त् सोदी॒ची दिग्-या॑मुपरि॒ष्टा-दुपा॑दधात् तत्
पृष्ठ॑मभवत् सोर्द्ध्वा दि॒गियं॑ वा अ॒ग्निः पञ्चै॑ष्टक-स्तस्माद्-यदस्यां
खन॑न्त्यभीष्ट॒कां तृ॑न्दन्त्यभि शर्करा॑ सर्वा॒ वा इ॒यं वा॑ यो॒भ्यो न॑क्तं
दृ॒शे दी॑प्यते तस्मादि॒मां वा॑सि॒ नक्तं॑ नाद्ध्य॒ास॑ते य ए॒वं
वि॒द्वान॒ग्निं चि॑नुते प्रत्ये॒व - [] 18

TS 5.6.4.5

तिष्ठ॑त्यभि दि॒शो ज॑यत्याग्नेयो॒ वै ब्रा॑ह्मणस्तस्माद् ब्राह्म॒णाय॑ सर्वासु
दि॒क्ष्वर्द्धु॑क स्वा॒मेव॑ तद्-दि॒शम॑न्वेत्य॒पां वा॑ अ॒ग्निः कु॒लाय॑
तस्मा॑दापो ऽग्नि॑ हारु॒काः स्वा॒मेव॑ तद्-यो॒निं प्र॑ वि॒शन्ति॑ ॥ 19
(यद॑-ले॒लाय॑त् स-उ॒त्तर॑त उपा॒दधा॑-दे॒व - द्वा॒त्रिंश॑च्च) (A4)

TS 5.6.5.1

सँव॑थ्स॒रमुख्यं॑ भृ॒त्वा द्वि॑तीये सँव॑थ्स॒र आ॒ग्नेय॑म॒ष्टाक॑पालं
 निर्व॑पेदै॒न्द्र-मे॒काद॑शकपालं वै॒श्वदे॑वं द्वा॒दश॑कपालं बा॒र्हस्प॑त्यं चरुं
 वै॒ष्णवं॑ त्रि॒कपालं॑ तृ॒तीये सँव॑थ्स॒रेऽभि॑जिता यजेत यद॒ष्टाक॑पालो
 भव॑त्य॒ष्टाक्ष॑रा गाय॒त्र्याग्ने॑यं गाय॒त्रं प्रा॑तस्स॒वनं प्रा॑तस्स॒वनमे॒व
 तेन॑ दा॒धार गाय॑त्रीं छन्दो यदे॒काद॑शकपालो भव॑त्ये॒काद॑शाक्ष॒रा
 त्रि॒ष्टुगै॒न्द्रं त्रै॒ष्टुभं॑ मा॒द्ध्यन्दि॑नं स॒वनं मा॒द्ध्यन्दि॑नमे॒व स॒वनं तेन॑
 दा॒धार त्रि॒ष्टुभं॑ - [] 20

TS 5.6.5.2

छन्दो॑ यद्-द्वा॒दश॑कपालो भव॑ति द्वा॒दश॑क्ष॒रा जग॑ती वै॒श्वदे॑वं जा॒गतं
 तृ॒तीय॑स॒वनं तृ॒तीय॑स॒वनमे॒व तेन॑ दा॒धार जग॑तीं छन्दो
 यद्-बा॒र्हस्प॑त्यश्चरु॒र्भव॑ति ब्र॒ह्म वै दे॒वानां॑ बृ॒हस्प॑तिर्ब्र॒ह्मैव
 तेन॑ दा॒धार यद्-वै॒ष्णव॑ स्त्रि॒कपालो॑ भव॑ति यज्ञो॒ वै वि॒ष्णुर्य॑ज्ञमे॒व
 तेन॑ दा॒धार यत् तृ॒तीये सँव॑थ्स॒रेऽभि॑जिता यज॑तेऽभि॒जित्यै
 यथ् सँव॑थ्स॒रमुख्यं॑ बि॒भर्ती॑ममे॒व - [] 21

TS 5.6.5.3

तेन॑ लो॒कꣳ स्पृ॑णोति॒ यद् द्वि॑तीये सँव॒थ्सरे॑ ऽग्निं चि॒नुते॑ ऽन्तरि॑क्षमे॒व
तेन॑ स्पृ॑णोति॒ यत् तृ॑तीये सँव॒थ्सरे॑ यज॑ते ऽमु॒मेव तेन॑ लो॒कꣳ
स्पृ॑णोत्येतं॒ वै पर॑ आट्णारः॒ कक्षी॑वाꣳ औशि॒जो वी॒तह॑व्यः
श्राय॑सस्त्रसद॒स्युः पौरु॑कु॒थ्स्यः प्र॒जाका॑मा अचि॒न्वत॑ ततो॒ वै ते
सह॑स्रꣳसह॑स्रं पु॒त्रान॑विन्दन्त॒ प्रथ॑ते प्र॒जया॑ पशु॒भिस्तां॑ मा॒त्रामा॑प्नोति
यां ते॒ऽगच्छ॑न् य ए॒वं () वि॒द्वाने॒तम॒ग्निं चि॒नुते॑ ॥ 22

(दा॒धार त्रि॒ष्टुभ॑ - मि॒ममे॒वै - वं - च॒त्वारि॑ च) (A5)

TS 5.6.6.1

प्र॒जाप॑ति-र॒ग्नि-म॑चि॒नुत॑ स क्षु॒रप॑विर्भू॒त्वा ऽति॑ष्ठत् तं दे॒वा बि॑भ्यतो
नोपा॑ऽऽयन् ते छन्दो॑भिरा॒त्मानं॑ छादयित्वा॒नोपा॑ऽऽयन् तच्छन्द॑सां
छन्द॑स्त्वं ब्र॒ह्म वै छन्दाꣳसि॒ ब्रह्म॑ण ए॒तद्-रूपं॑ यत् कृ॒ष्णाजि॑नं
का॒र्ष्णी उ॒पान॑हावुप॒ मुञ्च॑ते छन्दो॑भिरे॒वाऽऽत्मानं॑ छादयित्वा ऽग्नि॑मुप॒
चर॑त्या॒त्मनो॑ ऽहिꣳसायै दे॒वनि॑धिर्वा ए॒ष नि धी॑यते यद॒ग्नि- [] 23

TS 5.6.6.2

-र॒न्ये वा वै नि॒धिम॑गुप्तं वि॒न्दन्ति॒ न वा प्र॑ति प्र॒ जाना॑त्यु॒खामा॑
क्रा॒मत्या॑त्मानमे॒वाधि॑पां कुरु॒ते गु॒प्त्या अथो॑ खल्वाहु॒र्ना ऽऽक्र॑म्येति

नैर्ऋत्युखा यदाक्रामेन्निर्ऋत्या आत्मानमपि दद्ध्यात्
तस्मान्नाऽऽक्रम्या पुरुषशीर्षमुप दधाति गुप्त्या अथो यथा ॥
ब्रूयादेतन्मे गोपायेति तादृगेव तत् - [] 24

TS 5.6.6.3

प्रजापतिर्वा अथर्वा ऽग्निरेव दद्ध्यङ्गार्थवर्ण स्तस्येष्टका
अस्थान्येत॑ ह वाव तद्-ऋषि-रभ्यनूवाचेन्द्रो दधीचो अस्थभिरिति
यदिष्टकाभिरग्निं चिनोति सात्मानमेवाग्निं चिनुते सात्तामुष्मिन् लोके
भवति य एवं वैद शरीरं वा एतदग्नेर्यच्चित्य आत्मा वैश्वानरो
यच्चिते वैश्वानरं जुहोति शरीरमेव स॒ऽस्कृत्या - [] 25

TS 5.6.6.4

-भ्यारोहति शरीरं वा एतद्-यजमानः स॒ऽ स्क्रुरुते यदग्निं चिनुते
यच्चिते वैश्वानरं जुहोति शरीरमेव स॒ऽस्कृत्या ऽऽत्मना ऽभ्यारोहति
तस्मात् तस्य नाव द्यन्ति जीवन्नेव देवानप्येति वैश्वानर्यर्चा पुरीषमुप
दधातीयं वा अग्निर्वैश्वानर स्तस्यैषा चितिर्यत् पुरीषमग्निमेव
वैश्वानरं चिनुत एषा वा अग्नेः () प्रिया तनूर्यद्-वैश्वानरः
प्रियामेवास्य तनुवमव रुन्धे ॥ 26

(अग्नि - स्तथ् - स॒ऽस्कृत्या - ग्ने - दर्श च) (A6)

TS 5.6.7.1

अ॒ग्नेर्वै॑ दी॒क्षया॑ दे॒वा वि॒राज॑मा॒प्नुवन्॑ ति॒स्रो रा॒त्रीर्दी॑क्षितः स्यात्
 त्रि॒पदा॑ वि॒राड् वि॒राज॑मा॒प्नोति॑ षड्-रा॒त्रीर्दी॑क्षितः स्यात् षड् वा
 ऋ॒तवः॑ सँ॒वथ्स॑रः सँ॒वथ्स॑रो वि॒राड् वि॒राज॑मा॒प्नोति॑ दश रा॒त्रीर्दी॑क्षितः
 स्याद्-द॒शाक्ष॑रा वि॒राड् वि॒राज॑मा॒प्नोति॑ द्वा॒दश रा॒त्रीर्दी॑क्षितः स्याद्
 द्वा॒दश मा॑साः सँ॒वथ्स॑रः सँ॒वथ्स॑रो वि॒राड् वि॒राज॑मा॒प्नोति॑ त्रयो॒दश
 रा॒त्रीर्दी॑क्षितः स्यात् त्रयो॒दश - [] 27

TS 5.6.7.2

मा॑साः सँ॒वथ्स॑रः सँ॒वथ्स॑रो वि॒राड् वि॒राज॑मा॒प्नोति॑ पञ्च॒दश
 रा॒त्रीर्दी॑क्षितः स्यात् पञ्च॒दश वा अ॒र्द्धमा॑सस्य रा॒त्रयो॑ ऽर्द्धमा॑सशः
 सँ॒वथ्स॑र आ॒प्यते॑ सँ॒वथ्स॑रो वि॒राड् वि॒राज॑मा॒प्नोति॑ सप्त॒दश
 रा॒त्रीर्दी॑क्षितः स्याद् द्वा॒दश मा॑साः पञ्च॒र्तवः॑ स सँ॒वथ्स॑रः
 सँ॒वथ्स॑रो वि॒राड् वि॒राज॑मा॒प्नोति॑ चतु॒र्विंश॑तिꣳ रा॒त्रीर्दी॑क्षितः
 स्या-च॒तुर्विं॑शति-र्द्धमा॑साः सँ॒वथ्स॑रः सँ॒वथ्स॑रो वि॒राड्
 वि॒राज॑मा॒प्नोति॑ त्रिंश॑तꣳ रा॒त्रीर्दी॑क्षितः स्यात् - [] 28

TS 5.6.7.3

त्रि॒ंश॒दक्ष॒रा वि॒राड् वि॒राज॑मा॒प्नोति॑ मा॒सं दी॒क्षितः॑ स्याद्-यो मा॒सः
स सँ॒वत्स॒रः सँ॒वत्स॒रो वि॒राड् वि॒राज॑मा॒प्नोति॑ च॒तुरो॑ मा॒सो दी॒क्षितः॑
स्या॒च्च॒तुरो॑ वा ए॒तं मा॒सो व॒सवो॑ ऽबि॒भरु॑ स्ते पृ॒थि॒वीमा॑ ऽज॒यन्
गा॒य॒त्रीं छ॒न्दो ऽष्टौ॑ रु॒द्रास्ते॑ ऽन्त॒रि॒क्ष॒माऽज॒यन् त्रि॒ष्टु॒भं छ॒न्दो
द्वा॒द॒शाऽऽदि॒त्यास्ते॑ दि॒वमा॑ ऽज॒यन् ज॒गतीं॑ छ॒न्दस्त॒तो वै ते ()
व्या॒वृ॒त-म॒गच्छ॑ञ्छ्रै॒ष्यं दे॒वानां॑ तस्मा॒द् द्वा॒द॒श मा॒सो भृ॒त्वा ऽग्निं॑
चि॒न्वी॒त द्वा॒द॒श मा॒साः सँ॒वत्स॒रः सँ॒वत्स॒रो ऽग्नि॑श्चित्य॒ स्तस्या॑-
हो॒रा॒त्रा॒णी॒ष्ट॒का आ॒प्ते॒ष्ट॒क-मे॒नं चि॒नु॒ते ऽथो॑ व्या॒वृ॒तमे॒व ग॒च्छ॒ति
श्रै॒ष्ठ्यं॑ स॒मा॒ना॒नां ॥ 29 (स्यात् त्रयो॑द॒श - त्रि॒ंश॒तं रा॒त्रीर्दी॒क्षि॒
तः स्याद् - वै ते - ऽष्टा॒वि॒ंश॒तिश्च) (A7)

TS 5.6.8.1

सु॒वर्गा॒य वा ए॒ष लो॒काय॑ ची॒यते॑ यद॒ग्नि॒स्तं य॑न्ना॒न्वा॒रोह॑थ्
सु॒वर्गा॒ल्लो॒काद्-य॒ज॒मा॒नो ही॒येत॑ पृ॒थि॒वीमा॑ ऽक्र॒मिषं॑ प्रा॒णो मा॒ मा
हा॒सी-द॒न्त॒रि॒क्ष॒मा ऽक्र॒मिषं॑ प्र॒जा मा॒ मा हा॒सीद्-दि॒वमा॑ ऽक्र॒मिषं॑
सु॒व॒र॒ग॒न्मे॒त्याहै॒ष वा अ॒ग्ने-र॒न्वा॒रोह॑-स्ते॒नै॒वैन॑-म॒न्वा॒रोह॑ति सु॒वर्ग॑स्य
लो॒कस्य॑ स॒म॒ष्ट्यै॑ यत् प॒क्ष॒स॒म्मि॒तां मि॒नु॒यात् - [] 30

TS 5.6.8.2

कनीया॑ऽसं य॑ज्ञक्र॒तुमु॑पेयात् पा॒पीय॑स्यस्याऽऽत्म॑नः प्र॒जा
स्याद्-वे॑दिस॒मितां॑ मि॒नोति॑ ज्याया॑ऽसमे॒व य॑ज्ञक्र॒तुमु॑पैति
नास्याऽऽत्म॑नः पा॒पीय॑सी प्र॒जा भ॑वति सा॒हस्रं॑ चि॒न्वीत॑ प्रथ॒मं
चि॒न्वानः॑ स॒हस्र॑स॒मितो॑ वा अ॒यं लो॒क इ॒ममे॒व लो॒कम॑भि ज॒यति॑
द्विषा॑हस्रं चि॒न्वीत॑ द्वितीयं चि॒न्वानो॑ द्विषा॑हस्रं वा अ॒न्तरि॑क्ष-
म॒न्तरि॑क्षमे॒वाभि॑ ज॒यति॑ त्रिषा॑हस्रं चि॒न्वीत॑ तृतीयं चि॒न्वान - [] 31

TS 5.6.8.3

-स्त्रि॑षाहस्रो वा अ॒सौ लो॒को ऽमु॑मे॒व लो॒कम॑भि ज॒यति॑ जानु॒दघ्नं॑
चि॒न्वीत॑ प्रथ॒मं चि॒न्वानो॑ गा॒यत्रि॑यैवे॒मं लो॒क-म॑भ्यारो॒हति॑ नाभि॒दघ्नं॑
चि॒न्वीत॑ द्वितीयं चि॒न्वान॑ स्त्रि॒ष्टुभै॒वा-न्तरि॑क्ष-म॒भ्यारो॒हति॑ ग्री॒वद॑घ्नं
चि॒न्वीत॑ तृतीयं चि॒न्वानो॑ जग॒त्यैवा॒मुं लो॒कम॑भ्यारो॒हति॑ नाग्निं
चि॒त्वा रा॒मा-मु॑पेयादयो॒नौ रे॒तो धा॑स्यामीति न द्वितीयं चि॒त्वाऽन्य॑स्य
स्त्रि॒य - [] 32

TS 5.6.8.4

-मु॑पेयान्न तृतीयं चि॒त्वा कां च॒नोपे॑याद्-रे॒तो वा ए॒तन्नि॑ ध॒त्ते य॒दग्निं॑
चि॒नुते॑ यदु॒पेयाद्-रे॒तसा॑ व्य॒द्ध्ये॒ताथो॑ ख॒ल्वाहु॑-रप्र॒जस्यं॑ तद्-

यन्नोपेयादिति यद्-रेतस्सिचावुपदधाति ते एव यजमानस्य
रेतो बिभृत स्तस्मा-दुपेयाद्-रेतसो-ऽस्कन्दाय त्रीणि वाव रेताऽसि
पिता पुत्रः पौत्रो - [] 33

TS 5.6.8.5

यद् द्वे रेतस्सिचावुपदध्याद्-रेतो ऽस्य वि च्छिन्धात् तिस्र उप
दधाति रेतसः सन्तत्या इयं वाव प्रथमा रेतस्सिग् वाग्-वा इयं
तस्मात् पश्यन्तीमां पश्यन्ति वाचं वदन्ती-मन्तरिक्षं द्वितीया प्राणो
वा अन्तरिक्षं तस्मान्नान्तरिक्षं पश्यन्ति न प्राणमसौ तृतीया चक्षुर्वा
असौ तस्मात् पश्यन्त्यमूं पश्यन्ति चक्षुर्यजुषेमां चा - [] 34

TS 5.6.8.6

-मूं चोप दधाति मनसा मद्ध्यमा-मेषां लोकानां क्लृप्त्या अथो
प्राणानामिष्टो यज्ञो भृगुभि-राशीर्दा वसुभिस्तस्य त इष्टस्य वीतस्य
द्रविणेह भक्षीयेत्याह स्तुतशस्त्रे एवैतेन दुहे पिता मातरिश्वा ऽच्छिद्रा
पदा धा अच्छिद्रा उशिजः पदाऽनु तक्षुः सोमो विश्वविन्नेता
नेषद्-बृहस्पति-रुक्थामदानि शऽसिषदित्याहैतद्-वा ()
अग्नेरुक्थं तेनैवैनमनु शऽसति ॥ 35 (मिनुयात् - तृतीयं चिन्वानः
- स्त्रियं - पौत्र - श्व - वै - सप्त च) (A8)

TS 5.6.9.1

सू॒यते॑ वा ए॒षो॑ ऽग्नी॒नां॑ य॒ उ॒खायां॑ भ्रि॒यते॑ यद॒धः॑ सा॒दयेद्-गर्भाः॑
 प्र॒पादु॑काः स्यु-रथो॑ यथा॑ स॒वात् प्र॒त्यव॑रोहति तादृ॒गेव॑ तदा॒सन्दी॑
 सा॒दय॑ति गर्भा॒णां धृ॒त्या अ॒प्रपा॑दायाथो स॒वमे॒वैनं॑ करोति गर्भो॑ वा
 ए॒ष यदु॑ख्यो योनिः॑ शि॒क्यं य॑च्छि॒क्यादु॑खां नि॒रूहेद्-यो॒नेर्गर्भं॑
 निर्. ह॒ण्याथ् ष॑डु॒द्याम॑ शि॒क्यं भ॑वति षोढावि॒हितो॑ वै - [] 36

TS 5.6.9.2

पु॒रुष आ॒त्मा च॑ शि॒रश्च॑ च॒त्वार्य॑ङ्गान्या॒त्मन्ने॒वैनं॑ बि॒भर्ति॑ प्र॒जाप॑तिर्वा
 ए॒ष यद॒ग्निस्त॑स्यो॒खा चो॒लूख॑लं च॒ स्तनौ॑ ताव॒स्य प्र॒जा उप॑ जी॒वन्ति॑
 यदु॒खां चो॒लूख॑लं चोप॒दधा॑ति ताभ्यामे॒व यज॑मानो ऽमु॒ष्मिन्
 लो॒के॑ ऽग्निं॑ दु॒हे सँव॑त्सरो वा ए॒ष यद॒ग्निस्त॑स्य त्रेधावि॒हिता॑ इ॒ष्टकाः॑
 प्रा॒जाप॑त्या वै॒ष्णवीर् - [] 37

TS 5.6.9.3

वै॒श्वक॑र्मणी-र॒होरा॒त्राण्ये॒वास्य॑ प्रा॒जाप॑त्या यदु॒ख्यं बि॒भर्ति॑ प्रा॒जाप॑त्या
 ए॒व तदु॑प ध॒त्ते यथ् स॒मिध॑ आ॒दधा॑ति वै॒ष्णवा॑ वै वन॒स्पत॑यो
 वै॒ष्णवी॒रेव॑ तदु॑प ध॒त्ते यद॑ष्टकाभि-र॒ग्निं चि॒नोती॑यं वै वि॒श्वक॑र्मा
 वै॒श्वक॑र्मणीरे॒व तदु॑प ध॒त्ते तस्मा॑-दाहु-स्त्रि॒वृद॒ग्निरि॑ति तं वा ए॒तं

यजमान ए॒व चिन्वी॑त यदस्या॒न्य () श्चि॒नुयाद्-यत् तं दक्षि॑णाभिर्न
राधये॑द॒ग्निम॑स्य वृ॒ज्जीत॑ यो ऽस्या॒ग्निं चि॒नुयात् तं दक्षि॑णाभी
राधये॑द॒ग्निमे॒व तथ् स्पृ॑णोति ॥ 38

(षोढाविहितो वै - वैष्णवी - रन्यो - वि॒शतिश्च॑) (A9)

TS 5.6.10.1

प्रजा॑पति-र॒ग्नि-मचि॑नुत॒र्तुभिः॑ सँव॒थ्स॒रं व॑सन्तेनै॒वास्य॑
पूर्वा॑र्द्धमचि॑नुत ग्री॒ष्मेण॑ दक्षि॑णं पक्षं व॑र्षाभिः पु॒च्छं श॑रदोत्तरं
पक्षं हे॑मन्तेन म॒द्ध्यं ब्र॑ह्मणा वा अ॒स्य तत् पूर्वा॑र्द्धमचि॑नुत क्ष॒त्रेण॑
दक्षि॑णं पक्षं पशु॑भिः पु॒च्छं वि॑शोत्तरं पक्षमा॒शया॑ म॒द्ध्यं य॑ एवं
वि॒द्वान॒ग्निं चि॑नुत ऋ॒तुभिरे॒वैनं॑ चि॑नुते ऽथो ए॒तदे॒व सर्व॑मव- [] 39

TS 5.6.10.2

रुन्धे॑ शृण्वन्त्ये॒नम॑ग्निं चि॒क्या॒नम॑त्यन्नं रो॒चत॑ इ॒यं वा॑व
प्र॒थमा॑ चि॒ति-रोष॑धयो वनस्प॒तयः॑ पु॒रीष॑मन्तरि॒क्षं द्वि॑तीया
वया॑सि पु॒रीष॑मसौ तृ॒तीया॑ नक्ष॒त्राणि॑ पु॒रीषं॑ य॒ज्ञश्च॑तुर्थी
दक्षि॑णा पु॒रीषं॑ यज॒मानः॑ पञ्च॒मी प्र॒जा पु॒रीषं॑ यत् त्रि॒चिती॑कं
चिन्वी॑त य॒ज्ञं दक्षि॑णामा॒त्मानं॑ प्र॒जाम॑न्तरि॒यात् तस्मा॑त्
पञ्च॑चितीकश्चे॒तव्य॑ ए॒तदे॒व सर्व॑ स्पृ॑णोति यत् ति॒स्रश्चि॑तय-[] 40

TS 5.6.10.3

-स्त्रिवृद्ध्यग्निर्यद् द्वे द्विपाद्-यजमानः प्रतिष्ठित्यै पञ्च चितयो
भवन्ति पाङ्कः पुरुष आत्मानमेव स्पृणोति पञ्च चितयो भवन्ति
पञ्चभिः पुरीषैरभ्यूहति दश सं पद्यन्ते दशाक्षरो वै पुरुषो यावानेव
पुरुषस्त७ स्पृणोत्यथो दशाक्षरा विराडन्नं विराड् विराज्येवान्नाद्ये
प्रति तिष्ठति सँवत्सरो वै षष्ठी चितिर्ऋतवः पुरीष७ () षट्
चितयो भवन्ति षट् पुरीषाणि द्वादश सं पद्यन्ते द्वादश मासाः
सँवत्सरः सँवत्सर एव प्रति तिष्ठति ॥ 41

(अव - चितयः - पुरीषं - पञ्चदश च) (A10)

TS 5.6.11.1

रोहितो धूम्रोहितः कर्कन्धुरोहितस्ते प्राजापत्या बभ्रुररुणबभ्रुः
शुकबभ्रुस्ते रौद्राः श्येतः श्येताक्षः श्येतग्रीवस्ते पितृदेवत्यास्तिस्रः
कृष्णा वशा वारुण्यस्तिस्रः श्वेता वशाः सौर्यो मैत्राबार्हस्पत्या
धूम्रललामास्तूपराः ॥ 42 (रोहितः-षड्विंशतिः) (A11)

TS 5.6.12.1

पृश्नि स्तिरश्चीनपृश्नि-रूर्ध्वपृश्नि स्ते मारुताः फल्गूलोहितोर्णी
बलक्षी ताः सारस्वत्यः पृषती स्थूलपृषती क्षुद्रपृषती ता

वै॒श्वदे॒व्यस्ति॒स्रः॑ श्या॒मा व॒शाः पौ॒ष्णिय॒स्ति॒स्रो रो॒हिणी॒र्व॒शा मै॒त्रिय॑
ऐ॒न्द्रा॒बा॒र्ह॒स्प॒त्या अ॒रु॒णल॒लामा॑-स्तू॒पराः॑ ॥ 43

(पृ॒श्निः - षड्विं॒शतिः॑) (A12)

TS 5.6.13.1

शि॒तिबा॒हु-र॒न्यत॑शि॒तिबा॒हुः स॒म॒न्त॑शि॒तिबा॒हुस्त॑ ऐ॒न्द्रवा॒यवाः॑
शि॒तिर॒न्ध्रो ऽन्य॑त॒शि॒तिर॒न्ध्रः स॒म॒न्त॑शि॒तिर॒न्ध्रस्ते॑ मै॒त्राव॑रुणाः
शु॒द्धवा॒लः स॒र्वशु॑द्धवा॒लो म॒णिवा॒लस्त॑ आ॒श्विना॒स्ति॒स्रः शि॒ल्या व॒शा
वै॒श्वदे॒व्यस्ति॒स्रः श्ये॒नीः प॒रमे॑ष्ठि॒ने सो॒मापौ॑ष्णाः
श्या॒मल॒लामा॑-स्तू॒पराः॑ ॥ 44

(शि॒तिबा॒हुः पञ्च॑विं॒शतिः॑) (A13)

TS 5.6.14.1

उ॒न्नत॑ ऋ॒षभो॑ वा॒मन॑स्त॒ ऐ॒न्द्राव॑रुणाः शि॒तिक॑कु॒च्छि॒तिपृ॑ष्ठः
शि॒तिभ॑सत् त॒ ऐ॒न्द्रा॒बा॒र्ह॒स्प॒त्याः शि॒तिपा॑च्छि॒त्योष्ठः॑ शि॒तिभ्रु॑स्त
ऐ॒न्द्रावै॑ष्णावा॒स्ति॒स्रः सि॒द्ध्मा व॒शा वै॒श्वक॑र्म॒ण्यस्ति॒स्रो धा॒त्रे पृ॑षो॒दरा॑
ऐ॒न्द्रा॒पौष्णाः॑ श्ये॒तल॒लामा॑-स्तू॒पराः॑ ॥ 45

(उ॒न्नतः॑ पञ्च॑विं॒शतिः॑) (A14)

TS 5.6.15.1

कर्णा॑ स्त्रयो॑ या॒माः सौ॒म्या स्त्रयः॑ श्वि॒ति॒ङ्गा अ॒ग्नये॑ यवि॒ष्ठाय॑ त्रयो॑
नकु॒ला स्तिस्रो॑ रोहि॒णी स्त्र्यव्य॑ स्ता वसू॒नां तिस्रो॑ ऽरु॒णा दि॒त्यौह्य॑ स्ता
रु॒द्राणां॑ सोमै॒न्द्रा ब॒भ्रुल॑लामा-स्तू॒पराः ॥ 46

(कर्णा-स्त्रयोविंशतिः) (A15)

TS 5.6.16.1

शु॒ण्ठास्त्रयो॑ वैष्ण॒वा अधी॑लो॒धकर्णा॑ स्त्रयो॑ विष्ण॒व उरु॑क्रमाय॑
ल॒फ्सु॒दिन॑ स्त्रयो॑ विष्ण॒व उरु॑गा॒याय॑ पञ्चा॒वी स्तिस्र॑ आ॒दि॒त्यानां॑
त्रि॒व॒त्सा स्तिस्रो॑ ऽङ्गिर॒सामै॒न्द्रावैष्ण॒वा गौर॑ल॒लामा-स्तू॒पराः ॥ 47

(शुण्ठा - विंशतिः) (A16)

TS 5.6.17.1

इन्द्रा॑य रा॒ज्ञे त्रयः॑ शि॒तिपृ॑ष्ठा इन्द्रा॑या-धि॒राजाय॑ त्रयः॑ शि॒तिकु॑द
इन्द्रा॑य स्वरा॒ज्ञे त्रयः॑ शि॒तिभ॑सद स्तिस्रस्तु॒र्यौह्यः॑ सा॒द्ध्य॒ानां तिस्रः॑
प॒ष्ठौह्यो॑ वि॒श्वेषां॑ दे॒वानां॑-मा॒ग्नेन्द्राः॑ कृ॒ष्णल॑लामा-स्तू॒पराः ॥ 48

(इन्द्राय राज्ञे - द्वाविंशतिः) (A17)

TS 5.6.18.1

अ॒दि॒त्यै॒ त्रयो॑ रो॒हि॒तै॒ता इ॒न्द्रा॒ण्यै॒ त्रयः॑ कृ॒ष्णै॒ताः कु॒ह्वै॑
त्रयो॑ ऽरु॒णै॒ता स्ति॒स्रो धे॒नवो॑ रा॒कायै॑ त्रयो॑ ऽन॒ड्वा॒हः सि॒नीवा॒ल्या
आ॒ग्ना॒वैष्ण॒वा रो॒हि॒तल॒लामा॒स्तूप॒राः ॥ 49

(अ॒दि॒त्या-अ॒ष्टाद॒श) (A18)

TS 5.6.19.1

सौ॒म्या स्त्र॒यः पि॒शंगाः॑ सो॒माय॑ रा॒ज्ञे त्रयः॑ सा॒रङ्गाः॑ पा॒र्जन्या॑
न॒भो॒रूपा॑ स्ति॒स्रो ऽजा॑ म॒ल्हा इ॒न्द्रा॒ण्यै ति॒स्रो मे॒ष्य आ॒दि॒त्या
द्या॒वापृ॒थिव्या॑ मा॒लङ्गा-स्तूप॒राः ॥ 50

(सौ॒म्या - ए॒कान्न॒विं॒शतिः॑) (A19)

TS 5.6.20.1

वा॒रुणा॑ स्त्र॒यः कृ॒ष्णल॒लामा॑ व॒रुणाय॑ रा॒ज्ञे त्रयो॑ रो॒हि॒तल॒लामा॑
व॒रुणाय॑ रि॒शाद॒से त्रयो॑ ऽरु॒णल॒लामाः॑ शि॒ल्पा स्त्र॒यो वै॒श्वदे॒वा स्त्र॒यः
पृ॒श्नयः॑ स॒र्वदे॒वत्या॑ ऐ॒न्द्रासू॒राः श्ये॒तल॒लामा-स्तूप॒राः ॥ 51

(वा॒रुणा - वि॒ं॒शतिः॑) (A20)

TS 5.6.21.1

सो॒माय॑ स्व॒राज्ञे॑ ऽनो॒वाहा-व॒न॒ड्वाहा-वि॒न्द्राग्नि॒भ्या-
मो॒जो॒दाभ्या॑-मु॒ष्टारा॑-वि॒न्द्राग्नि॒भ्यां ब॒लदा॒भ्यां सी॒रवा॒हाव॒वी द्वे

धेनू॑ भौमी॑ दिग्भ्यो॑ वड॒बे द्वे॑ धेनू॑ भौमी॑ वैरा॒जी पु॒रुषी॑ द्वे॑ धेनू॑
 भौमी॑ वा॒यव॑ आ॒रोह॑णवा॒हा-व॒न॒ड्वा॒हौ वा॒रुणी॑ कृ॒ष्णे व॒शे अ॒रा॒ड्यौ॑
 दि॒व्या-वृ॒षभौ॑ परि॒मरौ॑ ॥ 52

(सो॒माय॑ स्वर॒ज्ञे - चतु॑स्त्रिं॒शत्) (A21)

TS 5.6.22.1

एका॑दश प्रा॒तर्ग॒व्याः प॒शव॑ आ ल॒भ्यन्ते॑ छग॒लः कल्मा॑षः
 कि॒किदी॑वि॒र्विदी॑गय स्ते त्वा॒ष्ट्राः सौरी॑र्नव श्वे॒ता व॒शा अ॒नूब॒न्ध्या
 भव॑न्त्याग्ने॒य ऐ॒न्द्रा॒ग्न आ॒श्विन॑स्ते वि॒शाल॑यू॒प आ ल॒भ्यन्ते॑ ॥ 53

(एका॑दश प्रा॒तः - पञ्च॑विं॒शतिः) (A22)

TS 5.6.23.1

पि॒शङ्गा॑ स्त्रयो॑ वा॒सन्ताः॑ सा॒रङ्गा॑ स्त्रयो॑ ग्रैष्माः॑ पृ॒षन्त॑ स्त्रयो॑
 वा॒र्षिकाः॑ पृ॒श्जय॑ स्त्रयः॑ शा॒रदाः॑ पृ॒श्जि॒सक्था॑ स्त्रयो॑ है॒मन्तिका॑
 अ॒वलि॑प्ता स्त्रयः॑ शै॒शिराः॑ सँ॒वत्स॒राय॑ नि॒वक्ष॑सः ॥ 54

(पि॒शङ्गा॑ - विं॒शतिः) (A23)

Special Korvai for Anuvaakam 12 to 20

रो॒हि॒तः कृ॒ष्णा धू॒म्रल॒लामाः - पृ॒श्निः श्या॒मा अ॒रुण॒ल॒लामाः -
शि॒तिबा॒हुः शि॒ल्पाः श्ये॒नीः श्या॒मल॒लामा - उ॒न्नतः सि॒द्ध्मा धा॒त्रे
पौ॒ष्णाः श्ये॒तल॒लामाः - क॒र्णा ब॒भ्रुल॒लामाः - शु॒ण्ठा गौ॒रल॒लामा -
इ॒न्द्राय कृ॒ष्णाल॒लामा - अ॒दित्यै रो॒हितल॒लामाः -
सौ॒म्या मा॒लङ्गा - वा॒रुणाः सू॒राः श्ये॒तल॒लामा - द॒श ।

Prasna Korvai with starting Padams of 1 to 23 Anuvaakams :-

(हि॒रण्यव॒र्णा - अ॒पां ग्र॒हान् - भू॒तेष्ट॒काः - स॒जूः - सँ॒वथ्स॒रं -
प्र॒जाप॒तिः स क्षु॒रप॒वि - र॒ग्नेर्वै दी॒क्षया - सु॒वर्गा॒य तं यँ॒न्न -
सू॒यते - प्र॒जाप॒तिर् ऋ॒तुभी - रो॒हितः - पृ॒श्निः - शि॒तिबा॒हु -
रु॒न्नतः - क॒र्णाः - शु॒ण्ठा - इ॒न्द्राया - दि॒त्यै - सौ॒म्या - वा॒रुणाः
- सो॒मायै - का॒दश - पि॒शङ्गा - स्त्रयो॒विंश॒तिः)

Korvai with starting Padams of 1, 11, 21 Series of Panchaatis :-

(हिरण्यवर्णा - भूतेष्टका - इच्छन्दो यत् - कनीयाञ्सन्-
त्रिवृद्ध्यग्नि - वारुणा - श्रतुष्पञ्चाशत्)

First and Last Padam of Sixth Prasnam of 5th Kandam

(हिरण्यवर्णा - निवक्षसः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे षष्ठः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.7 पञ्चमकाण्डे सप्तमः प्रश्नः—उपानुवाक्यावशिष्टकर्मनिरूपणं

TS 5.7.1.1

यो वा अयथादेवतमग्निं चिनुत आ देवताभ्यो वृश्च्यते पापीयान्
भवति यो यथादेवतं न देवताभ्य आ वृश्च्यते वसीयान् भवत्याग्नेय्या
गायत्रिया प्रथमां चितिमभि मृशेत् त्रिष्टुभा द्वितीयां जगत्या
तृतीयामनुष्टुभा चतुर्थीं पङ्क्त्या पञ्चमीं यथादेवतमेवाग्निं चिनुते
न देवताभ्य आ वृश्च्यते वसीयान् भवतीडायै वा एषा विभक्तिः पशव
इडा पशुभिरेनं - [] 1

TS 5.7.1.2

चिनुते यो वै प्रजापतये प्रति प्रोच्याग्निं चिनोति नाऽऽर्तिमाच्छ-
त्यश्वा-वभित-स्तिष्ठेतां कृष्ण उत्तरतः श्वेतो दक्षिण-स्ता-
वालभ्येष्टका उप दद्ध्यादेतद्-वै प्रजापते रूपं प्राजापत्यो ऽश्वः
साक्षादेव प्रजापतये प्रतिप्रोच्याग्निं चिनोति नाऽऽर्तिमाच्छत्येतद्-वा
अहो रूपं यच्छ्वेतोऽश्वो रात्रियै कृष्ण एतदहो- [] 2

TS 5.7.1.3

रूपं॑ ँ॒दि॒ष्टका॑ रा॒त्रियै॑ पु॒री॒षमि॑ष्टका उप॒धास्य॑ञ्छवे॒त-म॑श्च॒मभि॑ मृ॒शेत्
पु॒री॒ष-मु॒पधा॑स्यन् कृ॒ष्ण-म॑हो॒रात्रा॑भ्या-मे॒वैनं॑ चि॒नुते॑ हि॒रण्य॑पा॒त्रं
म॒धोः॑ पू॒र्णं द॑दाति म॒धव्यो॑ ऽसा॒नीति॑ सौ॒र्या चि॒त्रव॑त्या ऽवै॒क्षते॑
चि॒त्रमे॒व भ॑वति म॒द्ध्यन्दि॑ने ऽश्च॒मव॑ घ्रापयत्यसौ वा आ॒दित्य॑ इन्द्र
ए॒ष प्र॒जाप॑तिः प्रा॒जाप॑त्यो ऽश्च॒स्तमे॒व सा॒क्षादृ॑द्धनोति ॥ 3

(ए॒न - मे॒तद॒हो - ऽष्टा॑च॒त्वारि॑ञ्श॒च्च) (A1)

TS 5.7.2.1

त्वा॒मग्ने॑ वृ॒षभं॑ चे॒कितानं॑ पु॒नर्यु॑वानं॒ जन॑यन्नुपा॒गां ।
अ॒स्थू॒रि णो॑ गा॒र्हप॑त्यानि सन्तु ति॒ग्मेन॑ नो ब्र॒ह्मणा॑ सञ् शि॒शाधि॑ ॥
प॒शवो॑ वा ए॒ते य॒दिष्टका॑ श्रि॒त्यांचि॑त्या-मृ॒षभ॑मुप दधाति
मि॒थुन॑मे॒वास्य॑ तद्-य॒ज्ञे क॑रोति प्र॒जन॑नाय तस्मा॒द्-यू॒थेयू॑थ ऋ॒षभः॑ ॥
सँव॑त्सरस्य प्र॒तिमां॑ ँ॒यां त्वा॑ रा॒त्र्युपा॑सते ।
प्र॒जाञ् सु॒वीरां॑ कृ॒त्वा वि॒श्वमा॑युर्व्य॒ञ्जवत्॑ ॥
प्रा॒जाप॑त्या - [] 4

TS 5.7.2.2

–मे॒तामु॒प द॒धाती॒यं वा॒वैषै॒का॒ष्टका॒ यदे॒वैका॒ष्टका॒याम॒न्नं
क्रि॒यते॒ तदे॒वैत॒या ऽव॒ रुन्ध॒ एषा॒ वै प्र॒जाप॑तेः॒ काम॒दु॒घा तयै॒व
यज॑मानो॒ ऽमुष्मिन्॑ लो॒के ऽग्निं॑ दु॒हे येन॑ दे॒वा ज्योति॑षोर्द्ध्वा
उ॒दायन्॑ येना॒ऽऽदि॒त्या वस॑वो॒ येन॑ रु॒द्राः ।
येना॒ङ्गिर॑सो॒ महि॑मान॒–मान॑शु॒–स्तेनै॑तु॒ यज॑मानः॒ स्वस्ति॑ ॥

सु॒वर्गा॒य वा॒ एष॒ लो॒काय॑ – [] 5

TS 5.7.2.3

ची॒यते॒ यद॒ग्निर्ये॑न॒ देवा॑ ज्योति॑षोर्द्ध्वा उ॒दाय॑न्नित्यु॒ख्यं स॒–मि॒न्ध
इ॒ष्टका॒ ए॒वैता॒ उप॑ ध॒त्ते वा॒नस्प॑त्याः सु॒वर्ग॑स्य लो॒कस्य॑ स॒म॒ष्ट्यै
श॒तायु॑धाय॒ शत॑वी॒र्याय॑ श॒तोत॑ये ऽभि॒माति॑षाहे॒ ।
श॒तं यो॑ नः॒ शर॑दो अजी॒तानि॑न्द्रो॒ नेष॑दति॒ दुरि॑तानि॒ विश्वा॑ ॥
ये च॒त्वारः॑ प॒थयो॑ दे॒वया॑ना॒ अन्तरा॑ द्यावा॒पृथि॑वी विय॒न्ति ।
तेषां॑ यो अज्या॒नि–म॒जीति॑–मा॒वहा॑त् तस्मै॑ नो दे॒वाः – [] 6

TS 5.7.2.4

परि॑ द॒त्तेह॑ सर्वे॑ ॥
ग्री॒ष्मो हे॒मन्त॑ उ॒त नो॑ वस॒न्तः श॒रद् व॒र्षाः सु॒वितं॑ नो॒ अस्तु॑ ।

तेषाम॑मृ॒तूनां॑ श॒तशार॑दानां नि॒वात॑ एषाम॒भये॑ स्याम ॥
 इ॒दुव॑त्सराय॒ परिव॑त्सराय॒ संव॑त्सराय॒ कृ॒णुता॑ बृ॒हन्न॑मः ।
 तेषां॑ व॒यं सु॒मतौ॑ य॒ज्ञिया॑नां ज्यो॒गजी॑ता अ॒हताः॑ स्याम ॥
 भ॒द्रान्नः॑ श्रेयः स-म॒नैष्ट॑ दे॒वा-स्त्वया॑ ऽव॒सेन॑ स-म॒शीम॑हि त्वा ।
 स नो॑ म॒यो भूः पि॒तो- [] 7

TS 5.7.2.5

आ वि॒शस्व॑ शं तो॒काय॑ त॒नुवे॑ स्यो॒नः ॥
 अ॒ज्यानी॑-रेता उप॒ दधा॑त्येता वै दे॒वता॑ अप॒राजि॑ता-स्ता ए॒व
 प्र वि॒शति॑ नै॒व जी॑यते ब्र॒ह्मवा॑दिनो वदन्ति यद॒र्द्धमा॑सा मा॒सा ऋ॑तवः
 स॒वत्स॑र ओष॒धीः प॑चन्त्यथ कस्मा॒दन्या॑भ्यो दे॒वता॑भ्य आग्रयणं
 नि-रु॒प्यत॑ इत्येता हि तद्-दे॒वता॑ उ॒दज॑यन् यदृ॒तुभ्यो॑ निर्व॒पेद्
 दे॒वता॑भ्यः स॒मदं॑ द॒ध्यादा॑ग्रयणं () निरु॒प्येता॑ आहु॒ती
 र्जु॒होत्य॑र्द्धमा॒साने॒व मा॑सानृ॒तून्त् स॒वत्स॑रं प्री॒णाति॑ न दे॒वता॑भ्यः
 स॒मदं॑ दधाति भ॒द्रान्नः॑ श्रेयः स॒मनै॑ष्ट दे॒वा इत्या॑ह हु॒ताद्या॑य
 यज॑मानस्यापराभावाय ॥ 8 (प्रा॒जाप॑त्यां - लो॒काय॑ - दे॒वाः - पि॒तो
 - द॒ध्यादा॑ग्रयणं - पञ्च॑विंशतिश्च) (A2)

TS 5.7.3.1

इन्द्रस्य॑ वज्रो॑ ऽसि॑ वार्त्र॑घ्नस्तनूपा॑ नः॑ प्रतिस्पशः॑ ।
यो नः॑ पुरस्ताद् दक्षिणतः॑ पश्चा-दुत्तरतो॑-ऽघायु-रभिदासत्येत॑
सो ऽश्मानमृच्छतु ॥

देवासुराः सँयत्ता॑ आसन् तेऽसुरा॑ दिग्भ्य आऽबाधन्त॑ तान् देवा
इष्वा च वज्रेण॑ चापानुदन्त॑ यद्-वज्रिणी-रुपदधातीष्वा॑ चैव तद्-
वज्रेण च यजमानो॑ भ्रातृव्या॑नप नुदते दिक्षूप - [] 9

TS 5.7.3.2

दधाति॑ देवपुरा॑ ए॒वैतास्तनू॑पानीः॒ पर्यू॑हते॒ ऽग्नाविष्णू॑ स॒जोष॑से॒मा
वर्द्धन्तु॑ वां गिरः॑ ।

द्यु॒म्नैर्वा॑ज॒भिरा॑ गतं ॥

ब्रह्म॒वादि॑नो॒ वदन्ति॑ यन्न दे॒वता॑यै जुह्वत्यथ॑ किन्दे॒वत्या॑
वसो॒र्द्धा॑रेत्यग्नि-र्वसु॒स्तस्यै॑षा धारा विष्णु-र्वसु॒स्तस्यै॑षा धारा॑
ऽऽग्नावैष्ण॒व्यर्चा॑ वसो॒र्द्धारां॑ जुहोति॑ भा॒गधे॑ये॒नैवैनौ॑ सम॒र्द्धय॑त्यथो
ए॒ता- [] 10

TS 5.7.3.3

—मे॒वाहु॑ति—मा॒यत॑नवतीं॒ करो॑ति॒ यत्का॑म ए॒नां जु॑होति॒ तदे॒वाव॑ रु॒न्धे
रु॒द्रो वा ए॒ष यद॑ग्नि—स्तस्यै॒ते त॒नुवौ॑ घो॒रा ऽन्या॑ शि॒वा ऽन्या॑
यच्छ॑तरु॒द्रीयं॑ जु॒होति॑ यै॒वास्य॑ घो॒रा त॒नूस्तां॑ तेन॑ श॒मय॑ति
यद्—वसो॑र्द्धा॒रां जु॑होति॒ यै॒वास्य॑ शि॒वा त॒नूस्तां॑ तेन॑ प्री॒णाति॒
यो वै वसो॑र्द्धा॒रायै॑ — [] 11

TS 5.7.3.4

प्रति॑ष्ठां॒ वैद॑ प्र॒त्येव॑ ति॒ष्ठति॑ यदा॒ज्यमु॑च्छि॒ष्येत॑ तस्मिन्
ब्र॒ह्मौद॑नं प॒चेत् तं ब्रा॑ह्म॒णाश्च॒त्वारः॑ प्रा॒ञ्जीयु॑—रेष॒ वा
अ॒ग्निर्वै॑श्वा॒नरो यद्ब्रा॑ह्म॒ण ए॒षा ख॒लु वा अ॒ग्नेः प्रि॒या
त॒नूर्यद्—वै॑श्वा॒नरः प्रि॒यायामे॒वैनां॑ त॒नुवां॑ प्रति॑ ष्ठा॒पय॑ति च॒तस्रो॑
धे॒नूर्दद्या॑त् ताभि॒रेव॑ यज॒मानो॑ ऽमु॒ष्मिन् लो॒के ऽग्निं॑ दु॒हे ॥ 12

(उ॒पै — तां — धा॒रायै॑ — षट्च॑त्वारि॒ंशच्च॑) (A3)

TS 5.7.4.1

चि॒त्तिं जु॑होमि॒ मन॑सा घृ॒तेने॒त्याहा॑दा॒भ्या वै ना॑मै॒षाऽऽहु॑तिर्वै॒श्वक॑र्म॒णी
नैनं॑ चि॒क्या॒नं भ्रा॑तृ॒व्यो द॑भ्नो॒त्यथो॑ दे॒वता॑ ए॒वाव॑ रु॒न्धे
ऽग्ने॒ तम॑द्येति॒ पङ्क्त्या॑ जु॒होति॑ पङ्क्त्या॑ ऽऽहु॒त्या य॒ज्ञमु॒खमा॑ र॒भते॑

सप्त ते अग्ने समिधः सप्त जिह्वा इत्याह होत्रा एवाव रुन्धे
 ऽग्निर्दे॒वेभ्यो॑ ऽपा॒क्रामद्-भा॒गधेय॑ - [] 13

TS 5.7.4.2

-मिच्छ॑मान-स्तस्मा॑ एतद्-भा॒गधेयं॑ प्रायच्छन्नेतद्-वा
 अग्ने॑-रग्नि॒होत्र॑-मेतर्हि॒ खलु॑ वा एष जातो यर्हि॒ सर्व॑श्चितो
 जाता॒यैवास्मा॑ अन्नमपि दधाति स ए॒नं प्री॑तः प्रीणाति वसी॒यान्
 भवति॑ ब्रह्म॒वादि॑नो वदन्ति यदेष गा॒र्हप॑त्यश्चीयते ऽथ
 क्वास्या॑ ऽहवनीय इत्य॒सावा॑दित्य इति ब्रूयादेतस्मिन्.
 हि सर्वा॑भ्यो दे॒वता॑भ्यो जुह्वति - [] 14

TS 5.7.4.3

य एवं वि॒द्वानग्निं॑ चिनुते साक्षादे॒व दे॒वता॑ ऋ॒द्ध्नो॑त्यग्ने
 यश॑स्विन् यश॒से-म॑मर्पयेन्द्रा॒वती॑-मपचिती मिहा॑ ऽवह ।
 अयं मूर्द्धा॑ परमेष्ठी सुवर्चाः॑ समा॒नाना॑-मुत्तम॒श्लोको॑ अस्तु ॥
 भद्रं॑ पश्यन्त उप सेदु॒-रग्रे॑ तपो दी॒क्षामृ॑षयः सुव॒र्विदः॑ ।
 ततः॑ क्षत्रं बलमोजश्च जा॒तं तद॒स्मै दे॒वा अ॒भि सं न॑मन्तु ॥
 धा॒ता वि॒धाता॑ परमो- [] 15

TS 5.7.4.4

–त स॒न्दृक् प्र॒जाप॑तिः पर॒मेष्ठी॑ वि॒राजा॑ ॥
 स्तो॒मा इ॒च्छन्दा॑सि नि॒विदो॑ म आ॒हुरे॒तस्मै॑ रा॒ष्ट्रम॑भि सं न॒माम ॥
 अ॒भ्याव॑र्तद्ध्वमु॒प मे॒त सा॒कम॑यꣳ शा॒स्ताऽधि॑पतिर्वो अस्तु ।
 अस्य॑ वि॒ज्ञान॑मनु सꣳ र॒भद्ध्व॑मिमं प॒श्चादनु॑ जी॒वाथ॑ सर्वे ॥
 रा॒ष्ट्रभृ॑त् ए॒ता उप॑ दधात्येषा वा अ॒ग्नेश्चि॑ती रा॒ष्ट्रभृ॑त् तयै॒वास्मिन्॑ रा॒ष्ट्रं
 दधा॑ति () रा॒ष्ट्रमे॒व भव॑ति नास्माद् रा॒ष्ट्रं भ्रꣳश॑ते ॥ 16

(भा॒गधे॑यं – जु॒ह्वति॑ – पर॒मा – रा॒ष्ट्रं द॑धाति – स॒प्त च) (A4)

TS 5.7.5.1

यथा॑ वै पु॒त्रो जा॒तो म्रि॒यत॑ एवं वा ए॒ष म्रि॒यते॑ यस्या॒ग्निरु॒ख्य
 उ॒द्वाय॑ति यन्नि॒र्मन्थ्यं॑ कु॒र्याद्–वि॒च्छिन्द्वा॑द्–भ्रातृ॒व्यम॑स्मै ज॒नये॑त् स
 ए॒व पुनः॑ प॒रीद्ध्यः॑ स्वा॒देवैनं॑ यो॒नैर्ज॑नयति नास्मै भ्रातृ॒व्यं ज॑नयति
 तमो॑ वा ए॒तं गृ॑ह्णाति यस्या॒ग्निरु॒ख्य उ॒द्वाय॑ति मृ॒त्युस्त॑मः कृ॒ष्णं
 वा॒सः कृ॒ष्णा धे॒नुर्दक्षि॑णा तम॒सै – [] 17

TS 5.7.5.2

–व तमो॑ मृ॒त्युम॑प ह॒ते हि॒रण्यं॑ द॒दाति॑ ज्योतिर्वै हि॒रण्यं॑ ज्योतिषै॒व
 तमो॑ ऽप ह॒ते ऽथो॑ तेजो॒ वै हि॒रण्यं॑ तेज ए॒वाऽऽत्म॑न् ध॒त्ते सु॒वर्नं॑

घ॒र्मः स्वा॒हा सु॒वर्ना॑ऽर्कः स्वा॒हा सु॒वर्न॑ शु॒क्रः स्वा॒हा सु॒वर्न॑ ज्योतिः
स्वा॒हा सु॒वर्न॑ सूर्यः स्वा॒हा ऽर्को॑ वा ए॒ष यद॒ग्निर॒सावादि॒त्यो॑—[] 18

TS 5.7.5.3

ऽश्व॑मे॒धो यदे॒ता आ॒हु॒ती जु॒होत्य॑र्का—श्व॑मे॒धयो॒रेव॑ ज्योती॑ ऽ॒षि
सं द॒धात्ये॑ष ह॒ त्वा अ॑र्काश्व॑मे॒धी यस्यै॒तद॒ग्नौ क्रि॑यत
आपो॑ वा इ॒दम॒ग्रे स॒लिल॑मासी॒त् स ए॒तां प्र॒जाप॑तिः प्रथ॒मां
चि॒तिम॑पश्यत् तामु॒पाध॑त् तदि॒य—म॒भव॑त् तं वि॒श्वक॑र्माऽब्रवी॒दुप॑
त्वा ऽऽ *या॒नीति॑ नेह॒ लोको॑ऽस्तीत्य॑—[] 19

TS 5.7.5.4

—ब्रवी॑त् स ए॒तां द्वि॒तीयां॑ चि॒तिम॑पश्यत् तामु॒पाध॑त्
तद॒न्तरि॑क्षमभवत् स य॒ज्ञः प्र॒जाप॑तिमब्रवी॒दुप॑ त्वा ऽऽ *या॒नीति॑ नेह
लोको॑ ऽस्तीत्य॑ब्रवी॒त् स वि॒श्वक॑र्माणमब्रवी॒दुप॑ त्वा ऽऽ *या॒नीति॑ केन॑
मोपै॒ष्यसी॑ति दि॒श्याभि॑—रित्य॑ब्रवीत् तं दि॒श्याभि॑रुपैत् ता उ॒पाध॑त्
ता दि॒शो—[] 20

TS 5.7.5.5

ऽभव॑न्त् स प॒रमे॑ष्ठी प्र॒जाप॑तिमब्रवी॒दुप॑ त्वा ऽऽ *या॒नीति॑ नेह
लोको॑ ऽस्तीत्य॑ब्रवी॒त् स वि॒श्वक॑र्माणं च य॒ज्ञं चा॒ब्रवी॒दुप॑ वा॒मा

ऽयानीति॑ नेह॑ लोको॑ ऽस्तीत्यब्रूता॑ स एतां॑ तृतीयां॑ चितिमपश्यत्
तामुपाधत्त॑ तदसावभवत् स आदित्यः॑ प्रजापतिः॑

मब्रवीदुप॑ त्वा - [] 21

TS 5.7.5.6

ऽऽ *यानीति॑ नेह॑ लोको॑ ऽस्तीत्यब्रवीत् स विश्वकर्माणं॑ च यज्ञं॑
चाब्रवीदुप॑ वामा॑ ऽयानीति॑ नेह॑ लोको॑ ऽस्तीत्यब्रूता॑ स
परमेष्ठिनमब्रवीदुप॑ त्वा ऽऽ *यानीति॑ केन॑ मोपैष्यसीति॑
लोकंपृणयेत्यब्रवीत् तं लोकंपृणयोपैत् तस्मादयातयाम्नी
लोकंपृणा॑ ऽयातयामा॑ ह्यसा - [] 22

TS 5.7.5.7

-वादित्य-स्तानृषयो॑ ऽब्रुवन्नुप॑ व आऽयामेति॑ केन॑ न उपैष्यथेति॑
भूम्नेत्यब्रुवन् तान् द्वाभ्यां॑ चितीभ्यामुपायन्थ् स पञ्चचितीकः॑
समपद्यत॑ य एवं विद्वानग्निं॑ चिनुते॑ भूयानेव॑ भवत्यभीमान्
लोकाञ्जयति॑ विदुरेनं॑ देवा अथो॑ एतासामेव॑ देवतानां॑
सायुज्यं॑ गच्छति ॥ 23

(तमसा॑ - ऽऽदित्यो॑ - ऽस्तीति॑ - दिश॑ - आदित्यः॑

प्रजापतिमब्रवीदुप॑ त्वा - ऽसौ - पञ्चचत्वारिंशच्च॑) (A5)

TS 5.7.6.1

वयो वा अ॒ग्निर्यद॑ग्नि॒चित् प॒क्षिणो॑ ऽऽजी॒यात् तमे॒वाग्निम॑द्यादा-
 ति॒माच्छे॑त् सँव॒थ्सरं॑ व्र॒तं चरे॑त् सँव॒थ्सर॑ हि व्र॒तं नाति॑ प॒शुर्वा
 एष॑ यद॒ग्निर्हि॒नस्ति॑ खलु॒ वै तं प॒शुर्य॑ ए॒नं पु॒रस्ता॑त्
 प्र॒त्यञ्च॑मु॒पच॑रति॒ तस्मा॑त् प॒श्चात् प्रा॒डुप॑चर्य॒ आत्म॑नो ऽहि॒सायै॑
 तेजो॑ ऽसि॒ तेजो॑ मे यच्छ॒ पृथि॑वीं यच्छ - [] 24

TS 5.7.6.2

पृथि॒व्यै मा पा॒हि ज्योति॑रसि॒ ज्योति॑र्मे यच्छान्तरि॒क्षं यच्छान्तरि॑क्षान्मा
 पा॒हि सु॒वरसि॑ सु॒वर्मे यच्छ॑ दि॒वं यच्छ॑ दि॒वो मा पा॒हीत्या॑हैताभि॒र्वा
 इमे॒ लोका॑ वि॒धृता॑ यदे॒ता उप॑दधात्येषां॒ लोकानां॑ वि॒धृत्यै॑
 स्वय॑मातृ॒ण्णा उप॑धाय॒ हिर॑ण्येष्टका॒ उप॑दधातीमे॒ वै लोकाः॑
 स्वय॑मातृ॒ण्णा ज्योति॑र्हि॒रण्यं य॑त् स्वय॑मातृ॒ण्णा उप॑धाय - [] 25

TS 5.7.6.3

हि॒रण्येष्ट॑का॒ उप॑दधाती-माने॒वैताभि॑-लो॒का-ज्ज्योति॑ष्मतः कुरु॒ते ऽथो॑
 ए॒ताभि॑रे॒वास्मा॑ इमे॒ लोकाः॑ प्र भा॒न्ति या॑स्ते अ॒ग्ने सूर्ये॑ रुच॒ उद्य॑तो
 दि॒व-मा॑तन्वन्ति॒ रश्मि॑भिः ।
 ताभिः॑ सर्वा॒भी रु॒चे जना॑य न स्कृ॒धि ॥

या वो दे॒वाः सूर्ये॑ रु॒चो गो॒ष्वश्वेषु॑ या रु॒चः ।
 इन्द्रा॑ग्नी ताभिः॒ सर्वा॑भी रु॒चं नो॑ धत्त बृहस्पते ॥
 रुच॑न्नो धेहि – [] 26

TS 5.7.6.4

ब्राह्म॑णेषु रुच॑ राज॒सु न॑ स्कृ॒धि ।
 रुचं॑ वि॒श्येषु॑ शू॒द्रेषु॑ मयि॑ धेहि रु॒चा रुचं॑ ॥
 द्वेधा॑ वा अ॒ग्निं चि॒क्या॒नस्य॑ यश॑ इन्द्रि॒यं गच्छ॑त्यग्निं
 वा चि॒तमी॒जानं॑ वा यदे॒ता आहु॑तीर्जु॒होत्या॑त्मन्ने॒व यश॑ इन्द्रि॒यं धत्त॑
 ईश्व॑रो वा एष आ॒र्तिमा॒र्तो॒र्यो ऽग्निं॑ चि॒न्व-न्न॑धि॒क्राम॑ति तत्त्वा॑ यामि
 ब्रह्म॑णा वन्द॒मान॑ इति॒ वारु॑ण्यर्चा – [] 27

TS 5.7.6.5

जुहु॑याच्छान्ति॒-रेवै॑षा ऽग्नेर्गु॒प्ति-रा॒त्मनो॑ ह॒विष्कृ॑तो वा एष यो॑ ऽग्निं
 चि॒नुते॑ यथा॒ वै ह॒विः स्क॑न्दत्ये॒वं वा॑ एष स्क॑न्दति यो॑ ऽग्निं चि॒त्वा
 स्त्रि॒य-मु॒पैति॑ मै॒त्राव॑रुण्या ऽऽमि॒क्षया॑ यजेत॒ मैत्रा॑वरुणता-
 मेवो॑पै॒त्यात्म॑नो ऽस्क॑न्दाय यो वा अ॒ग्निमृ॑तु॒स्थां वे॒दतु॑र्ऋ॒तुरस्मै॑
 कल्प॑मान एति॒ प्रत्ये॒व तिष्ठ॑ति सँव॒थ्सरो॑ वा अ॒ग्निर्- [] 28

TS 5.7.6.6

ऋ॒तु॒स्थास्तस्य॑ वसन्तः॑ शिरो॑ ग्री॒ष्मो दक्षि॑णः पक्षो॑ वर्॒षाः
 पु॒च्छ॑ शरदु॒त्तरः॑ पक्षो॑ हे॒मन्तो॑ म॒द्ध्यं पूर्॒वप॑क्षा-श्चि॒तयोऽप॑रपक्षाः
 पु॒रीष-म॑हो॒रात्रा॑णी॒ष्टका॑ एष॒ वा अ॒ग्निर्. ऋ॒तु॒स्था य एवं
 वे॒द॒र्तुर्.ऋ॒तु-र॒स्मै क॑ल्प॒मान॑ ए॒ति प्र॒त्येव॑ ति॒ष्ठति॑ प्र॒जाप॑ति॒र्वा
 ए॒तं ज्यै॑ष्ठ्य॒कामो॑ न्य॒धत्त॑ ततो॒ वै स ज्यै॑ष्ठ्यम॒गच्छ॑द्-य
 एवं वि॒द्वान॒ग्निं चि॑नुते () ज्यै॑ष्ठ्यमे॒व ग॑च्छति ॥ 29

(पृ॒थि॒वीं यँ॑च्छ - यथ् स्वय॑मा॒तृ॒ण्णा उ॒प॒धाय॑ - धे॒ह्य - चा -
 ऽग्नि॑ - श्रि॒नुते॑ - त्री॒णि च) (A6)

TS 5.7.7.1

यदा॑कू॒ताथ् स॒मसु॑स्रो॒द्धृ॒दो वा॒ मन॑सो वा संभृ॑तं चक्षु॒षो वा ।
 तम॑नु प्रेहि सु॒कृ॒तस्य॑ लो॒कं य॑त्रर्ष॒यः प्र॑थम॒जा ये पु॑रा॒णाः ॥
 ए॒तं स॒ध॒स्थ परि॑ ते द॒दामि॑ य-माव॒हाच्छे॑व॒धिं जा॑तवे॒दाः ।
 अ॒न्वा॒गन्ता॑ य॒ज्ञप॑ति॒र्वो अ॒त्र तं स्म॑ जा॒नीत॑ पर॒मे व्यो॑मन् ॥
 जा॒नी॒तादे॑नं पर॒मे व्यो॑मन् दे॒वाः स॒ध॒स्था वि॒द रू॒पम॑स्य ।
 यदा॑गच्छात् - [] 30

TS 5.7.7.2

प॒थिभि॑र्दे॒वयानै॑रि॒ष्टापूर्ते॑ कृ॒णुता॑दावि॒रस्मै॑ ॥
सं प्र च्य॑व॒द्ध्वम॒नु सं प्र या॑ताग्ने॒ पथो॑ दे॒वयाना॑न् कृ॒णुद्ध्वं॑ ।
अ॒स्मिन्थ् स॒धस्थे॑ अ॒ध्युत्तर॑स्मिन् विश्वे॑ दे॒वा यज॑मानश्च सी॒दत॑ ॥
प्र॒स्तरे॑ण परि॒धिना॑ सु॒चा वे॒द्या च ब॒र्हिषा॑ ॥
ऋ॒चेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे ॥
यदि॑ष्टं य॒त् प॒रादा॑नं य॒द्-दत्तं॑ या च दक्षि॑णा ।

त - [] 31

TS 5.7.7.3

-द॒ग्निर्वै॑श्चक॒र्मणः॑ सुव॑र्दे॒वेषु॑ नो दधत् ॥
येना॑ स॒हस्रं॑ व॒हसि॑ येनाग्ने॒ सर्व॑वेदसं ।
तेनेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे ॥
येनाग्ने॑ दक्षि॑णा यु॒क्ता य॒ज्ञं व॑हन्त्यृ॒त्विजः॑ ।
तेनेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे ॥
येनाग्ने॑ सु॒कृतः॑ प॒था म॒धोर्द्धारा॑ व्या॒नशुः॑ ।
तेनेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे () ॥
यत्र॑ धा॒रा अ॒नपे॑ता म॒धोर्धृ॑तस्य च याः ।

तद॒ग्निर्वै॑श्व॒कर्म॒णः सु॒वर्दे॑वेषु नो दधत् ॥ 32

(आ॒गच्छा॑त् - तद् - व्या॑न॒शु स्ते॒नेमं॑ य॒ज्ञं नो॑
वह॑ सु॒वर्दे॑वेषु गन्त॒वे - चतु॑र्दश च) (A7)

TS 5.7.8.1

या-स्ते॑ अ॒ग्ने स॒मिधो॑ या॒नि धा॒म या जि॒ह्वा जा॑तवेदो यो अ॒र्चिः ।

ये ते॑ अ॒ग्ने मे॒डयो॑ य इ॒न्द्रव॒स्तेभि॒रात्मा॑नं चि॒नुहि॑ प्र॒जा॒नन् ॥

उ॒थ्स॒न्नय॒ज्ञो वा ए॒ष यद॒ग्निः किं॑ वाऽहै॒तस्य॑ क्रि॒यते॑

किं॑ वा न यद्वा अ॒ध्वर्यु॑-र॒ग्नेश्चि॒न्वन्-॑न्त॒रेत्या॑त्म॒नो वै

तद॒न्त-॑रेति यास्ते॑ अ॒ग्ने स॒मिधो॑ या॒नि - [] 33

TS 5.7.8.2

धा॒मेत्या॑है॒षा वा अ॒ग्नेः स्व॒यञ्चि॑तिर॒ग्निरे॒व तद॒ग्निं

चि॒नोति॑ ना॒ध्वर्यु॑रा॒त्मनो॑ ऽन्त॒-रेति॑ च॒तस्र॑ आ॒शाः

प्र॒चर॑न्त्व॒ग्नय॑ इ॒मं नो॑ य॒ज्ञं न॑यतु प्र॒जा॒नन् ।

घृ॒तं पि॒न्वन्-॑ज॒रꣳ सु॒वीरं॑ ब्र॒ह्म स॒मिद्-॑भ॒वत्या॑हु॒तीनां॑ ॥

सु॒वर्गा॒य वा ए॒ष लो॒कायो॑प॒ धीय॑ते यत् कूर्मश्च॒तस्र॑ आ॒शाः

प्र॒ चर॑न्त्व॒ग्नय॑ इ॒त्याह॑ - [] 34

TS 5.7.8.3

दि॒श ए॒वैते॒न प्र॒ जा॒नाती॒मं नो॑ य॒ज्ञं न॑यतु प्र॒जा॒नन्नि॒त्याह॑ सु॒वर्ग॑स्य
लो॒कस्या॒भिनी॑त्यै ब्र॒ह्म॒ समि॑द्-भ॒वत्या॑हु॒तीना॑-मि॒त्याह॑ ब्र॒ह्म॒णा वै
दे॒वाः सु॒वर्गं॑ लो॒कमा॑यन्. यद्-ब्र॒ह्म॒ण्वत्यो॑प॒दधा॑ति ब्र॒ह्म॒णैव॑ तद्-
यज॑मानः सु॒वर्गं॑ लो॒कमे॑ति प्र॒जाप॑तिर्वा ए॒ष यद॑ग्निस्तस्य प्र॒जाः
प॒शव॑ इ॒च्छन्दा॑सि रू॒पं स॒र्वान् वर्णा॑निष्ट॒कानां॑ () कुर्या॑द् रू॒पेणै॒व
प्र॒जां प॒शून् छन्दा॑स्य॒व रु॒न्धे ऽथो॑ प्र॒जाभ्य॑ ए॒वैनं॑ प॒शुभ्य॑
इ॒च्छन्दी॑भ्यो ऽव॒रुद्ध्य॑ चिनुते ॥ 35

(यान्य - गनय इत्याहे - षकानां - षोडश च) (A8)

TS 5.7.9.1

मयि॑ गृ॒ह्णाम्य॑ग्रे अ॒ग्निं रा॒य स्पो॑षाय सु॒प्रजा॑स्त्वाय सु॒वीर्या॑य ।
मयि॑ प्र॒जां मयि॑ वर्चो॑ द॒धाम्य॑रि॒ष्टाः स्याम॑ त॒नुवा॑ सु॒वीराः॑ ॥
यो नो॑ अ॒ग्निः पि॒तरो॑ हृ॒थस्व॑न्त-र॒मर्त्यो॑ म॒र्त्यां आवि॑वेश ।
तमा॑त्मन् परि॑ गृ॒ह्णीम॑हे व॒यं मा सो॑ अ॒स्मा अव॑हाय प॒रा गा॑त् ॥
यद॑ध्व॒र्यु-रा॑त्मन्न॒ग्निम॑-गृ॒हीत्वा॑ ऽग्निं॑ चि॒नुया॑द्-यो॒ ऽस्य॑
स्वो॑ ऽग्नि-स्तमपि - [] 36

TS 5.7.9.2

यज॑मानाय॒ चिनु॑याद॒ग्निं खलु॑ वै प॒शवोऽनू॑प॒ तिष्ठ॑न्ते ऽप॒क्रामु॑का
अस्मात् प॒शवः॑ स्यु॒र्मयि॑ गृ॒ह्णाम्य॑ग्रे अ॒ग्नि-मि॒त्याहाऽऽत्म॑न्नेव
स्वम॒ग्निं दा॑धार नास्मात् प॒शवो ऽप॒ क्राम॑न्ति ब्र॒ह्मवा॑दिनो वदन्ति
यन्मृ॒च्चाऽऽप॑-श्चा॒ग्ने-र॒नाद्य॑-मथ॒ कस्मा॑न्मृ॒दा चा॒द्भि-श्चा॒ग्नि-श्री॑यत
इति॒ यद॒द्भिः सँ॑यौ - [] 37

TS 5.7.9.3

-त्यापो॒ वै सर्वा॑ दे॒वता॑ दे॒वता॑भिरे॒वैन॑ꣳ सꣳ सृ॑जति
यन्मृ॒दा चि॑नोती॒यं वा॑ अ॒ग्निर्वै॑श्चा॒नरोऽग्नि॑नैव तद॒ग्निं चि॑नोति
ब्र॒ह्मवा॑दिनो वदन्ति यन्मृ॒दा चा॒द्भि-श्चा॒ग्नि-श्री॑यते ऽथ
कस्मा॑द॒ग्नि-रु॑च्यत इति॒ यच्छ॑न्दो॒भि-श्चि॑नोत्य॒ग्नयो॒ वै छ॑न्दाꣳसि
तस्मा॑द॒ग्नि-रु॑च्यते ऽथो॒ इयं॑ वा॒ अग्नि॑र्वै॑श्चा॒नरो य॒ - [] 38

TS 5.7.9.4

-न्मृ॒दा चि॑नोति तस्मा॑द॒ग्निरु॑च्यते हि॒रण्येष्ट॑का उप॒ दधा॑ति ज्योति॒र्वै
हि॒रण्यं ज्यो॑तिरे॒वा ऽस्मिन्॑ दधा॒त्यथो॒ तेजो॑ वै हि॒रण्यं तेज॑
ए॒वाऽऽत्म॑न् ध॒त्ते यो॒ वा अ॒ग्निꣳ स॑र्वतो॒मुखं॑ चिनु॒ते सर्वा॑सु
प्र॒जास्व॑न्नम॒त्ति सर्वा॑ दि॒शो ऽभि॑ जयति गा॒यत्रीं पु॒रस्ता॑दुप॒ दधा॑ति

त्रि॒ष्टु॒भं दक्षि॑णतो जगतीं पश्चादनु॒ष्टु॒भमुत्तर॑तः पङ्क्तिं मद्ध्य एष वा ()
 अ॒ग्निः सर्व॑तो॒मुख॑स्तं य एवं वि॒द्वा॒-श्चि॒नु॒ते सर्वा॑सु प्रजास्व॒न्नम॑ति
 सर्वा दि॒शो ऽभि ज॑यत्यथो दि॒श्येव दि॒शं प्र व॑यति तस्माद्-दि॒शि
 दिक् प्रो॒ता ॥ 39

(अ॒पि-स॒यौति॑-वै॒श्वान॑रो य-देष॒ वै-पञ्च॑वि॒ंशति॑श्च) (A9)

TS 5.7.10.1

प्रजा॑पतिरग्निमसृजत सो ऽस्मात् सृष्टः प्राङ् प्रा॒ऽद्रव॑त् तस्मा
 अ॒श्वं प्र॒त्यास्य॑त् स दक्षि॑णा ऽऽ *वर्त॑त तस्मै वृ॒ष्णिं प्र॒त्यास्य॑त्
 स प्र॒त्यङ्वा॑वर्तत तस्मा ऋ॒षभं॑ प्र॒त्यास्य॑त् स उद॒ङ्वा॑वर्तत
 तस्मै ब॒स्तं प्र॒त्यास्य॑त् स ऊ॒र्ध्वो ऽद्र॑वत् तस्मै पु॒रुषं॑
 प्र॒त्यास्य॑द्-यत् प॒शु॒शीर्.षा॒ण्युप॑दधाति सर्व॑त ए॒वैन- [] 40

TS 5.7.10.2

मव॑रुद्ध्य चिनुत ए॒ता वै प्रा॑णभूत-श्चक्षु॑ष्मतीरिष्ट॒का यत्
 प॒शु॒शीर्.षा॒णि यत् प॒शु॒शीर्.षा॒ण्युप॑दधाति ताभि॑रेव यज॒मानो॑ ऽमुष्मिन्
 लो॒के प्रा॑णित्यथो ताभि॑रेवास्मा इ॒मे लो॒काः प्र भा॑न्ति मृ॒दा ऽभिलि॑प्योप
 दधा॑ति मे॒द्ध्यत्वा॑य प॒शुर्वा एष॑ यद॒ग्निर॑न्नं प॒शव॑ एष खलु॒ वा
 अ॒ग्निर्य॑त् प॒शु॒शीर्.षा॒णि यं का॒मये॑त कनी॒यो ऽस्या॑न्न - [] 41

TS 5.7.10.3

स्यादिति सन्तरां तस्य पशुशीर्षाण्युप दद्ध्यात् कनीय एवास्यान्नं
भवति यं कामयेत समावदस्यान्नञ् स्यादिति मद्ध्यत-स्तस्योप
दद्ध्यात् समाव-देवास्यान्नं भवति यं कामयेत भूयो ऽस्याऽन्नञ्
स्यादित्यन्तेषु तस्य व्युदूह्योप दद्ध्यादन्तत एवास्मा अन्नमव रुन्धे
भूयो ऽस्यान्नं भवति () ॥ 42

(एन- मस्यान्नं - भूयोऽस्याऽन्नं भवति) (A10)

TS 5.7.11.1

स्तेगान् द७ष्ट्राभ्यां मण्डूकान् जंभ्येभिरादकां-खादेनोर्ज७
स७ सूदेनारण्यं जांबीलेन मृदं बर्स्वेभिः
शर्कराभि-रवका-मवकाभिः शर्करा-मुत्सादेन जिह्वा-मवक्रन्देन
तालु७ सरस्वतीं जिह्वाग्रेण ॥ 43 (स्तेगान् - द्वावि७शतिः) (A11)

TS 5.7.12.1

वाज७ हनूभ्यामप आस्येनाऽऽदित्या-ञ्छमश्रुभि-रुपयाम-
मधरेणोष्ठेन सदुत्तरेणान्तरेणा-नूकाशं प्रकाशेन बाह्य७ स्तनयितुं
निर्बाधेन सूर्याग्नी चक्षुभ्यां विद्युतौ कनानकाभ्या-मशनिं
मस्तिष्केण बलं मज्जभिः ॥ 44 (वाजं पञ्चवि७शतिः) (A12)

TS 5.7.13.1

कूर्मा-ज्छ॒फै-र॒च्छ॒लाभिः॑ क॒पिज्ज॒लान्त्साम॑ कु॒ष्ठिकाभिर्ज॒वं
जङ्घाभि-र॒गदं॑ जा॒नुभ्यां॑ वी॒र्यं॑ कु॒हाभ्यां॑ भ॒यं प्र॑चा॒लाभ्यां॑
गुहो॑प॒पक्षाभ्या॑-म॒श्विना॒व॒साभ्या॑-म॒दिति॑ शी॒र्ष्णा नि॒र्ऋतिं॑
नि॒र्जाल्म॑केन शी॒र्ष्णा ॥ 45

(कूर्मान्-त्रयोविंशतिः) (A13)

TS 5.7.14.1

योक्त्रं॑ गृ॒द्धाभि॒र्युग॑-मा॒नते॑न चि॒त्तं म॒न्याभिः॑ संक्रो॒शान् प्रा॒णैः
प्रका॑शेन त्वचं॑ प॒राका॑शेना॒न्तरां॑ म॒शकान्॑ के॒शै-रिन्द्र॑ स्व॒पसा
वहे॑न बृ॒हस्प॑ति॒ शकु॑निसादे॒न रथ॑-मु॒ष्णिहा॑भिः ॥ 46

(योक्त्र - मेकविंशतिः) (A14)

TS 5.7.15.1

मि॒त्राव॑रुणौ श्रो॒णीभ्या॑मिन्द्रा॒ग्नी शि॒खण्डा॑भ्या-मिन्द्रा॒बृह॑स्पती
ऊ॒रुभ्या॑मिन्द्रा॒विष्णू॑ अ॒ष्टीव॑द्भ्या॒ सवि॑तारं पु॒च्छेन॑
गन्ध॑र्वाज्छे॒पेना॑-फ॒स्पर॑सो मु॒ष्काभ्यां॑ प॒वमानं॑ पा॒युना॑ प॒वित्रं॑
पो॒त्राभ्या॑मा॒क्रम॑णं स्थू॒राभ्यां॑ प्र॒तिक्र॑मणं कु॒ष्ठाभ्यां॑ ॥ 47

(मित्रावरुणौ - द्वाविंशतिः) (A15)

TS 5.7.16.1

इन्द्रस्य क्रोडो ऽदित्यै पाजस्यं दिशां जत्रवो जीमूतान्
हृदयौपशाभ्या-मन्तरिक्षं पुरितता नभ उदर्येणेन्द्राणीं प्लीहा
वल्मीकान् क्लोम्ना गिरीन् प्लाशिभिः समुद्रमुदरेण वैश्वानरं
भस्मना ॥ 48

(इन्द्रस्य - द्वाविंशतिः) (A16)

TS 5.7.17.1

पूष्णो वनिष्ठु-रन्धाहेः स्थूरगुदा सर्पान् गुदाभिर्. ऋतून् पृष्ठीभिर्दिवं
पृष्ठेन वसूनां प्रथमा कीकसा रुद्राणां द्वितीया ऽदित्यानां तृतीया
ऽङ्गिरसां चतुर्थी साद्धानां पञ्चमी विश्वेषां देवानां षष्ठी ॥ 49

(पूष्ण - श्रुतुर्विंशतिः) (A17)

TS 5.7.18.1

ओजो ग्रीवाभिर् निर्.ऋति-मस्थभि-रिन्द्रः स्वपसा वह्नेन रुद्रस्य
विचलः स्कन्धो ऽहोरात्रयोर्द्वितीयो ऽर्द्धमासानां तृतीयो मासां
चतुर्थ ऋतूनां पञ्चमः सँवत्सरस्य षष्ठः ॥ 50

(ओजो - विंशतिः) (A18)

TS 5.7.19.1

आ॒नन्दं॑ न॒न्द॒थु॒ना॒ का॒मं॑ प्र॒त्या॒सा॒भ्यां॑ भ॒य॒ꣳ शि॒ती॒म॒भ्यां॑ प्र॒शि॒षं॑
प्र॒शा॒सा॒भ्याꣳ सूर्या॑च॒न्द्र॒म॒सौ॑ वृ॒क्या॒भ्याꣳ श्या॑म॒श॒ब॒लौ॑ म॒त॒स्ना॒भ्यां॑
ꣳव्यु॑ष्टिꣳ रू॒पे॒ण॒ नि॒मृ॒क्ति॑-म॒रू॒पे॒ण॒ ॥ 51

(आ॒नन्दꣳ - षोड॑श) (A19)

TS 5.7.20.1

अ॒ह॒र्माꣳसे॒न रा॒त्रिं॑ पी॒व॒सा ऽपो॑ यू॒षे॒ण घृ॒तꣳ र॒से॒न श्यां॑ व॒स॒या
दू॒षी॒का॒भि-ह्रा॑दु॒नि-म॒श्रु॒भिः पृ॒ष्वां दि॒वꣳ रू॒पे॒ण नक्ष॑त्राणि प्र॒ति॒रू॒पे॒ण
पृ॒थि॒वीं च॒र्म॒णा छ॒वीं छ॒व्यो॒पा॒कृ॒ताय॑ स्वा॒हा ऽल॑ब्धाय स्वा॒हा हु॒ताय॑
स्वा॒हा ॥ 52 (अ॒हर - षा॒विꣳश॒तिः) (A20)

TS 5.7.21.1

अ॒ग्नेः पक्ष॑तिः सर॒स्व॒त्यै नि॒पक्ष॑तिः सोम॑स्य तृ॒तीया॑ ऽपां
च॒तु॒र्थ्योष॑धीनां पञ्च॒मी सँव॑त्सरस्य षष्ठी म॒रु॒ताꣳ सप्त॑मी
बृ॒ह॒स्प॒ते॒रष्ट॑मी मि॒त्र॒स्य न॒व॒मी व॒रु॒णस्य॑ द॒श॒मीन्द्र॑स्यैकाद॒शी वि॒श्वे॑षां
दे॒वानां॑ द्वा॒द॒शी द्या॒वापृ॑थि॒व्योः पा॒र्श्वं य॑मस्य पा॒टूरः॑ ॥ 53

(अ॒ग्ने-रे॒का॒त्र॒त्रिꣳश॒त्) (A21)

TS 5.7.22.1

वा॒योः प॒क्षतिः॑ सर॒स्वतो॑ नि॒पक्ष॑ति-श्च॒न्द्रम॑स-स्तृ॒तीया॑ नक्ष॒त्राणां॑
चतु॒र्थी स॒वितुः॑ पञ्च॒मी रु॒द्रस्य॑ षष्ठी॒ सर्पा॑णाः सप्त॒म्यर्य॑म्णो ऽष्ट॒मी
त्वष्टु॑र्नव॒मी धा॒तुर्द॒शमीन्द्रा॑ण्या ए॒काद॒श्यदि॒त्यै द्वा॒दशी॑ द्वा॒वापृ॑थि॒व्योः
पा॒र्श्वं य॒म्यै पा॒टूरः॑ ॥ 54

(वा॒यो - र॒ष्टाविं॑शतिः) (A22)

TS 5.7.23.1

पन्था॑मनू॒वृग्भ्या॑ः सन्त॑तिः स्ना॒व॒न्याभ्या॑ः शु॒कान्॑ पि॒त्तेन॑ हरि॒माणं॑
य॒क्ना ह॒लीक्ष्णान्॑ पा॒पवा॑तेन॒ कू॒श्माञ्छ॑कभिः शव॒र्तानू॑वद्ध्येन॒ शुनो॑
वि॒शस॑नेन॒ सर्पान्॑ लो॒हित॑गन्धेन॒ वया॑ऽसि पक्व॒गन्धेन॑ पि॒पीलि॑काः
प्र॒शादे॑न ॥ 55

(पन्थां - द्वा॒विं॑शतिः) (A23)

TS 5.7.24.1

क्र॒मै-र॒त्यक्र॑मीद्-वा॒जी वि॒श्वैर्दे॒वैर्य॑ज्ञि॒यैः सँ॑वि॒दानः॑ ।
स नो॑ नय सु॒कृत॑स्य॒ लोकं॑ तस्य॒ ते वय॑ः स्व॒धया॑ मदे॒म ॥ 56

(क्र॒मै - र॒ष्टाद॑श) (A24)

TS 5.7.25.1

द्वौ-स्ते पृष्ठं पृथिवी सधस्थ-मात्मा ऽन्तरिक्षं समुद्रो योनिः
 सूर्यस्ते चक्षुर्वातः प्राणश्चन्द्रमाः श्रोत्रं मासाश्चार्द्धमासाश्च
 पर्वाण्यृतवो ऽङ्गानि सँवत्सरो महिमा ॥ 57

(द्वौ - पञ्चविंशतिः) (A25)

TS 5.7.26.1

अग्निः पशुरासीत् तेनायजन्त स एतं लोकमजयद्-यस्मिन्नग्निः
 स ते लोकस्तं जैष्यस्यथाव जिघ्र वायुः पशुरासीत् तेनायजन्त
 स एतं लोकमजयद्-यस्मिन् वायुः स ते लोकस्तस्मात्
 त्वा ऽन्तरेष्यामि यदि नावजिघ्रस्यादित्यः पशुरासीत् तेनायजन्त
 स एतं लोकमजयद् यस्मि-()-न्नादित्यः स ते लोकस्तं जैष्यसि
 यद्यवजिघ्रसि ॥ 58

(यस्मि - त्रष्टौ च) (A26)

Prasna Korvai with starting Padams of 1 to 26 Anuvaakams :-

(यो वा अ॒य॒थादे॒वत॒ - न्त्वा॒म॒ग्न॒ - इन्द्र॑स्य - चि॒त्तिं॒ - य॒था वै॒ -
व॒यो वै॒ - यदा॑कू॒ताद् - यास्ते॑ अ॒ग्ने - म॒यि गृ॑ह्णामि - प्र॒जाप॑तिः
सोऽस्मा॑त् - स्ते॒गान् - वा॒जं - कू॒र्मान् - योक्त्रं॑ - मि॒त्राव॑रुणा
- विन्द्र॑स्य - पू॒ष्ण - ओज॑ - आ॒नन्द॑ - मह॑ - र॒ग्ने - र्वा॒योः
- पन्थां॑ - क्र॒मै - द्यौस्ते॑ - ऽग्निः प॒शुरा॑सीत् - षड्वि॑ंशतिः)

Korvai with starting Padams of 1, 11, 21 Series of Panchaatis :-

(यो वा - ए॒वाऽऽहु॑ति - म॒भ॒वन् - प॒थि॒भि - र॒व॒रु॒द्ध्य॒ - ऽऽन॑न्द
- म॒ष्टौ पञ्च॑शत्)

First and Last Padam of Seventh Prasnam of 5th Kandam :-

(यो वा अ॒य॒थादे॒वतं॒ - य॒द्यव॑जिघ्रसि)

Kaanda Korvai with starting Padams of 7 Prasanams of Kandam 5:-

(सा॒वि॒त्रा॒णि – वि॒ष्णु॒मु॒खा – उ॒थ्स॒न्न॒य॒ज्ञो – दे॒वा॒सु॒रा – य॒दे॒के॒न
– हि॒र॒ण्य॒व॒र्णा – यो वा – स॒प्त)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे सप्तमः प्रश्नः समाप्तः ॥

॥ इति पञ्चमं काण्डं ॥

Details of Anuvakam, Panchati and Padam for Kandam 5

	Anuvakam	Panchati	Padams
Prasna 1	11	59	3081
Prasna 2	12	64	3195
Prasna 3	12	48	2477
Prasna 4	12	58	2906
Prasna 5	24	62	2727
Prasna 6	23	54	2436
Prasna 7	26	58	2582
Total	120	403	19404